



十四
閩中金石記

14
1429
14



敘

余生平未嘗至關中聞有所謂碑林者未由見也數十年前有人從長安來叩之則大率在榛莽中雨淋日炙不加葺治甚且衆穢所容幾難廁足蓋未嘗不慨然興歎也鎮洋畢公前撫陝之二載政通人和爰以暇日訪古至其地顧而悚息於是堂廡之傾圮者亟令繕完舊刻之陷於土中者洗而出之開成石經多失其故第復一一加以排比於外周以闌楯又爲門以限之使有司掌其啓閉廢墜之久劇然更新儒林傳爲盛舉及公之復莅秦中也乃并哀各郡邑前後所得金石刻始於秦訖於元著爲關中金石記八卷考正史傳辨析點畫以視洪趙諸人殆又過之夫人苟趣目前往往於先代所留遺不甚愛惜而亦無以爲後來之地儒生網羅放失亦能使古人之精神相煥發而或限於其力之所不能必賴上之人實護而表章之以相推相衍於無窮其視治效之僅及於一時者相什伯也公之於政也綽有餘力故能百廢具興卽此亦其一也自

國朝以來爲金石之學者多於前代以余所知若崑山顧氏炎武秀水朱氏彝尊嘉興曹氏溶仁和倪氏濤大興黃氏叔璫襄城劉氏青芝黃岡葉氏封嘉興李氏光映邵陽褚氏峻錢塘丁氏敬山陽吳氏玉搢嘉定錢氏大昕海鹽張氏燕昌皆其選也繼此者方未有艾得公書而考

之庶幾古今人之精神命脈不至中絕也乎
乾隆四十有七年季冬杭東里人盧文弨敘
金石之學與經史相表裏側蓄異本任城辨於公羊夏具殊文新安述於魯論歐趙洪諸家涉
獵正史是正尤多蓋以竹帛之文久而易壞手鈔板刻展轉失真獨金石銘勒出於千百載以
前猶見古人真面目其文其事信而有徵故可寶也關中爲三代秦漢隋唐都會之地碑碣之
富甲于海內巡撫畢公以文學侍從之臣膺分陝之任三輔漢中上郡皆校部所及又嘗再領
總督印踰河隴度伊涼跋涉萬里周爰咨詢所得金石文字起秦漢訖于金元凡七百九十七
通雍涼之奇秀萃于是矣公又以政事之暇鉤稽經史決摭異同條舉而件繫之正六書偏旁
以糾冰英之謬按禹貢古義而求漢濱之源表河伯之故祠紬道經之善本以及三藏五燈之
秘七音九弄之根偶舉一隅都超凡諦自非多學而識何以臻此在宋元豐中北平田概嘗撰
京兆金石錄六卷其書雖不傳然陳氏寶刻叢編屢引之揆其體例僅紀撰書姓名年月初無
攷證之益且所錄不過京兆一路豈若斯記自關內山南河西隴右悉著於錄而且徵引之博
辨析之精沿波而討源推十以合一雖曰嘗鼎一臠而經史之實學寓焉大昕於茲事篤嗜有
年嘗恨見聞淺尠讀公新製如獲異珍它日按籍而求以補藏弄之闕則是編爲西道主人矣

辛丑歲七月錢大昕序

關中金石記目次

卷第一秦二漢十三魏二晉一秦一北魏四周三隋十二石三十五瓦三

卷第二唐六十九金二石六十七

卷第三唐一百三

卷第四唐一百七梁二後唐二晉二周一

卷第五宋一百廿一金二石一百十九

卷第六宋二百金二石一百九十八

卷第七金五十五金四石五十一附劉豫五

卷第八元一百三金三石一百

計金十三瓦三石七百八十一共七百九十七以乾隆辛丑歲七月開雕九月刻竟沅并識

別之攷當時衛最後亡此瓦應即其時造也蘭池宮遺址今亦在咸陽

漢

漢中太守郿君開石門道碑 永平六年刻分書在褒城北石門

字徑三四寸體界篆隸之間甚方整而長短廣狹不一余所見漢人書若諸城縣署內延光四年刻石亦此類也其文云永平六年漢中郡以詔書受廣漢蜀郡巴郡徒二千六百九十八人開通褒余道太守鉅鹿郿君部掾治級王宏史荀茂張宇韓岑弟其功作太守丞廣漢楊顯將相口始作橋格六百二十三口大橋五為道三百五十八里郵亭驛置徒司空褒中縣官等口并六十四所口凡用功七十六萬六千九百口口瓦廿六萬九千八百共計一百二十四字合之宋晏表所云一百三十九字共少十一字當是所紀歲月也袁文中似又有永平九年四月字樣或此初始於六年成於九年後刻此石也中褒斜作余橋閣作格並古字通敦煌太守裴岑紀功碑 永和二年八月立隸書在鎮西府北關 關忠義廟 岑漢書無名西域傳云漢自陽嘉以後朝威稍損諸國驕放轉相侵伐蓋當時車師內附呼行每與為難中國屢發諸國兵討之不利岑為太守以本郡兵三千扞禦能克敵全師故自紀其功若此

楊孟文石門頌 建和二年中冬立隸書在石門

碑云楊君厥字孟文故水經注稱為楊厥碑攷之華陽國志則楊君名渙字孟文也洪适云厥實語助耳非名文內有云高祖受命興於漢中道由子午出散入秦以子午塗路並難更隨圍谷復通堂光說與郿閣頌嘉念高帝之開石門元功不朽云云合出散入秦者散關也碑為漢中太守榘為武陽王升立以榘為榘用古字說文無榘字

蒼頡廟碑 隸書在白水黃龍山廟內

是碑圭首上有穿文甚磨泐惟蒼頡天生德于大聖四目靈光數字可辯其陰多曹字蓋是當時人題名如兵曹曹賊曹之類兩側甚明晰有永壽二年延熹四年字樣側又有記故有大聖之遺靈以示來世之及下行因紀姓名等說其云萬年左鄉有秩萬年北鄉有秩蓮勺左鄉有秩池陽左鄉有秩者則是是方民衆之有爵秩者司馬彪百官志以為三老游徼嗇夫之屬也趙明誠以為熹平中立余案碑側已有永壽年號則非熹平可知

西嶽華山廟碑

此碑世有兩本一為商邱宋氏榮所藏一為華州王宏撰所藏皆宋搨也宋氏本雍正初姜任修摹刻于揚州郭本今為曲阜孔繼涑所刻兩本字殘泐處悉同世又有所謂全本則不

涇川堂叢書

關中金石記一

足信

開西狹頌 建寧四年六月刻隸書在成縣

文云漢陽阿陽李君諱翁字伯都漢陽前漢為天水郡永平十七年更名後有黃龍嘉禾白鹿承露人木連理五瑞圖圖後云君昔在龜池修看嶽之道致此瑞因其地異故洪氏分為二碑實非也肴阪謂之肴嶽者因公羊傳以為嶽巖故也攷說文亦謂之岑峯諱翁歐陽修以為會非

造郝閣頌 建寧五年二月刻隸書在略陽

此碑刊于崖上自宋時已泐今更甚明申如墳翻本惡劣不堪兼多增改好古者為所惑亂今特以洪文惠隸釋所載者辯之序內濤波滂沛滂誤作滴減西□□增作減西瘡□□□□增作臣繼□□頌內□□□□增作上帝綏□愛民如□□□平均增足子遐邇三字豐稔□□□□樂增足年登居民四字□□□□今川兌之間增作曰析里之□川兌之間□□□□以析分增作西隴鼎峙今東以析分聖朝閔伶誤作憐憫艾究□□今幼奠兮益不□□□□充贏兮百姓歡欣改作拯溺亨屯兮瘡痍始起閭閻充盈兮百姓歡欣

豈有洪氏不能見其全而今反明晰且顯與洪氏兩異者于以知明時人之誣妄若此

碑後題從史□□□□字漢德為此頌者隸續云天井道碑題名內有仇靖字漢德故吏下辨□□子長書此頌者天下碑錄云仇子長名緇撰書人著名自此始華山碑有郭香察書洪适以為察人之書非以香察為名也

司隸校尉楊淮碑 熹平二年二月立隸書在石門

淮孟文之元孫字伯邳

郃陽令曹全紀功碑并陰 中平二年十月立隸書在郃陽

後漢書西域傳云靈帝建寧元年疏勒王與漢大都尉於獵中為其季父和得所射殺和得自立為王三年涼州刺史孟佗遣從事任涉將敦煌兵五百人與戊巳司馬曹寬西域長史張晏將焉耆龜茲車師前後部合三萬餘人討之攻楨中城四十餘日不能下引去其後疏勒王連相殺害朝廷亦不能禁今碑云和得殺父篡位君與師征討和得面縛歸死傳無面縛歸死之文此應從史碑附會言之耳所稱和德即和得得與德通寬亦即全全與寬通也仙人唐公房碑 年月並缺隸書在城固壻鄉

水經注云公房城固人也升仙之日壻行未返不得同階雲路約以此川為居因號曰壻鄉

壻水亦即名焉今案此碑稱公房以王莽居攝二年與真人期于壻谷口山上則是公房未升仙之日其水與鄉已號曰壻矣并無壻行未還之說道元不知何所據也

武都太守等題名殘碑 無號年隸書在華嶽廟

右題名共七行云民故武都太守□□躬導節故功曹司隸茂才司空掾池陽郭晁公休故功曹司空掾池陽吉華伯房故功曹司空掾蓮勺田巴叔鸞故功曹司空掾池陽吉充叔才故功曹大尉掾頻陽游殷幼齊故功曹大尉掾池口吉苗元裔一人為一行也首行下有故督郵三字次行下有故五二字三行下有故一字稽其官制地名是漢時碑陰無疑然攷隸釋隸續及金石集古等錄並無此刻乾隆四十四年修理嶽廟五鳳樓下所出古碑殘石甚多此為稱最焉

十三字殘碑 隸書在郃陽

今在郃陽康姓宰莘退食記云十三字碑向置曹全碑之旁今亡矣不知為康姓移去耳瓦當字

右共十五種並篆書一曰延年益壽二曰千秋萬歲三曰長生未央四曰長生無極五曰長樂未央六曰與天無極七曰億年無疆八曰益壽存富九曰都司空瓦十曰宗正官當十一

曰右空十二曰上林十三曰上林農官十四曰永奉無疆十五曰長毋相忘李好文長安志圖說載有七種今無儲胥未央萬壽無疆二種而別出者又得九種可見古物之未經前人見者猶多也宗正宮高帝七年二月置

魏

盪寇將軍李苞題名 景元四年十二月立隸書在石門中

文云景元四年十二月十日盪寇將軍浮亭侯譙國李苞字孝章將中軍兵石木工二千人始通此閣道苞字作苞前有潘宗伯韓仲元題名一行亦隸書其歲月莫可攷附置于此

十八字殘碑 隸書在郃陽

晉

蘭亭序 永和九年三月王羲之行書在咸陽

此卽醴泉苟氏本今為咸陽人所有後有董其昌跋蓋明時所刻也

秦

廣武將軍□產碑 建元二年十月立分書在宜君

文有云使持節冠軍將軍益州刺史上黨公之元孫又云建忠將軍□□護軍扶風太守遷
□匡侯之□子諱產字下缺又有與馮翊護軍云云皆未詳其事蹟上有額作立□山石祠
五字又有陰刻部將姓名

北魏

石門銘并序 永平二年己丑正月立王遠撰文并正書在石門中

遠無書名而碑字超逸可愛又自歐趙以來不著錄尤可寶貴也序文有云此門爲漢永平
中所開即指鄯君事言之鄯君爲漢中太守甚有功于民而史志家皆不載其人碑又遺其
名字余甚惜之

曹續造象銘 大統五年二月立隸書

文云見治富平令曹并邑子三十四人案其左方有造象人名大槩卽邑子三十四人也有
一人亦並作一像曹時封潁陽縣開國男
造象殘刻 無號年隸書並在富平

右刻與曹續造象制度略同皆列魏姓人名一人亦各爲一像因無歲月可稽附置于此
松滋公元萇振興溫泉頌 無年月正書篆額在臨潼靈泉觀

碑額三十六字字體奇詭不知所自云魏使持節散騎常侍都督雍州諸軍事西安將軍雍
州刺史松滋公河南元萇振興溫泉之頌萇于孝文時以代尹除懷朔鎮都大將宣武時爲
北中郎將帶河內太守歷侍中雍州刺史是碑所作當在宣武時也本傳稱萇襲爵松滋侯
例降侯賜艾陵伯降侯爲伯在孝文大統十六年是碑仍稱松滋者當是尊崇其世爵故不
及其所降之爵也亦俗情如此耶

周

聖母寺四面象銘 保定四年九月立正書在蒲城東北鄉二十里

豆盧恩碑 隸書在咸陽洪濱原

碑無號年以文內有保定元年之語故附置于此

華山神廟碑 天和二年十月立萬紐于瑾撰文趙文淵隸書篆額在華嶽廟

周書唐瑾本傳瑾封姑臧縣子進爵臨淄伯論平江陵功進爵爲公子志寧撰瑾碑乃言封
永昌子不及姑臧周書亦彼時所撰何兩異耶文稱太師大冢宰晉國公者宇文護也碑中
虞書字作允見左傳正義云石經古文作允清歌字作哥見說文云古文以爲歌字惟旃蒙
字作旃則不解其義攸字从彳作彼暇字从目作暇是時書體徧旁之謬類如此

隋

佛座記 開皇四年九月立正書在西安府城北雷神廟

淮安定公趙芬殘碑 開皇□年十二月立正書撰書人姓名缺在西安府城東中兆村

安喜公李使君碑 開皇十七年二月立隸書篆額撰書人並缺在乾州上官村

使君涼武昭王之後祖景超父通逸季父琰之通逸官至使持節東南道都督狄道縣開國子官亦不卑而名氏不見于史記獨琰之魏書有傳因知史家缺略為多也碑三截字畫工好使君名缺不詳

海陵郡公賀若誼碑 號年缺正書無撰書人姓名在興平縣學

隋書本傳誼在魏以功臣子賜爵容城縣男遷直閣將軍大都督通直散騎常侍尚食典御在周拜車騎大將軍儀同三司略陽公府長史除司射大夫封霸城縣子轉左官伯加開府歷靈邵二州刺史原信二州總管尋罷復熊州刺史遷洛州封建威縣侯進位大將軍拜亳州總管進封范陽郡公授上大將軍在隋為右武侯將軍河間王北征為副元帥轉左武侯大將軍免拜華州刺史轉敷州改封海陵郡公轉涇州拜靈州進位在國碑叙次往往與本傳合誼之加開府在周閔帝受魏禪之後碑云三年者當是明帝武成三年其治熊州在武

帝時碑云建德年較傳更明晰但不及坐兄敦及左武侯後兩次免職事耳碑文下半截殘闕

舍利塔銘額 仁壽元年十月立隸書在大荔

今銘已失只此額存上有楊繼宗等題名

唐高祖為子所疾疏 大業二年正月立正書無姓名在鄂縣草堂寺

高祖于隋歷譙隴岐三州刺史大業中為滎陽太守此云鄭州刺史當即是守滎陽時所造鷹揚即將義城子梁羅墓志 大業四年八月立正書在西安府城南杜曲

舍利塔銘 大業五年正月立正書在終南山

文云京兆府大興縣御肅鄉便子谷至相道場建立佛舍利塔御肅鄉即御宿川也古肅與宿通祭統宮宰宿夫人注宿讀為肅少牢饋食禮前宿一日宿戒尸注宿讀為肅特牲饋食禮乃宿尸注宿讀為肅古文宿皆作羞凡宿或作速記作肅周禮亦作宿案肅與宿通宿又與羞通然則漢時所謂御羞苑者義與御宿亦同矣便子谷當即梗梓谷常醜奴墓志 正書在興平學

碑方尺餘字甚精整

正草二體千字文 智永書在西安府學

此碑乃宋大觀己丑二月所刻者後有薛嗣昌跋石漸磨泐余家有宋拓本為義門何焯所藏甚可寶也

李衛公上金天王書 無號年行書在華嶽廟內

此碑乃後世好事者所刻就文義觀之應是衛公未遇時所為攷唐書本傳靖初仕隋為殿內直長大業未遷馬邑丞故附置于此

寶慶寺瓦頭 右為長安寶慶寺五字寺字居中篆書在咸寧花塔寺

關中金石記卷第一

關中金石記卷第一

鎮洋畢沅撰

唐

宗聖觀記 武德九年二月立歐陽詢撰序并隸書陳叔達撰銘在蓋屋樓觀

是碑末有中統元默闡茂之歲命工鏤剔行是元時已經開鑄信本楷正名高千古其隸書如房彥謙神道今已失傳藉此碑存猶足見其遺範然又為後人所剗壞殊屬可惜

孔子廟堂碑 武德九年十二月立虞世南正書長安三年四月相王且篆額在西安府學

碑舊無額至武后時始命相王書之額本作大周孔子廟堂之碑八字文宗朝為祭酒馮審琢去黃庭堅云碑末有長安三年太歲癸卯金四月壬辰水朔八日己亥木書額行亦相王所書又有朝議郎行左豹衛長史直鳳閣鍾紹京奉相王教搨勒碑額雍州萬年縣光宅鑄字行庭堅云者因此數行宋時已無之亦當為審所琢彥超翻本更不復用武周舊樣也彥超以周恭帝時加檢校太師宋初兼中書令太平興國中封邠國公此題云檢校太師兼中書令琅邪郡開國公者當是宋初所刊琅邪郡公猶是周時爵號也

寶室寺鐘銘 貞觀三年蕤賓月造正書在鄜州

略云鄜州寶室寺以大唐貞觀三年攝提在歲蕤賓御律景丁統日己巳司辰用銅三千斤

鑄鐘一口大鐘王趙夷杜茂大鐘主上大將軍張神安文詞清綺字法工雅非唐初人不能為之昔趙德父集錄始懷州寧照寺鐘係景龍三年此足與之較勝矣

邕禪師舍利塔銘 貞觀五年十一月立李伯藥撰文歐陽詢正書在終南山

九成宮醴泉銘 貞觀六年四月立魏徵撰文歐陽詢正書并篆額在麟遊

唐書地理志本隋仁壽宮義寧元年廢貞觀五年復置更名周垣一千八百步并置禁苑及武庫官寺等焉

右僕射虞公溫彥博碑 貞觀十一年十月立岑文本撰文歐陽詢正書篆額在醴泉烟霞洞

彥博以貞觀四年封虞國公十年遷尚書右僕射

昭仁寺碑 貞觀四年十月立朱子奢撰文正書篆額無姓名在長武

此碑不載書人宋張重威謂是虞世南書今案筆蹟與李衛公神道同疑是王知敬書

睽州刺史張琮碑 貞觀十三年二月立于志寧撰文正書姓名缺在長安北原

案碑撰書人姓名並缺其撰人但有庶子黎陽公五字可辨攷志寧當時正官太子右庶子封黎陽郡開國公故定為志寧所撰文云祖母李景皇帝之女贈信都大長公主蓋是定國後追贈之人故史不及之

左屯衛將軍姜行本勒石之紀文 貞觀十四年閏六月立正書在鎮西府松樹塘

此即太宗詔伐高昌勸文泰事也唐書高昌傳稱侯君集為交河道大總管薛萬均薩孤吳仁副之契苾何力為蔥山道副大總管牛進達為行軍總管率突厥契苾騎數萬討之據此

云口孤吳仁領右軍十五萬牛進達領兵十五萬與史言相合中叙君集封陳國公行本封

通川縣男史俱不及行本傳云高昌之役為行軍副總管出伊川距柳谷百里依山攻城其

地有漢班超紀功碑行本磨去古刻更刊頌陳國威靈應即是碑也文後有瓜州司法參軍

河內司馬太真詞具行當為撰文人姓名

褒國公段志元碑 貞觀十六年立正書篆額在醴泉儀門村

寶刻叢編云志元碑無書撰人姓名 唐書本傳云志元臨淄人此作鄒平傳云謚忠肅此

作忠壯

申文獻公高士廉瑩兆記 許敬宗撰文趙模正書在醴泉劉洞村

案集古錄以為貞觀二十一年立趙模即太宗命書蘭亭序者字畫甚工

故國子祭酒孔穎達碑 貞觀二十六年立于志寧撰文正書篆額無姓名在醴泉西谷村

案金石錄世傳虞世南書據碑文穎達卒時世南之亡久矣蓋規撫永興者也

皇甫誕碑 貞觀中追建于志寧撰文歐陽詢正書在西安府學

碑文多與史不合隋書本傳誕字元慮安定烏氏人碑則云字元憲安定朝那人本傳高祖受禪為兵部侍郎出為魯州刺史碑則云授廣州長史益州總管府司法無兵部及魯州兩節本傳叙遷治書侍御史後為河南道大使還判大理少卿明年遷尚書右丞以母憂去職起轉尚書左丞碑則云遷治書侍御史授大理少卿尚書右丞丁母憂起復詔持節為河北河南道安撫大使入為尚書左丞此並當以碑為正碑子民部尚書滑國公無逸追建褚亮碑 八分書篆額在醴泉西谷村

昭陵石刻記云碑與馬周碑如出一手當是殷仲容書也亮遂良之父貞觀中封陽翟侯碑無號年因其卒于貞觀時故附置于此

太尉梁文昭公房元齡碑 號年缺褚遂良正書篆額無姓名在醴泉烟霞洞

芮定公碑 永徽元年六月立李義府撰文正書無姓名在醴泉西谷村

芮定公者豆盧寬也唐書欽望傳祖寬高祖初擢殿中監子懷讓尚萬春公主貞觀中遷禮部尚書左衛大將軍芮國公卒贈特進并州都督謚曰定此碑額題曰唐故特進芮國公與史所稱正合文甚泐趙氏金石目錄以為義府所撰當無誤也 豆盧氏本慕容之後有名

長者於魏封北地王始賜此姓元和姓纂云慕容連北地王之後

三藏聖教序 永徽四年十月立太宗撰文褚遂良正書并隸額

劉軻撰三藏大遍覺塔銘曰貞觀廿年秋七月法師進新譯經論請制經序序成神筆自寫太宗居慶福殿百寮陪位坐法師命上官儀讀之即此序

三藏聖教序記 永徽四年十二月立高宗撰文褚遂良正書并篆額並在咸寧慈恩寺

劉軻撰三藏大遍覺塔銘曰貞觀廿二年夏天皇大帝居春宮又制述聖記及菩薩藏經後序據此則高宗所作又有藏經序也手荅稱所作論序鄙拙尤繁以此今序不傳

萬年宮銘 永徽五年五月立高宗御製並正書篆額在麟遊

唐書地理志九成宮永徽三年改曰萬年宮乾封二年復曰九成

碑陰題名

此刻上下分二層字兼行楷大小亦不一冊府元龜曰永徽五年五月制萬年宮銘刻石于永光門外仍令中書門下及文武三品以上并學士自書名位于碑陰刻之金石錄等書並作六年非是

定公韓良碑 永徽六年三月立于志寧撰文王行滿正書篆額在富平縣學

良韓瑗之父唐書作仲良蓋碑舉其名而傳及其字也官終刑部尚書秦州都督府長史穎川縣公

贈太常卿汾陰獻公薛收碑 永徽六年八月立于志寧撰文正書篆額姓氏缺在醴泉儀門村

唐書本傳云永徽中贈太常卿不及贈諡可以補史之缺

崔敦禮碑 于志寧撰文于立政正書在醴泉西谷村

案集古錄顯慶元年十月立庚子銷夏記作王知敬書誤

化度寺僧海禪師方坟記 顯慶二年四月立正書在長安百塔寺

塔在信行禪師塔之次

禮部尚書張允碑 顯慶三年三月立正書篆額在醴泉西谷村

文云故金紫光祿大夫張允以唐書儒學傳攷之當卽是張後允復齊碑錄云李義府撰文

衛景武公李靖碑 顯慶三年五月立許敬宗撰文王知敬正書在醴泉劉洞村

王居士磚塔銘 顯慶三年十月立上官靈芝撰文敬客正書在終南山

鄂國公尉遲恭碑 許敬宗撰文正書篆額在醴泉小陽村北

案集古錄顯慶四年三月立

蘭陵長公王碑 顯慶四年十月立李義府撰文正書額同在醴泉下古村

新書本傳謂公主名淑字麗貞下嫁竇懷哲懷哲太穆皇后之族子考之碑則云太穆皇后之孫宰相世系表在第五格爲后父毅之元孫三者皆不合若從碑則族子亦無稱孫之理或是族子之子爲族孫於后爲族祖姑與

夫人程氏塔銘 顯慶四年立正書在西安府城南

碑石失去一角云夫人程氏塔銘者蓋俗家夫婦用浮屠法安厝者也

冠軍大將軍代州都督許洛仁碑 龍朔二年十一月立撰書人姓名缺在醴泉儀門村

洛仁世緒弟也唐書附見世緒傳末洛仁字濟祖諱彪齊武川鎮將襲爵寧國郡公父諱

梁州刺史夏縣開國公傳不及之詳此碑

三藏聖教序記 龍朔三年五月立褚遂良正書在同州府學

遂良以顯慶三年卒在龍朔前應是前所書龍朔時始刻于此也

道因法師碑 龍朔三年十月立李儼撰文歐陽通正書并題額在西安府學

此碑題額上書三菩薩名字與碑文大小略同審之亦通筆也前人並未錄過

杜君綽碑 高正臣正書在醴泉

案碑文有龍朔口年字知高宗時立

騎都尉李文墓志 麟德元年二月立正書在同州

于志寧碑 乾封元年十一月立令狐德棻撰文子立政正書在三原長坳鄉

文云大業十年為清河縣長唐書列傳以為冠氏又不及自中書侍郎遷兵部授蒲州刺史不赴後為衛尉卿判太常卿以本官兼雍州別駕遷禮部尚書諸事此當以碑補正史書者也

紀國先妃陸氏碑 正書篆額在醴泉西屯村

案妃河南洛陽人父爽尚書庫部兵部二曹郎中以貞觀十七年冊為紀王妃麟德二年六月薨詔陪葬昭陵以乾封元年十二月葬于陵南二十二里紀昭陵陪葬者及金石文字諸書皆未載

道安禪師塔記 總章三年二月立正書在長安百塔寺

淄川公李孝同神道碑 咸亨元年五月立諸葛思禎正書在三原

孝同淮安王神通之子

張阿難碑 咸亨二年九月立僧普口正書篆額在醴泉西谷村

案碑書咸亨為咸亨者古亨亨字同也如漢劉熊碑子孫亨之張公神碑元亨利貞並是後人畫為兩字者非

高唐縣公馬周碑 上元元年十月立許敬宗撰文殷仲容隸書篆額在醴泉下古村

周以貞觀五年為中郎將常何薦令直門下省修起居注六年拜監察御史擢給事中八年行侍御史加員外散騎侍郎十二年轉中書舍人十五年遷治書侍御史兼知諫議大夫檢校晉王府長史十七年拜中書侍郎兼太子右庶子十八年為中書令二十年以本官攝吏部尚書明年晉銀青光祿大夫二十二年正月九日太宗本紀薨贈幽州都督卽以其年三月詔陪葬昭陵高宗永徽二年加贈尚書右僕射高唐縣開國公二史叙次官爵略同唯八年加員外散騎侍郎則缺者也以治為持避高宗諱改

阿史那忠碑 正書篆額在醴泉西谷村

案集古錄作上元二年金石錄作咸亨四年元和姓纂云阿史那氏開元中改為史唐書列傳云忠尚宗室女定襄縣主詔姓獨著史碑建于高宗時並不言改姓唐書誤也姓纂為是贈太尉揚州大都督英貞武公李勣碑 儀鳳二年十月立高宗御製並行書在醴泉劉洞村

此碑為高宗行書惟碑題下御製御書四字及後儀鳳年月字則正書陰有宋游師雄跋碑叙次與本傳略同惟討劉武周一節傳不及之耳中稱王世充為王克實建德為寶德因避太宗偏諱牽連及之也勳薨于總章二年春秋七十有六傳云八十六者非起冢准衛霍故事象烏德韃山及陰山鐵山以旌破北狄東夷之功游師雄云墳高七十五尺東西綿延七十五步周圍二百步碑高二丈二尺廣五尺八寸五分蓋坐甚偉

晉州刺史順義公神道碑 號年缺正書篆額在醴泉

順義公不詳其人據京兆金石錄以為卽裴藝碑亦褚遂良所書因附置于此

姜遐碑 姪邨公瞻撰文并正書

遐姜暮之孫行本之子史附見其兄簡傳但云簡弟柔遠則天時仕至左鷹揚衛將軍通事舍人內供奉而已瞻卽簡之子也瞻代簡襲行本爵為邨國公遐之子名皎諸書但詳行本陪葬昭陵而不及遐攻昭陵陪葬例子孫願從祖父塋者聽遐以丁內憂起復不餘年而卽卒當是從父塋于昭陵本不得與陪塋者同例也

王君碑 正書並在醴泉莊河村

文云右監門將軍王君又云武德九年授內侍貞觀四年遷右監門將軍進爵為公加正議

大夫又云吐谷渾據龍沙又云出使吐蕃又云二十二年遷使持節其人蓋以宦官而與李

衛公同征吐谷渾者也碑缺其名此唐時宦寺封公侯之始

述聖紀 文明元年八月立武后撰文中宗正書在乾州乾陵

碑折為數段今存兩截

美原神泉詩 垂拱四年四月立尹元凱篆書在富平美原鎮

右詩刻面陰皆有文面額題云美原神泉詩序六字隸書文首行題云五言夏曰旂神泉序序為太原縣尉韋元旦字烜作序後詩二首一為主簿賈言淑一亡姓名詩皆六韻陰額題云大唐裕明子書六字亦篆書文首行題云五言同韋子旂神泉詩并序序為雲陽王簿明臺子徐彥伯字光作序後詩三首一為裕明子河間尹元凱字械一為左司郎中溫翁念字敬祖一為天官員外郎李鵬字至遠詩亦六韻垂拱四年戊子四月造趙德父以四年作元年者非韋元旦史稱其兩為縣尉一為東阿一為感義而不及太原尹元凱史稱為瀛州樂壽人而碑云河間地理志云深州有樂壽縣本隸瀛州大歷中來屬則其時樂壽猶屬瀛州也又河間亦屬瀛州元旦等史或不著其字並詳此碑

澤王府主簿梁師曠并夫人唐氏惠兒墓志銘 垂拱四年十一月立四品孫義陽朱賓撰文

五品孫榮陽鄭莊正書在終南山梗梓谷

左領軍衛將軍乙速孤神慶碑 載初二年二月立苗神客撰文釋行滿正書篆額在醴泉叱干村

神慶字昭祐本姓王氏五代祖顯魏時為驃騎大將軍賜姓乙速孤居京兆之醴泉行儼即其子也兩墓相去不十餘步二碑並峙

珍州榮德縣丞梁師亮墓志 萬歲通天二年三月立正書無撰書人姓名在長安百塔寺

思亮字永徽安定烏氏人起家左春坊別教醫生以突厥入寇轉粟功授上柱國修乾陵補隱陵署丞謫授榮德縣丞卒生平無甚著聞可見者如斯而已書者筆蹟工整猶有歐虞遺法文中多用武后新字鄭樵六書略所載為板本所亂以此與契苾明等碑攷之庶得其正云

明堂令于大猷碑 聖歷三年十一月立正書撰書人姓名並缺在三原長坳鄉

其略云公諱大猷字徽本曾祖宣道隨內史舍人左衛率誠安縣開國子皇朝贈使持節都督涼肅甘瓜沙五州諸軍事涼州刺史謚曰獻祖志寧禮部尚書侍中尚書左僕射太子太傅太師上柱國燕國公贈使持節都督幽易媯檀平口六州刺史幽州刺史謚曰定父立政

尚書吏部郎中國子司業太子率更令渠號二州刺史太僕少卿上護軍攷唐書于志寧傳載志寧官爵頗詳於封燕國公後加尚書右僕射同中書門下三品兼太子少師顯慶四年解僕射拜太子太師出為榮州刺史改華州卒贈幽州都督與碑不甚相合宣道贈官與謚亦不及之此並可補正史書缺誤

順陵殘碑 長安二年正月立武三思撰文相王旦正書在咸陽

此武后追尊其母楊氏之碑也今止存三塊得百餘字一在縣署一在縣學一在北原

王璿造象銘 長安三年七月立王無惑正書

高延貴造像銘 長安三年七月立正書

姚元之造像銘 長安三年九月立正書

元之時為鳳閣侍郎與史傳合

李承嗣造像銘 長安三年九月立正書

文云李承嗣為尊親造阿彌陀像一鋪唐時造像皆稱一軀唯此與岱嶽觀馬元貞所造元始天尊像作鋪又軀或作偃以此為異

韋均造像記 長安三年九月立正書

蕭元脊造像記 長安三年九月立正書

梁義深等造像銘 無號年正書

右共九人梁義深李善才楊敬法杜懷敬張光泰林招隱馬元收蘇仁義趙元志皆內官亦應是長安時人故附于此

姚元景光宅寺造象銘 無年月正書以上並在西安府雁塔寺

法門寺千佛像碑 無年月在扶風

碑面作千佛共二十五行行四十象有額額中作釋迦坐象旁二大士侍立不詳何時所造其陰及兩側書涅槃經內日月字作㊟㊟疑是武后時製故附置于此

王三娘坟記 神龍二年二月立正書在西安府城南

比邱尼法琬碑 景龍三年五月立釋承遠撰文劉欽旦正書在西安府學

碑稱高祖景皇帝曾祖故鄭王亮謚曰孝祖神□荆揚并三州刺史大都督襄邑王謚曰恭父德懋少府監宗正卿兵部尚書臨川公謚曰孝以唐書攷之祖名神符也德懋爲刑部尚書碑云兵部者異

許公蘇瓌神道碑 景雲元年十月立盧藏用撰序并隸書張說撰銘在武功

碑文與唐書本傳並合惟神龍初爲尚書右丞後曾封懷縣男碑不及之耳

蕭思亮墓志 景雲二年二月立顏惟貞撰文正書篆蓋在咸寧神禾原

案顏惟貞曾公父從舅氏殷仲容授筆法此志疑卽其所書也唐時墓志篆蓋皆缺此獨存

景龍觀鐘銘 景雲二年九月造庾宗撰文並正書在西安府迎祥觀

馮本紀孝之碑 先天元年十一月立周朝隱撰文子敦直隸書篆額在高陵縣城西

右碑中斷金石家以上截作亳州錄事參軍殘碑下截作紀孝碑者非是

涼國契苾明碑 先天元年十二月立婁師德撰文殷元祚正書篆額在咸陽

明契苾何力之子也碑作河力唐時單干稱可汗其次謂之特勤柳公權神策軍碑所謂大特勤溫沒斯者是也又或作勅勤亦謂之特勒今此作勤與柳書同字形相近必有一誤案北魏書有宿勤明達北史作宿勒其誤與此同

關中金石記卷第二

關中金石記卷第三

鎮洋畢沅撰

唐

馮十一娘墓志 開元三年四月立正書篆額在寶雞縣丞署

案額云唐故馮氏婦墓志之銘題云唐將作監主簿孟友直女墓志十一娘字心河間人也年十九適馮貞祐明年終于洋州興道縣解舍留葬陳倉縣之興平原父母為之立志其略如此此石以乾隆己卯年出土從前金石家所未著錄者

法藏禪師塔銘 開元四年五月立田休光撰正書在長安終南山

兗州都督于知微碑 開元七年六月立姚崇撰文正書在三原

祁國昭宣公王仁皎神道碑 號年缺張說撰文明皇隸書額正書御書二字在同州羌白鎮舊唐書仁皎本傳仁皎以開元七年卒令張說為其碑文元宗親書石焉攷兩書本傳所載並合惟擢將作大匠後轉太僕正卿新書不及之耳碑自歐趙至今從未著錄

贈秦州都督李昭公神道碑 開元八年六月立李邕撰文并行書在蒲城橋陵

俗名雲麾將軍碑與今在順天府解中者自是二物此名思訓順天府解中者名琇並是北海書趙岫曰朱秉器謂良鄉亦有此碑即順天府解本此為趙文敏臨書岫謂此是思訓葬處乃北

海真蹟非文敏所能良鄉本肥媚文敏書無疑朱趙漫不置攷瞽斷可笑今瑋碑已爲柱礎不知何時自良鄉移置府廨思訓碑下截亦爲村人所鑿磨泐不可辨矣

華嶽精享昭應之碑 開元八年立咸廩撰文劉升隸書李休光題額在華嶽廟

李休光舊作光休誤蘇題以是年正月罷相爲禮部尚書碑云舊相尚書許國公與史正合升史作昇有傳

鎮軍大將軍吳文碑 開元九年十月立撰人缺釋大雅集晉王羲之行書在西安府學

明萬歷末浚西安府城濠得此碑于土中移之于學止存半截故俗稱爲半截碑文以鎮軍大將軍行右監門衛將軍則是唐時一內官也文中神龍三年下有所謂唐元年者應是唐隆元年避元宗諱去一字耳

御史臺精舍記并題名 開元十一年立崔湜撰文梁昇卿隸書在西安府學

碑爲昇卿追書題名內有天寶元載云云攷天寶二年始改年爲載題名非一時所爲當亦因追書致誤 題名有三格其上格爲侍御史中爲殿中侍御史下爲監察御史侍御史時謂之臺院殿中侍御史謂之殿院監察御史謂之監院唐時所稱三院者是也 後漢書包咸傳稱咸任東海立精舍講授然則精舍乃講授之地以爲佛寺廬舍始于五臣注任彥昇

表湜蓋本之

京兆總監茹守福墓志 開元十一年八月立正書在咸寧香積寺

池州刺史馮仁□碑 開元十一年十一月立崔尚撰文郭謙光隸書篆額在咸陽長陵西

仁□道士馮道力父也道力與劉成祖占元宗當受命潛布欵誠開元中道力拜銀青光祿大夫冀國公而又拜其父朝散大夫使持節池州刺史文中稱意得元珠謀參黃石同心戴舜以爲天子卽指其事也攷道力以開元十年坐姜皎事配流雷州蓋後一年始立此碑是時詔百官不得與卜祝之人往來而猶有人爲伊父立碑者何耶謙光卽書韋維神道之人

高福墓志 開元十二年正月立孫季良撰文正書在咸寧農家

福字延福武后時中人初爲奚官局丞轉局令再轉宮闈局令兼內謁者監以養子力士貴拜中大夫守內侍上柱國新書力士傳云力士馮益曾孫中人高延福養爲己子因冒其姓又云力士幼與母麥相失後嶺南節度使得之隴州帝爲封越國夫人而追贈其父廣州大都督延福與妻侍養亦與麥均舊書云力士義父高延福夫妻正授供奉與碑稱仿佛皆合力士以誅蕭岑功拜右監門衛將軍碑云大將軍蓋史是唐制左右監門衛大將軍正三品將軍從三品力士之封大將軍在天寶初此時未得稱此也中官以內侍爲最貴內侍拜將

軍自開元以前無之唐六典云中官之貴極于內侍若有殊勳懋績則有拜大將軍者然仍兼本職六典作于是時殆即因此等事言之耳季良名翌以字行會要稱季良以校書郎為集賢院直學士攷集賢院即麗正殿為開元十三年改名是碑題云麗正殿修撰孫翌季良是在院名未改之前可知 此碑向在農家幾為柱礎者數矣乾隆辛丑五月余以二萬錢購得之今移置于靈岩山館

香積寺王淨業法師塔銘 開元十二年六月立畢彥雄撰文正書無姓名在長安香積寺

號國公楊花臺銘楊將軍新莊像銘 開元十二年十月立申屠液撰文正書在咸寧花塔寺

號國公者楊思勗也思勗以開元十二年平單行章進輔國大將軍封號國公像即其時造也是銘為二石前石有序無銘自廿二行乃為銘曰以後但署撰人姓名而無歲月後石有銘無序自十七行以後記開元歲月而無撰人二石實是一物舊分為二者誤也

涼國長公主神道碑 開元十二年十一月立蘇頲撰文明皇隸書在橋陵

公主字華莊始嫁薛伯陽伯陽坐父稷流嶺表改嫁溫彥博曾孫職史于公主傳但及伯陽于溫彥博傳不言改嫁碑則全諱薛事蓋是時薛已配流自殺矣

明皇華山銘殘字 開元十二年十一月立明皇撰文明皇隸書在華嶽廟

今只存駕如陽孕四字駕如者仙駕如聞句也陽孕者陰陽孕育句也碑為黃巢所燬故自歐趙以來不著錄

乙速狐行儼碑 開元十三年二月立劉憲撰文白羲珪隸書并篆額在醴泉叱干村

行儼神慶之子于高宗時為普濟府左果毅垂拱初為黃城府左果毅新唐書地理志不載

二府名未詳所屬碑稱顯慶為明慶避中宗諱改

鄔國長公主神道碑 開元十三年四月立張說撰文明皇隸書在橋陵

公主睿宗弟八女碑云弟七者以安興昭懷蚤死故也公主崔貴妃所生始嫁薛儼又嫁鄭孝義前有子四後有子三碑皆不諱今碑殘缺文載唐文粹甚詳大概皆與史合惟言食邑一千二百戶為稍異耳亦無足重輕也 文有云帝唐降女天乙歸妹用易帝乙歸妹文也天乙者湯之字京房載湯嫁妹之辭曰無以天子之尊而乘諸侯無以天子之富而驕諸侯陰之從陽女之順夫本天地之義也往事爾夫必以禮義者即指其事後世或以帝乙作紂父帝乙者非案王伯厚云子夏傳易荀爽對策並以帝乙為湯不云紂父知古訓同

述聖頌 開元十三年六月立達奚珣撰序呂向撰頌并正書在華嶽廟

頌以述聖名者以元宗有西嶽碑銘因述而頌之也元宗銘曰十有二載孟冬之月步自京

邑幸于洛師停鑿廟下以唐本紀攷之卽十二年十一月庚午如東都事碑云孟冬史云十一月微有異向本傳叙向以開元十年召入翰林院兼集賢院校理擢左拾遺進左補闕帝爲文勒石西嶽詔向爲鐫勒使以起居舍人從東巡元宗之封太山在十三年十一月案孫述有春初送呂補闕往西嶽勒碑詩是向以是年春奉命華山後卽從往太山矣攷會要華嶽碑十三年七月七日成則向之進起居舍人卽以鐫勒功而從太山在七月後更可知又向本傳不及向爲集賢殿直學士趙冬曦傳云冬曦與秘書少監賀知章校書郎孫季良大理評事咸廩業入集賢院修撰是時翰林供奉呂向爲校理踰年並爲直學士此史家互見之例非缺略也但云踰年並爲直學士而集賢院卽以十三年改名此碑立于十三年六月則向之爲直學士獨未踰年矣珣後由御史爲河南尹從祿山爲右相至德二年伏誅趙氏金石錄置此于開元無歲月諸碑內因未見額陰所題故

薦福寺思恒律師碑 開元十四年十二月立常□□撰文正書在咸寧

律師姓顧氏世爲吳郡人曾祖明周左監門將軍祖元隨門下上儀同三司徐無郡開國公使持節洪州諸軍事洪州刺史父藝唐恒州錄事參軍師初授業于持世禪師後參素律師新疏素律師者長安興善寺僧新疏卽所講法華經三萬七千部是也說見西陽雜俎徐無

字並從艸作菘蕪隋書地理志漁陽郡統縣一曰無終縣爲後齊置後周廢徐無縣入焉隋時無徐無郡應是襲周舊號上儀同三司從四品師卒于開元十四年弟子智舟爲之刻石

開元寺尊勝經石幢 開元十六年楊淡立正書在隴州

文中有云諸佛刹土刹今又作刹唐釋元應衆經音義云刹字書無此字卽刹字略也刹音初又作擦音察据此知刹刹二形皆刹之省寫而徐鉉篆刹字以爲說文新附陋矣此幢字畫精整爲唐時第一

敬節法師塔銘 開元十七年七月立正書在咸寧杜永村

興聖寺王尼法澄塔銘 開元十七年十一月立嗣□王志□撰文并正書在咸寧馬頭空

文中有云托事蔣王求爲離俗遂于上元二年出家蔣王太宗子暉也上元中爲箕州刺史書撰人名或云是嗣彭王志暉

比邱尼堅行禪師塔銘 開元二十一年閏三月立正書在西安府城南

代國長公主碑 開元二十二年十二月立鄭萬鈞撰文并行書在橋陵

公主名華字華婉睿宗弟四女萬鈞卽其駙馬都尉也

李澹題名 開元二十四年六月刻正書在華嶽廟

大智禪師碑 開元二十四年九月立嚴挺之撰文史惟則隸書在西安府學
美原縣尉張昕墓志銘 開元二十四年十月立正書在長安劉氏

此與張希古碑並在劉氏乾隆辛丑歲余以二十千錢購得之今攜送於靈岩山館

無畏不空禪師塔銘 開元二十五年八月立正書無撰書人姓名在咸陽窰店鎮廣化寺

文稱不空于師子國從普賢阿闍黎求開十八會金剛灌頂法又稱一日調象俄而群象奔逸不空遽于衢路安坐象至皆頓止跪伏少頃而去二事並見嚴郢所撰大廣智不空三藏碑中故說者謂此無畏不空與大廣智不空卽是一人案大廣智不空以大歷中卒于興善寺此卒于廣化寺爲開元二十三年時地並異不得合而爲一攷開天傳信錄云無畏三藏初自天竺至所司引謁元宗元宗謂曰師來欲何方休息無畏曰臣在天竺時聞西明寺宣律師持律弟一願往依止元宗可之因居焉據此是另爲一人又案大廣智不空本無無畏之名其起塔卽在本院此則瘞于龍門之西山地屬咸陽爲非一人更無疑
比丘尼惠源和上志銘 開元二十五年十一月立楊休烈撰文姪定正書在西安府
碑云師姓蕭氏大父諱瑀父鈇唐書稱瑀好浮屠法問請捨家爲沙門比丘尼法願其女也而惠源又繼之史之言爲不虛矣書本傳瑀有子銳而不及鈇定瑀之曾孫終太子少師

蘇頲題名 開元二十六年八月刻正書在華嶽廟

龍光寺舍利塔記 開元二十八年七月立正書在扶風

祠部員外郎裴頊墓志 開元辛巳歲二月立族叔拙撰文并正書在西安府城南

積唐書附見其祖行儉傳裴光庭之子也獨孤及行狀云積以開元二十九年官終尚書祠部員外郎子四人長曰債次儼次倚季侑與碑文皆合傳只及倩者以倩子均封郇國公餘三人皆無可表見故也

夢真容勅 開元二十九年六月立蘇靈芝正書在蓋屋會靈觀

此非唐原碑乃後人重刻者碑首有重摸蘇靈芝書唐老君應見碑十二字可證

持進莒國公唐儉碑 正書篆額在醴泉小陽村

案金石錄云開元二十九年儉曾孫追立儉史以爲字茂系今碑云茂約儉子史在儉傳以爲名善識在豫章公主傳以爲名茂識今碑云名尚識皆當以碑爲正

大智禪師碑陰記 開元二十九年立陽伯成撰文史惟則隸書在西安府學

陽伯成文苑英華作楊伯成

褒封四子勅 天寶元年二月立正書在蓋屋樓觀

涇川堂叢書

關中金石記二

五

四子卽莊子列子文子庚桑子也是時加莊爲南華真人列爲冲虛真人文爲通元真人唐桑爲洞靈真人其所著書並號真經而不知庚桑卽爲僞書蓋明皇好讀道書而人卽造僞以邀功若此

告華嶽文 天寶元年四月立韓賞撰文韓擇木隸書在華嶽廟

擇木自署榮王府司馬者是時靖共太子改王榮故也賞名見御史臺精舍記及郎官題名石柱

老子靈應頌 天寶元年七月立戴旄撰序劉同昇撰頌戴旄隸書在蓋屋

此刻宗聖觀記之陰其隸體與史惟則大智禪師碑同或是惟則代爲之者耶

吏部尚書南曹石幢 天寶元年九月立左光允撰序尹匡祚撰頌正書在鄂縣州堂寺

後有奉爲太尉降生令月特建立吉祥尊勝經幢上巖台算貞明二年七月十一日建討擊使張虔斌暨立行

隆闡法師碑 天寶二年十二月立正書無撰書人姓名在西安府學

文有云弟子大溫寺主思莊敬想清徽勒茲元琰疑卽其所撰書

薛良佐塔銘 天寶三載閏四月立再從兄鈞撰文弟良史正書在終南山

石臺孝經 天寶四載九月立明皇注并隸書太子臣亨篆額後有李齊古上石臺告成表及

批荅並行艸書有李林甫等題名正書在西安府學

明皇序文云韋昭王肅先儒之領袖虞翻劉邵抑又次焉劉炫明安國之本陸澄譏康成之注案陸德明孝經音義有孔安國鄭康成王肅韋昭劉邵而無虞翻劉炫陸澄陸譏康成而據之爲注是明皇不宗鄭學者矣唐書藝文志有今上孝經制旨一卷應卽是書李適之本傳載適之爲刑部尚書不及兵部封清和縣公不及渭源縣公席豫封襄陽縣男而本傳以爲縣子皆新史之缺譌悉當以碑爲正者也碑末林甫等臣名共四十五人

逸人竇居士碑 天寶六載二月立李邕撰文段清雲正書范岌題額在三原橋頭鎮

居士名天生有三子俱爲宦官長處賓次思賓次元禮元禮行內侍省內侍加銀青光祿大夫官最顯碑末有元涇陽縣尹姚遠禮重立題名

義興周夫人墓志 天寶六載十月立正書在長安農家

文有云岳也匪才忝爲序述則撰志者名也逸其姓此碑近爲山西汾陽某氏攜去

陀羅尼經幢 天寶七載二月立正書在咸寧開元寺

後有駱齊休重建跋

陀羅尼經幢殘本 天寶七載三月立蔣圖撰文張賁行書在咸寧

尊勝陀羅尼經幢 天寶七載五月立張少悌行書在長安崇聖寺

千福寺多寶佛塔感應碑 天寶十一載四月立岑勛撰文顏真卿正書徐浩題額在西安府學

恒農先賢積慶之碑 天寶十二載八月立明皇撰文并隸書皇太子亨篆額在扶風

此卽贈武部尚書鄭國公楊珣碑也碑並隸書惟御製御書及皇太子題額等字正書珣字仲珣國忠父唐書宰相世系表以珣爲友子與此碑云烈考志謙者異

○志廉墓志 天寶十三載六月立申堂構撰文韓獻之行書在長安農家

此碑向在農家乾隆四十三年余以數千錢買之今移置靈巖山館庶免村童敲火牧牛礪角之苗也

施燈功德幢 天寶十三載立正書在長安香積寺

張希古墓志 天寶十五載立田穎行書在長安劉氏

碑載府君字希古不言其名曾爲馬邑郡尚德府折衝都尉馬邑卽朔州唐書不及府名亦可以補史之缺

金仙長公王神道碑 號年缺徐嶠之撰文明皇行書在橋陵

唐書本傳云太極元年與玉真公主皆爲道士碑云丙午歲度爲道士丙午歲者神龍二年也兩說不合

尹尊師碑 無號年員半千撰文隸書不詳姓名此係元時重刻

華嶽廟碑殘石 號年缺權僊文杜繹分書

右碑石分爲三存一百七十七字文不可讀惟僊文繹書數處可辨攷金石錄有禹傳卽僊所撰文當開元二十五年又宰相世系表以爲卽德輿之祖故附置于此書法類蔡有鄰

主簿常冀尉元撝殘碑 分書並在華嶽廟

碑只存六行共三十四字不可句讀惟簿尉二名可識又有史子華刻字字樣史子華者卽刻大智禪師之碑者也故附置于此

艸書心經 無號年

刻後有跋指爲右軍非也王世貞以爲是鄭萬鈞書卽張說爲之序者說文見唐文粹

千字文斷名 無號年張旭艸書並在西安府學

顏魯公題名 乾元元年十月刻正書在華嶽廟周天和碑之側

碑題曰皇唐乾元元年歲次戊戌冬十月戊申真卿自蒲州刺史蒙恩除饒州刺史十有二日辛亥次於華陰與監察御史王延昌大理評事攝監察御史穆寧許事張澹華陰令劉暉王簿鄭鎮同謁金天王之神祠顏真卿題記以唐書本傳及留元剛年譜攷之公以肅宗二年十一月出爲馮翊太守三年三月改蒲州刺史十月又改饒州刺史也其貶饒州爲唐旻所誣因亮行狀曰天寶十五載元宗以公爲戶部侍郎依前平原太守充本郡防禦使公以景城長史李暉爲副前侍御史沈震爲判官又詔公爲河北採訪處置使公又以前成陽尉王延昌爲判官張澹爲友是年秋祿山遣將史思明尹子奇等併力攻河北諸郡前後百餘日饒陽河間景城樂安相次而陷所存者平原博平清河三郡而已人心潰亂不可復制公乃將麾下騎數百棄平原渡河取路朝肅宗于鳳翔初公之未渡河也謂判官穆寧張澹曰賊勢旣爾若委命待擒必爲所快心今計經赴行在公以爲何如寧澹與諸將然之遂行朝廷除公爲憲部尚書令狐峒神道碑曰時前殿中侍御史沈震鹽山尉穆寧武邑丞李銑清河王簿張澹各行器能叅贊成務此王延昌穆寧張澹等與偕之所自來然攷穆寧傳寧以明經調鹽山尉祿山反寧募兵斬僞景城守劉道元聞真卿拒祿山卽馳謁謂曰我可從公死旣而賊攻平原寧勸固守真卿不從夜亡過河見肅宗行在帝問狀真卿對不用寧言以至

此帝異之召寧將以諫議大夫任之會真卿以直忤旨寧亦罷上元初擢殿中侍御史與行狀寧澹與諸將然之之說有不合則當以史爲正者矣年譜曰是年九月有祭姪季明文十月有華嶽廟題名至東京拜掃有祭伯文豪州刺史文

張惟一祈雨疏 乾元二年二月刻李權隸書

書史會要李權唐宗室李平均叔也工八分官金州刺史惟一名見宰相世系表

王宥等謁岳祠記 上元元年十二月刻題名隸書號年篆書並李樞書

樞李權弟述書賦注云李權淮安王神通曾孫工八分弟樞工小篆內有處士王季友卽杜甫所稱鄴城客子是也豫章圖經云季友鄴城人家貧賣履博極群書李勉引爲賓客甚敬之

太州別駕題名殘字 無號年正書

案文只存十三字云正議大夫太僕少卿兼太州別駕攷華州以上元二年改名太州則此爲肅宗時人所題矣

邱據謁嶽廟題名 寶應二年六月刻正書並在華嶽廟

贈工部尚書臧懷恪神道碑 廣德元年冬十月立顏真卿撰文并正書李秀巖□□在三原

九陂城

魯孝公子彊字子臧他書不見惟春秋左氏傳孔穎達正義言之是承杜預公子譜舊說耳
 今碑亦云又文苑英華載李邕左羽林大將軍臧公神道碑文云其先派于后稷演于周公
 洎魯孝公子臧因而氏焉說亦與此同懷恪少隸戎級起官拜勝州都督府長史轉左衛率
 府左郎將再轉右領軍中郎將兼安北都護中受降城使朔方五城都知征馬使充都知兵
 馬使河西軍前將河源軍使兼隴右節度副大使關西兵馬使拜右武衛將軍封上蔡縣開
 國侯薨贈右領衛大將軍又贈魏州刺史三贈太常卿四贈工部尚書有七子長曰希崇游
 擊將軍崇仁府折衝次曰希昶豐州別駕贈宋州刺史三曰希忱左武衛將軍朔方節度副
 使贈太子賓客四曰希情右衛左郎將劍南討擊副使贈汝州刺史五曰希景右驍衛郎將
 靜邊軍使贈秘書監六曰希晏寧州刺史左金吾衛將軍贈揚州大都督七曰希讓開府儀
 同三司行太子詹事兼御史大夫邠寧山南觀察使集賢待制工部尚書渭北節度使魯國
 公希讓官最顯父以子貴故得贈工部尚書也懷恪有二兄文中所稱兄左羽林軍大將軍
 平盧副持節懷亮未知居何行也又稱兄子謙亦未知為何人之子又元和姓纂以希讓為
 懷亮子據碑可証其誤

李懷讓題名殘字 無號年正書

右只存三行每行七字共二十一字首行云軍兼同華兩州節次行云卿使持節華州諸三
 行云丞上柱國汧國公攻唐常袞華州刺史李公墓誌銘云公諱懷讓以佐命功特授鎮國
 大將軍加特進兼鴻臚卿封汧國公充潼關鎮國軍使同華等州節度使華州刺史以廣德
 元年九月薨于華州軍府詔陪葬建陵則此乃懷讓題名也再攷唐會要叙陪陵名位建陵
 只及汾陽王郭子儀一人而無懷讓應為缺略懷讓薨于廣德改元故附置于此

韋朐題名 廣德二年二月刻正書

題云銀青光祿大夫太常卿使持節延州都督侍御使上柱國岐陽縣開國男韋朐以廣德
 二年二□□七日越自師旅將詣朝廷云云者以是時僕固懷恩叛也韋君不詳其名

劉士深謁華嶽廟記 廣德二年三月刻正書

內有李逖李迪李遙李遠四人名宰相世系表俱有在東祖李氏下

孫廣題名 廣德二年六月刻正書並在華嶽廟

太保和國公廟碑并碑陰 廣德二年十一月立顏真卿撰文并正書隸額在西安布政司

公名敬之漢光祿大夫廣意之後廣意世系表作廣智碑載子儀官爵甚詳大略與史傳合

史稱振遠軍使即單于副都護九原太守即兼豐州都督也又通鑑稱是年十二月拜尚書令此碑建於十一月即稱尚書令者應是碑陰後書及之也傳稱武舉及弟授左衛長史應依碑作長上碑載子儀兄弟七人孫十五人曾孫二人孫除子儀子八人外曄是子琇子昕煦暉幼明子昉曉幼賢子暉子瑛子曾孫銳是曜子銑是映子

臨淮武穆王李光弼神道碑 廣德二年十一月立顏真卿撰文張少悌行書在富平縣學與郭僕射書 顏真卿撰文并神書在西安府學

碑不著號年金石錄附于大歷之末余攷宋留元剛年譜代宗廣德二年十一月有與郭僕射書則附大歷者誤也碑或以為宋永興守吳中復所刻或以為安師文刻未詳孰是李仲昌等題名 廣德□年三月刻韋瀚正書

宰相世系表云瀚官昭應令案此云行華陰縣丞同正當在未為昭應令之先又有云行尉崔頊表以為適終同州刺史

韋瀚題名 無號年並在華嶽廟

秋官尚書河間公之碑 永泰元年二月立撰書人姓名並缺隸書篆額在高陵鹿臺鄉贈太子賓客白道生神道碑 永泰元年三月立于益撰文篆宗正書并篆額在咸寧鳳栖原

道生南陽郡王元光之父官終左衛大將軍追贈太子賓客夫人康氏為趙國太夫人唐書元光傳以為終寧朔州刺史者非也

焦緩題名 永泰七年春刻正書在華嶽廟

光祿卿王訓墓志 大歷二年八月立嗣澤王惠撰文并正書在咸寧涇川原

訓字訓瓊和臨沂人永穆大長公主之仲子定安長公主之孫永穆尚王孫繇同皎子也定安尚同皎訓後尚博平郡主官至光祿卿卒葬於涇川原其閥閱世系如是惠義珣之子見宗室世系表

三墳記 大歷二年立李季卿撰文李陽冰篆書

文有云下土得漑者用宋玉九辯文也漑玉篇以為即古文乾字以講陰堂講從葍聲與構字通史記漢書凡構解字多作講亦是也鄧字見魏張猛龍碑及周華嶽廟頌嵩少字應即用崇見于漢書而竟作嵩劇甚字應用勳見于漢隸字原而竟作劇猶字應從允作燭而從犬作猾禮字應從豐作禮而從豐作禮徹字從青作徹斷字從豸作斷焯字作焯執字作藝昇字作昇皆其不合于六書之正者也又說文無第字只作弟而孔穎達正義引以為從竹從弟說文無莅字只作埭故鄭康成注儀禮每讀位為莅此竟有第字莅字蓋後人隸寫之

譌而以之作篆則尤謬也

拓先塋記 大歷二年立李季卿撰文李陽水篆書並在西安府學

陽水書結體茂美而多乖于六書之義然蔡邕石經已多別體豈書家多不究小學耶文中

若零從案碑作粵高從口讀如碑下口從口口舌囂碑作囂龕從含碑省從合棲或作西碑

合作栖樊中從爻碑從夕佐古只作左碑加人岡碑譌作峒勢古只作執見漢書碑加力宜

從夕碑從因隧古只作隊見竹書穆天子傳碑作隧輻碑作輻藏古只作臧詩中心臧之先

儒有藏臧二義碑作藏悅經傳多作說碑作悅版加作版皆詭于文字之正若泉作泉借洎

字為之改從已借效改字為之寶作瑤案瑤字見竹書穆天子傳玉篇引聲類亦曰古文瑤

字此或古人省文借字之法猶未大失也篆者聖人不虛作非可依隸以造昔徐鉉作說文

新附識者多譏其謬獨怪陽水自言斯翁之後直至小生又欲求刻石經立于大學而不究

小學如此倘任鴻都之役未見其勝於張參唐元度諸人也 是碑宋大中祥符三年重刻

贈營州都督薊郡公李楷洛碑 大歷三年三月立楊炎撰文史惟則八分書在富平縣西北

覓子店

楷洛太尉光弼之父漢李陵之後裔也累官左羽林大將軍封薊郡公加雲麾將軍唐書附

見光弼傳

弟五琦題名 大歷五年六月刻正書

文云前相國弟五公自戶部侍郎出牧栢州蓋坐與魚朝恩善貶也又云子婿虞當子婿之

稱自此始婿作聶者干祿字書云聶聶壻上俗中通下正婿一變為壻再變為垣二變為聶

四變為聶皆由胥變為冑致誤又葺或亦寫作莒故月耳相溷

裴士淹題名 大歷五年六月刻正書

士淹之出亦坐朝恩黨見唐書朝恩傳

蘇敦兄弟題名 大歷五年六月刻正書並在華嶽廟

宰相世係表蘇氏河南尹震有七子敦發敦政儼此云汝州司馬敦弟華陰縣令發弟

咸陽縣王簿敦弟前華原縣丞徹弟太常寺王簿徹弟吏部常選敦弟少府監王簿敦弟儼

不同者敦疑即是敦有敦不應後有敦也政疑即是敦字形相近此等要當以碑為正

金吾衛將軍臧希晏神道碑 大歷五年十月立撰人缺韓秀弼隸書篆額在三原長切鄉

諸道石刻錄云張孚撰文

盧綸題名 大歷六年二月刻正書在華嶽廟

永仙觀王田尊師碑 大歷六年十月立蕭森撰文□名德集晉王羲之書

永仙觀王田尊師德行之碑 號年及撰人缺□光書并篆額並在富平美原鎮

相傳美原鎮為真人拔宅上昇處故後人立碑于此碑甚磨泐號年莫可攷故附置于此

佛頂尊勝陀羅尼幢銘 大歷六年十月立僧普真撰文康玠行書在富平六井

李昌謁嶽廟題名 大歷六年刻正書

郎仲堅題名 大歷七年正月刻正書

侯季文題名 大歷七年三月刻正書

題內有開州刺史崔微男漑等名宰相世系表云微河南少尹漑太常少卿

韋憑題名 大歷七年十月刻正書

元澄題名 大歷八年十二月刻正書

題內有大理評事盧恒宰相世系表云恒殿中侍御史

謁華嶽廟碑 大歷九年季春立盧朝徽撰文並正書

李謀題名 大歷九年十月刻正書並在華嶽廟

其部尚書王忠嗣神道碑 大歷十年四月立元載撰文王縉行書趙基篆額在渭南鄉賢祠

載忠嗣塔也史稱忠嗣與皇甫惟明輕重不得貶東陽府左果毅為李林甫所惡貶漢陽太守碑皆不及之舊唐書叙載縉官爵較詳亦無載封潁川郡公縉太微宮使齊國公事是史碑兩失之可互証而兩得之者也崇元館本崇元學天寶二載置大學士一人以宰相為之領兩京元元宮及天下道院攷嵩陽觀聖德感應頌石臺孝經李林甫陳希烈等題名並同新史百官志及縉本傳並稱為崇賢館者誤

真化寺尼如願律師墓志 大歷十年七月立沙門飛錫撰文秦昊正書在咸陽畢原

志作于大歷十年七月文有云貴妃獨孤氏弟子長樂公主獨孤氏者代宗妃也于是年十月薨追冊為皇后長樂公主即肅宗女宿國公主

慈州刺史王履清碑 大歷十二年二月立侯冕撰文正書姓名缺在高陵奉正原

高力士神道碑 大歷十二年五月立行書在蒲城

無憂王寺大聖真身寶塔碑銘 大歷十三年四月立張彧撰文楊播正書篆額在扶風法門寺

困學紀聞曰舊史德宗紀貞元六年岐州無憂王寺有佛指骨寸餘先是取來禁中供養二月乙亥詔送還本寺此迎佛骨之事也韓愈傳云鳳翔法門寺有護國真身塔內有釋迦文

佛指骨一節寺名與前不同閻若璩駁之曰法門寺即無憂王寺紀載非一手故其名互異說非也

上官沼題名 大歷十三年七月刻行書在華嶽廟

宰相世系表有上官詔當即其人宜從碑作沼為是

贈揚州大都督段行琛神道碑 大歷十四年閏五月立無撰文人姓名張增正書李同系篆額在汧陽

額在汧陽

行琛忠烈公秀實父也金石錄又有一碑為楊炎撰文蕭正正書在大歷四年却無此碑標

題揚州字作楊攷開成尚書石經淮海惟揚州字亦從木則是時兩字通用矣

孔子廟殘碑 程浩撰文顏真卿正書在華州

此文浩以大歷二年作於扶風魯公會書此于湖州華州有之非也疑後人偽作

關中金石記卷弟三

關中金石記卷弟四

唐

鎮洋畢沅撰

顏氏家廟碑

建中元年七月立顏真卿撰文并正書李陽冰篆額在西安府學

此即俗呼為四面碑者是也其額陰為齋堂記

魯公世系

唐書無顏氏世系表今以此碑所叙及唐書本傳並師古臬卿傳晉書欽傳北齊書之推傳攷定附載於後

盛字叔臺魏欽字公若廣默字靜伯汝含字宏都晉髦字君道東綝字文和

青徐二州刺陵太守給事陰太守襲葛侍中右光祿晉侍中光祿

史關內侯 中葛纒貞子纒子 大夫西平漢勳西平定侯

因亮云始自 因亮云始自

魯國居鄆邪 鄆邪居丹陽

謙安成太守

靖之字茂宗勝之字宏道炳之字叔豹

宣城太守御巴陵太守度輔國江夏王

史中丞

支校尉

參軍

遷殿中侍御史為東都採訪判官

八載之八月也魯公家譜以五月非是從行狀

再轉武部員外郎

行狀遷殿中侍御史後九載又遷侍御史本傳缺故云再轉年譜云判南曹

出為平原太守

公之為平原在天寶十二載年譜于十四載下又云轉兵部員外郎公既以武部員外郎

出為平原不得于此再轉兵部且兵部即武部也年譜悞

拜戶部侍郎

碑銘云再領平原行狀云元宗以公為戶部侍郎依前平原太守充本郡防禦使

加河北招討採訪使 拜工部尚書兼御史大夫復為河北招討使

碑銘云拜工部尚書兼御史大夫採訪招討等使如故

授憲部尚書遷御史大夫

家譜云肅宗至德二載四月授憲部尚書六月兼御史大夫行狀云至德元載授憲部尚書二載正月兼御史大夫其日月不同年譜從家譜

出為馮翊太守 轉蒲州刺史封丹陽縣子

行狀云改蒲州刺史充本郡防禦使封丹陽縣開國子食邑一千戶

貶饒州刺史

碑銘行狀云乾元元年貶饒州二年拜昇州本傳不及昇州誤

拜浙西節度使

行狀云充浙江西道節度使兼宋亳都防禦使年譜云充浙江節度使兼江寧軍使江寧

乾元元年為昇州

名為刑部侍郎

碑銘云追拜刑部侍郎進爵縣公

貶蓬州長史 起為利州刺史不拜遷吏部侍郎除荆南節度使未行改尚書右

丞

碑銘云移利州刺史徵拜戶部侍郎轉吏部侍郎加銀青光祿大夫充荆南節度觀察使

行狀云加銀青光祿大夫上柱國其移利州在寶應元年五月戶部十二月改吏部二年

三月除江陵尹充荆南節度八月轉尚書右丞十月傳叙次不甚明白

以檢校刑部尚書爲朔方行營宣慰使未行畱知省事更封魯郡公

行狀云廣德二年正月除檢校刑部尚書兼御史大夫朔方行營汾晉等六州宣慰使尋

罷前命唯知刑部尚書事三月進封魯郡開國公食邑三千戶碑銘云食邑二千戶稍異

貶峽州別駕改吉州司馬遷撫湖二州刺史

行狀云大歷三年遷撫州七年除湖州

擢刑部尚書進吏部充禮儀使

年譜云大歷十二年八月爲刑部十三年二月進吏部家譜以爲十二年十二月進吏部

換太子少師領使

行狀云授光祿大夫遷太子少師依前爲禮儀使

改太子太師

年譜云罷其使

薨贈司徒諡文忠

碑銘云興元元年八月三月薨于蔡州之難貞元二年十一月歸葬冊贈上公諡曰文忠

行狀云貞元元年八月二十四日希烈幽殺之年譜從行狀本傳云年七十六年譜云年

七十七異者傳用碑銘不從行狀故也案公以大歷十三年爲刑部尚書時年七十三抗
章乞致仕不允後薨于貞元元年當是七十七傳非也

大秦景教流行中國碑 建中二年太簇月立僧景淨撰文呂秀巖正書并題額在西安府崇
聖寺

大秦卽梨軒說文作麗軒漢書西域傳所稱梨軒條支臨西海者是也後漢書云以在海西
故亦云海西國水經注恒水又逕波麗國是佛外祖國也法顯曰恒水東到多摩梨軒國卽
是海口釋氏西域記曰大秦一名梨軒道元之據此蓋以梨軒爲卽波麗矣攷條支卽波斯
國魏書云地在忸密之西東去梨軒猶一萬里長安志義寧坊有波斯寺唐貞觀十二年太
宗爲大秦國胡僧阿羅斯立應是大秦僧人入中國之始合之碑則云于義寧坊造大秦寺
兩國所奉之教略同故寺名通用耶阿羅斯碑作阿羅本當是敏求之誤

大辨正廣智三藏不空和尚碑 建中二年十一月立嚴郢撰文徐浩正書在西安府學

吳岳祠堂記 興元元年十月立于公異撰文冷朝陽行書在隴州岳祠內

碑云相國涼公鎮鳳翔者李抱玉也是時副元帥李晟復京師德宗至自興元晟至鳳翔斬
叛卒王斌等及涇帥田希鑿卽以其年十一月祭告吳山公異爲掌書記撰此文

崔漢衡題名 興元元年十二月刻盧倣隸書在華嶽廟

題云守兵部尚書博陵郡開國公唐書載漢衡官爵甚詳不言封博陵郡公亦是缺略婁機漢隸字源云漢樊毅復華下民租碑唐興元中華陰縣令盧倣求得而為之記八分書于碑末即此人

顏魯公奉命帖 留元剛年譜以為興元元年行書在同州府學

右碑上刻書下刻像中則宋唐重跋也云觀此筆蹟不題歲月以事實攷之蓋使李希烈時也至貞元元年八月丙戌公不幸遇害困躓賊庭者踰二年案魯公以興元元年奉使貞元元年八月廿四日死難唐書本紀以為八月丙戌獨行狀以為興元元年者非跋為靖康元年七月作

韋綬等題名 貞元元年二月刻正書在華嶽廟

唐書韋綬傳綬字子章京兆萬年人建中中為長安尉朱泚亂羸服走奉天拜華陰令案唐有兩韋綬一為韋貫之兄非此人

尊勝陀羅尼經幢 貞元五年八月立郭謂正書在乾州

李元諒懋功昭德頌 貞元五年十月立張濛撰文韓秀弼隸書李彝篆額在華州治大門外

元諒本姓安氏出自武衛大將軍興貴文稱武衛巨唐之爪牙者即此元諒為潼關鎮國軍隴右節度使檢校尚書右僕射兼御史大夫華州刺史武康郡王唐書以為檢校尚書左僕射者非也文中云陛下薄狩郊甸爰幸巴梁何望之壑掘咸林敬缸窺覩蒲坂者謂德宗幸奉天朱泚將何望之等襲華州刺史董晉弃城走元諒自潼關引兵拔其城是也云進次昭應稟命于副元帥之軍列屯光泰分援于尚可孤之壘者謂尚可孤以襄鄧兵五千次藍田元諒屯昭應賊兵不能踰渭是也時李晟為京畿渭北商華兵馬副元帥云姚令言望旗而潰張光晟弃甲而奔賊泚憂窮竄死真寧者謂賊將姚令言與晟兵遇十閉皆北張光晟以精兵壁九曲距東渭橋密與晟約降泚引殘軍西走至寧州為朱惟孝等所斬是也時元諒與渾瑊尚可孤等皆從晟軍云李懷光阻河距命陛下特詔攻圍重鞠戎旅者謂懷光反元諒與馬燧渾瑊韓游瓌等進討也懷光將徐廷光素易元諒侮斥其祖父元諒與游瓌約即日斬之所稱才殲當道之豺且蹠吠籬之犬者應指此云藩戎匿詐求和諸軍畢會是獨沉疑陳其不誠請以為備者謂吐蕃請盟詔元諒軍潘原韓游瓌軍洛口援渾瑊會平涼盟吐蕃劫盟事也云距平涼二十里所柵為壁塹為壕設晉師敖前之伏修楚臣勁後之殿皆與史本傳合此貞元三年事也蓋更隴右節度即在其時云依其制度峻以規模役不二旬隱

然岳立乃修廬井乃闢田疇者則元諒修治良原隍堞闢田數十里使士卒墾治諸事水經注曰河水自潼關東北流水側有長坂謂之黃巷坂潘岳西征賦溯黃巷以濟潼今二書巷皆作卷此云北連繹臺南抵黃巷可以証其誤矣碑在華者華人思其功請于朝故作此頌也 文苑英華有任華送李彝宰新都序云宗室後進有以學術辭藻著稱者彝也少好學通九流百家之言善屬文有大節名試西掖與莊若訥高郢同入高等執政以彝大人在蜀故授新都以榮之 文內有行軍司馬董叔經攷唐書藝文志博經一卷貞元中董叔經上墨池編云唐開汾河記董叔經書卽此人

姜嫄公劉廟碑

貞元九年四月立高郢撰文張誼行書張綰篆額在邠州廟內

文中有云邠寧節度觀察使檢校刑部尚書兼御史大夫邠寧郡王張公獻甫戎醜是膺授鉞而至肅肅王命惟公將之蓋卽指獻甫代韓游瓌領節度邠寧事唐書稱獻甫從渾瑊討朱泚累遷至金吾將軍檢校工部尚書不及刑部爲邠寧後加檢校尚書左僕射不及封邠寧郡王並史之缺誤當從碑爲是

參軍事裴潏等題名

貞元九年七月刻潏行書在華嶽廟

潏河東聞喜人善隸書唐書有傳宣和書譜云潏隸書爲時推重晚歲行艸尤勝攷潏以蔭

起家此稱參軍事而不著地當卽是華州諸參但未辯何司耳題內又有盧渚盧佩渚名見宰相世系表佩名見河東記

東陵聖母帖

貞元九年釋懷素艸書宋元祐戊辰歲刻

聖母晉康帝時人其得建號爲東陵聖母者以其主食江淮故也禹貢導江過九江至于東陵漢書地里志廬江郡金蘭西北有東陵鄉者是也王松年仙苑編珠曰聖母杜氏妻也學劉綱術坐在立亡杜氏不信誣以姦淫告官付獄聖母入獄卽從囚中飛出入雲中而去與帖所云正合聖母自晉迄隨無不崇奉至唐尤甚此帖書于德宗時文稱皇從叔父淮南節度觀察使禮部尚書太原郡公而不署名蓋指建立祠宇之人案其文義當在廣陵郡地帖蓋宋時以墨本摹刻者後有柳槃柳乘裴休同登題名

藏真律公二帖

無號年釋懷素艸書宋元祐八年九月安宜之刻有游師雄跋並在西安府

學

後有宋人題名蓋亦以墨本鈎摹者藏真懷素字也文云所恨不與張旭長史相識近于洛下逢顏尚書真卿自云頗得長史筆法攷今世猶有魯公傳長史十二筆法記與帖所云正相合然則爲後人依托爲之者是非矣

杜府君夫人韋氏墓志 貞元十年八月立李宣撰文姪成均行書在西安府寺坡
杜君名濟官至京兆尹

諸葛忠武侯新廟碑 貞元十一年二月立沈迥撰文元錫正書在沔縣

文稱貞元三年府王左僕射馮翊總師者謂舒王謨為荆襄江西沔鄂節度諸軍行營兵馬
都元帥也錫字君貺見世系表

鄭全濟題名 貞元十三年三月刻正書在華嶽廟

內有華陰尉鄭暉世系表有之

澄城令鄭君德政碑 貞元十四年正月立陳京撰文鄭雲達正書姜元素篆額在澄城縣南
門祠內

鄭君字叔敖泐其名案文中有云詔京銘紀左馮翊澄城令鄭楚相功德于其理所之南門
則其名為楚相矣京字慶復官至秘書少監集賢學士見柳宗元行狀

劍州刺史李廣業碑 貞元二十年十一月立鄭雲達撰文并正書在三原北原

楚金禪師碑 貞元二十一年七月立沙門飛錫撰文吳通微正書後附奉勅追諡號記在西
安府學

尉旻題名 元和元年正月刻正書

謁華嶽廟詩 元和元年十月賈竦作并正書後有太和六年四月竦姪琬重修題名

竦賈餗兄據宰相表則竦官著作郎也無姪琬名可以補史之缺

郭豐等題名 元和元年十月刻崔杲正書

題內有門下典儀李誠明門下典儀者門下省屬官也

柳開等題名 元和四年九月刻行書並在華嶽廟

開時為華陰令宰相世系表開官至侍御史

保唐寺毗沙門天王燈幢贊 元和七年五月立柳澈撰文并正書在咸寧

盧宏正毗沙門天王記云毗沙門天王者佛之臂指也左扼吳鉤右持寶塔其旨將以摧羣
魔護佛事在開元則元宗圖像于旗章在元和則憲宗交神於夢寐據之則是時正崇奉其
教也

張鄂等題名 元和八年四月刻行書在華嶽廟

佛頂尊勝陀羅尼經 元和八年八月女弟子那羅延建正書在西安府儒學

唐刻此經甚多惟此為沙門不空所譯首云曩謨即今所云南無也或稱曩莫並同縛音无

可反者春秋左傳音義釋其縛舊音扶臥反扶臥與无可同也扼音尼整反者如叭呢之呢二合呼為納銘銘整聲相同故也其作譏即與揭同賀即與呵同其稱娑婆呵為娑嚩賀攷古本無婆字此故以嚩為婆此釋氏對音之法亦不謬于古人音讀之正者也釋家書多于字旁加口此咒誦之說也如嚩字之類道家書多于字上加雨此符籙之說也如覓字之類見宋陳景元上清大洞真經玉訣音義所謂出唐史崇一切經音義者是也唐時有兩一切經音義僧元應所著者為釋書音義史崇所著者為道書音義兩書引據多古書雖為二氏之學其于博雅猶不遜陸德明經典釋文余每欲合而刊之以供同好也菩薩二字皆以艸受名本日菩提薩埵華言之曰覺有情也其薩即薩字唐元應一切經音義云菩薩本作扶薛宋張有復古編亦云薛別作薩非唐人書薩猶作立下主此碑亦然自宋以後乃改從產形矣古無那字即那字也說文云安定有朝那縣今朝那之那亦作那今那讀如含反那讀諾何反居然分為兩字此刻那羅字體作那猶不失古人之意唐劉晏云字唯朋字不正蓋朋之古篆為勑依形而書勢不能不稍存歛仄今人則皆正書之矣如那字例得正書今人則反作歛仄之形唐人去古未遠于本字之義猶可近求故能不戾于古人若是

鄭公幹題名 元和八年十月刻正書

李紳題名 元和八年刻正書

王高題名 元和八年口月刻正書並在華嶽廟

內侍李輔光墓志 元和十年四月立崔元略撰文巨雅正書在高陵

碑云輔光為河中監軍使者蓋監張宏靖軍也巨雅元略之弟巨雅曾為晉州司法元略又

官于中都故撰書此志以記功德

崔旆鄭公幹題名 元和十年五月刻正書在華嶽廟

大德塔銘 元和十二年八月立沙門文湜撰文王叔清正書在西安府城南

秘書丞韓常謁華嶽廟記 元和十二年十月刻韋泰正書

宰相世系表常官至岳州刺史

容府口口題名殘字 元和十四年正月刻正書

宗室世系表有容府經略推官李慶之容府經略使左庶子李景仁容府者即容州都督府

也屬嶺南道

張常慶題名 元和十五年七月刻正書

經言堂叢書

關中金石記四

王播題名 元和十五年十一月刻正書並在華嶽廟

題云起居舍人賜緋魚袋王播攻憲宗初有王播字明敷封太原郡公以元和四年卒非此人唐書王播傳璠字魯玉元和初舉進士宏辭累遷監察御史以起居舍人副鄭覃宣慰鎮州長慶未擢職方郎中則此即王璠無疑

雲麾將軍朱孝誠碑 長慶元年二月立蘇遇撰文曹郢行書并篆額在三原

孝誠字孝誠京兆三原人弱冠入侍為局丞轉宮闈局令再轉為謁者監遷內給事守內常侍加寧遠將軍上柱國其稱忠武軍監軍使者以李光顏為忠武軍節度孝誠常監其軍也以元和十五年卒文有云元和初張伯靖負固叙州嘯聚蠻落公銜命于倣擾之際撫諭于溪洞之中者謂六年伯靖寇播費二州事也以八年為崔能嚴綬潘孟陽柳公綽等所破降云元戎授鉞問罪淮西恩加朝散大夫內侍省内給事以護許軍者謂九年吳元濟自稱知軍事詔嚴綬李光顏李文通烏重允合軍討之也云是歲李師道遣逆窺竊近郊憲宗移司空公光顏鎮守滑臺以行天討兩道全師委公監撫收斗門下臨濮皆公之力者謂十三年光顏徙義成節度使帥陳許兵攻師道于濮陽拔斗門杜莊二屯事也其為監軍即在其時又云出入四朝則其入侍之初猶在代宗時也

鄭簡之題名 長慶元年二月刻行書

裴穎修嶽廟中門紀石 長慶元年刻張從本正書並在華嶽廟

宰相世系表穎衛尉卿駙馬都尉

邠國公功德銘 長慶二年十二月立楊承和撰文并正書陸邛篆額在西安府學

邠國公者中人梁守謙也韓愈平淮西碑稱守謙出入左右命撫蔡師碑中云蔡人迎戎命公撫眾與之正合守謙于興唐寺寫經為國祈福故立此頌承和亦中人碑末云天水強瓊摹勒并刻字強瓊亦中人見其妻王夫人墓銘碑額已失文獻通考唐六譯金剛經恒農楊勣集中貴人楊承和集右軍書刻之興唐寺亦應是其時所為

西平王李晟神道碑 太和三年四月立裴度撰文柳公權正書并篆額在高陵奉正原

右碑叙次忠武功績官爵不及本傳詳盡而大略並與傳合惟傳云有子十五人碑載者十二人攷世系表亦只有十二人名又李聽碑以為十六人舊史云侗伯早世然則以侗等早世碑故不及之也

李璠題名 太和三年十一月刻正書

李虞仲題名 太和四年七月刻正書

虞仲李端之子唐書本傳虞仲字見之弟進士宏詞累遷太常博士實歷初以兵部郎中知制誥遷中書舍人出為華州刺史歷吏部侍郎未有云判官事柳乘同來乘名又見懷素聖母帖後蓋以大理評事出判華州事也

韋公武題名 太和四年刻正書並在華嶽廟

尊勝陀羅尼經并序 太和六年四月立僧廬川撰文無可正書在西安府百塔寺

無可賈島從弟字法學柳公權

義陽郡王苻璘碑 太和七年立李宗閱撰文柳公權正書并篆額在富平學

今額上並無字蹟應是勒碑時未及之也或謂後人磨去者非

落星石題字 太和口年刻陳元錫記正書在興平

古以太和紀年者三一晉海西公一北魏文帝一唐文宗海西去穆帝不及十年字體又不

類北魏為唐人書無疑

尚書主客員外郎題名殘字 開成元年八月刻行書

郗宗口題名 開成元年閏口月刻正書並在華嶽廟

石刻十二經及五經文字九經字樣

易九卷共九石書十三卷共十石詩二十卷共十六石周禮十卷共十七石儀禮十七卷共二十石禮記二十卷共三十三石春秋左氏傳三十卷共六十七石公羊氏傳十卷共十七石穀梁氏傳十卷共十六石孝經一卷共一石論語十卷共七石爾雅二卷共五石五經文字三卷大歷十一年六月張參撰九經字樣一卷唐元度撰共十石 開成二年元月立艾居晦陳玠口口口段絳等正書隸題首在西安府學 舊唐書云文宗開成二年宰臣判國子祭酒鄭覃進石壁九經一百六十卷案實共一百五十卷外文字字樣又四卷舊書總成數言之故不符耳 禮記中月令用明皇刪定本列在曲禮前 舊唐書謂石經立後數十年名儒皆不窺之以為蕪累其評雖不盡然就諸經中最不堪者推儀禮如捷之為建祖之為祖奉之為拳拜之為敗或以形譎或以聲誤皆當時書石者不通禮制於此書全未寓目故臨時致多謬戾如此他如論語之脫貧而樂道道字使後人因循不改未必非此書之作偏 今本周禮太宰三曰郊甸之賦郊應作邦左傳毛伯衛來錫公命錫應作賜晉侯代鄭及邲邲應作延論語爾愛其羊爾應作女爾雅皇華也應作華皇也楊鳥白鷹應作楊白鷹者皆石本之正而後代俗本之誤也或反據以辯正石本者非石經內有旁改字有添注字如書子有亂十人添一臣字左傳昭二十二年辛丑伐京毀其西南下添子朝奔郊四

字論語陽貨篇添子曰巧言令色鮮矣仁節誣謬之至或云卽張參孫自牧所改或云宋晁公武據蜀石經增入吾鄉惠徵君棟以爲是晁未知何所據或以爲卽明王堯惠等所爲然其中亦有從古本改正極是處恐堯惠并不能也 唐時雖云依漢蔡邕刊碑立於太學創立石壁九經却不在學中故黎持記云舊在務本坊自天祐中韓建築新城而委弃于野朱梁時劉鄩守長安從幕吏尹玉羽請輦入城中置唐尚書省之西隅今龍圖呂公又移立于府學而建亭焉是石經置學之始末 西安府學 大成殿後舊爲碑林今稱碑洞經始於宋元祐庚午龍圖閣學士呂大忠自明迄

本朝屢加輯治余以乾隆壬辰歲政務稍暇進訪古刻見屋宇傾圯經石及諸碑率棄榛莽瞻顧悚息復議興修前後堂廡皆鼎新焉旋於土中鏤得舊刻數十片遂取石經及宋元以前者編排甲乙周以闌楯明代及近人所刻則汰存其佳者別建三楹以存置其鎖鑰則有司掌之設法保護以冀垂諸永久壁經貞石頓復舊觀後有好奇者舉而弗替可也

贈吏部尚書馮宿神道碑 開成二年五月立王起撰文柳公權正書并篆額在西安府學宿字拱之馮審之從兄也官終吏部尚書卒諡曰懿起字舉之終太尉卒諡曰文馮耽題名 開成三年四月刻正書在華嶽廟

大通覺法師元奘塔銘 開成四年五月立劉軻撰文沙門建初正書在西安府城南

舊唐書本傳云師洛州偃師人此云緱氏人未知孰是所稱東印度王拘摩者卽尸鳩摩也戒日王者卽中印度尸羅逸多也坊州刺史竇師倫倫史作綸

慈恩寺基公法師碑 開成四年五月立李洪度撰文僧建初行書在咸寧興教寺

基公者尉遲敬德之從子也常譯經于慈恩寺卒于永淳中太和間始建此塔至是勒銘焉御史大夫李景讓題名 開成四年六月刻正書在華嶽廟

景讓字後已李愷之孫也唐書本傳稱景讓入爲尚書左丞至大中始進御史大夫劾免爲侍御史據此則開成時已爲此官也當是爲節度使時兼攝之官故史不記之耳

安國寺寂照和上碑 開成五年正月立段成式撰文僧無可正書顧元篆額在咸陽

唐安國寺有二一在西京一在東京在西京者爲睿宗龍潛宅以景雲元年九月爲寺卽此是也在東京者爲中宗節愍太子宅神龍二年爲崇恩寺後爲衛國寺亦以景雲元年十二月改名其並得名爲安國者以睿宗本封故也大德以太和七年卒文稱太和二年來延唐寺以會要攷之延唐本名萬善爲會昌六年奏改碑於開成末卽稱延唐是會要云云亦不甚是矣

司直廳石幢 庚申正月立鄭模撰文裴諸正書在西安府學

庚申當是開成五年續有會昌元年評事李口述一通

陳商題名 會昌元年七月刻行書在華嶽廟

此題云司門郎中史館修撰題後又有後六年商自禮部侍郎出鎮分陝云云攷商以禮部侍郎主文以延英對見辭不稱旨改授王起即其出鎮之事也見唐摭言唐書云商字述聖官至秘書監封許昌縣男

大達法師元秘塔碑 會昌元年十二月立裴休撰文柳公權正書并篆額在西安府學

大達憲宗時奉詔與迎佛骨之僧正言是其弟子

崔郇題名 會昌二年六月刻行書

郇時官京兆尹宰相世系表云郇官至大理卿崔邠之弟郇之兄也

謁嶽廟七言詩 會昌二年六月刻強至撰并行書並在華嶽廟

高士廉碑側記 會昌四年五月刻一為六代孫元裕一為少逸並正書在醴泉

內侍王文幹墓志銘 會昌四年十月立趙造撰文蕭睦正書在西安府龍首原

崔慎由崔安潛題名 會昌五年二月刻正書

慎由為宣宗相寓尺東於所知必稱安潛故時人有王凝裴瓚舍弟安潛之語後亦位至侍中古人之升沈後進若此

口伏王季題名 會昌六年六月刻行書

李口方題名 大中元年口月刻正書並在華嶽廟

陀羅尼經幢 大中二年正月立于惟則撰文正書在西安府學

楊漢公題名 大中二年五月刻正書在華嶽廟

漢公隨越公後裔字用又官至天平軍節度使檢校戶部尚書題稱其官為給事中當在為同州刺史之前唐書本傳不及之者略也

周公祠靈泉碑并題奏狀及勅批荅 大中二年十二月立正書在岐山周公廟

時崔珙為鳳翔隴州節度使奏泉靈異詔加泉名曰潤德

李貽孫祈雪謁廟題名 大中三年十二月刻正書

鄭損盧璣題名 大中四年九月刻分書

損時為臨晉縣令璣鄉貢進士宰相世系表損字慶遠禮部尚書璣魏州刺史

劉仁口修廟題名 大中四年十月刻正書並在華嶽廟

勅內莊宅使牒 大中五年正月立正書

比邱尼正言疏 大中五年正月立正書並在西安府學

正言名見裴休大達法師碑銘此與勅內莊宅使牒同刻其陰

李貽孫題名 大中五年七月刻行書

張權題名 大中五年八月刻正書

薛謬宋壽送坐主尚書赴滑臺題名 大中五年十月刻正書

于德晦題名 大中六年三月刻正書並在華嶽廟

德晦時官同州刺史世系表同

杜順和上行記 大中六年口月立杜殷撰文董景仁艸書在西安府開佛寺

宋白續文獻通考法順姓杜氏萬年人為隋文帝所重月給俸供之有病者對之危坐少即愈生而聾者與言即聰啞者與語即能言狂顛者使人領往向之禪定少選即拜謝而去又嘗臨溪侍者懼不可濟順率同涉水即斷流其神迹類如此太宗素敬之嘗引入宮禁妃主戚里諸貴奉之如生佛集華嚴法界觀門弟子智嚴尊者傳其教

崔瓘題名 大中七年三月刻行書在華嶽廟

宰相世系表瓘字汝器官至吏部尚書

定慧禪師宗密碑 大中九年十月立裴休撰文并正書在鄠縣艸堂寺

宗密姓何氏果州西充縣人嘗登進士二十五歲時于遂州涪江西岸遇道圓禪師問法契心遂受圓教文云自迦葉至達摩廿八世達摩傳可傳璨璨傳信信傳忍為五祖忍傳能為六祖忍又傳秀為北宗能傳會為荷澤宗又傳讓讓傳馬為江西宗荷澤傳磁州如如傳荆南張張傳遂州圓張又傳東京照圓傳之師師于荷澤為五世可即慧可信即道信忍即宏忍宏忍與道信並居蘄州雙峰山東山寺故謂其法為東山法門贊寧高僧傳稱宏忍七歲至雙峰道信密付法衣號為東山法門者是也六祖本住寶林寺後刺史辛據命出大梵寺辭住雙峰曹侯溪故六祖時亦稱為雙峰和尚所謂曹溪宗者是也宏忍既傳能為南宗又傳秀為北宗其弟又各以其師為六祖秀之弟子普寂為七祖王縉大證禪師碑叙達摩歷傳及大通大通傳大照大通即秀大照即寂也後能宗衰而秀宗盛惟會以能門高弟直入東都與北宗相抗獨孤及三祖碑所謂曹溪頓門孤行嶺南秀公師弟兩京法主三帝門師帝王分坐后妃臨席惟荷澤會公致普寂之門盈而復虛能祖宗風于斯不振者以此秀宗盛于開元會乃復于天寶至貞元十二年勅以會為七祖北宗自是遂無所聞矣會亦稱

神會如卽法如如之弟子爲惟忠惟忠卽荆南張也文又云師初謁遂州繼謁荆南謁東京後謁華嚴觀卽澄觀唐時所稱清涼國師我

朝雍正十二年特封妙正眞乘禪師者也師本不識觀後遣人持書以門人禮通之觀答書有云伯牙絕弦仲尼傾蓋矧乎不面而傳意猶吾心其自作圓覺經論序有云叨沐猶吾之納謬當眞子之印者卽指其事文裴休撰其圓覺經論書前亦有休序傳次師事與此略同有沙門如山注云休先世名許元度因建越州塔未終後託梁武帝之孫蕭詵訪曇彥禪師爲入定觀明其宿因師云許元度來何暮昔日浮屠今如故後衆請師起龍興大殿師云非吾所爲三百年後當有非衣功德主來至唐三生爲休攷宋沈仁衷祇園寺舍利塔記文云云與此相合說雖近誕然相傳有其事用以博異聞焉也可

尊勝陀羅尼經幢 大中十載四月立薛志願建正書在扶風

崔彥昭題名 大中十一年五月刻正書

彥昭僖宗相

李植題名 大中十一年十一月刻正書並在華嶽廟

卽官題名柱 大中十二年十一月立不題書人姓名在西安府學

柱八面面爲三段或四段有左司郎中左司員外郎吏部郎中吏部員外郎司封郎中司封員外郎司勳郎中司勳員外郎考功郎中考功員外郎戶部郎中戶部員外郎度支郎中度支員外郎金部郎中金部員外郎倉部郎中倉部員外郎禮部郎中禮部員外郎祠部郎中祠部員外郎膳部郎中膳部員外郎主客郎中主客員外郎等官官各百餘人

張權題名 大中□□年四月刻行書

李□祈雪題名 咸通元年十二月刻正書並在華嶽廟

大悲心陀羅尼 咸通二年孟春立正書在咸寧臥龍寺

溫璋題名 咸通五年六月刻正書在華嶽廟

宰塔塔銘 咸通五年八月立高墉撰文并正書在咸陽龍華寺

王夫人墓志 乾符三年立正書在長安崇聖寺

夫人中官強瓊妻也瓊名見梁守謙功德頌後銘後刻佛頂尊勝經

修武安君廟記 乾符五年十二月立正書在咸陽縣東廟內

陀羅尼經幢 乾符六年二月立沙門詞浩正書在咸寧牛頭寺

尊勝經幢 乾符元年□月女弟子陳氏建在咸寧臥龍寺

寺于隋為福應禪院唐名觀音寺宋太宗更名臥龍寺以僧惟果居此故也

內侍吳承必墓志 乾符二年十一月立裴廷裕撰文行書不辨姓名董環篆蓋在咸寧田家灣司空圖題裴晉公題名詩殘字 正書在華嶽廟

唐撫言云裴晉公赴敵淮西題名岳廟之闕門大順中戶部侍郎司空圖以一絕紀之曰嶽前大隊赴淮西從此中原息戰鞞石闕莫教苔蘚上分明認取晉公題今此詩只存首二句作嶽前大旆討淮西則有二字異矣圖書世所罕見則此十四字可寶也

濟安侯廟記 光化二年四月立李巨川撰文柳懷素正書在華州城隍廟

秦王重修法門寺塔廟記 天祐十九年二月立薛昌序撰文王仁恭正書篆額

天祐十九年即梁主瑱之龍德二年也秦王即李茂貞唐亡梁稱帝改元開平而茂貞與李克用並襲天祐蜀王建稱天復七年以明年改元武成吳楊渥稱天祐十五年以明年改元武義並是也茂貞踞有鳳翔等二十州于梁主瑱貞明乙亥丙子之間鳳翔為蜀所克史不言復為茂貞所有據碑可見其脫誤碑又稱天復十二年十九年二十年天復之十二年即天祐九年其十九二十年則天祐十六十七兩年也是茂貞稱天復天祐號年之限克用專

稱天祐茂貞兼用天復天祐此其所異者也茂貞本姓宋僖宗賜姓為李氏或云茂貞封秦王在同光初天祐十九年不得有是稱案天祐十九年即梁亡之年明年則為同光元年也豈茂貞自稱為秦王莊宗因是封之耶蓋不獨武都楊盛不改義熙年號比志于陶靖節矣劉源李彥鐫等重立秦王碑題名 天祐二十年癸未四月立正書並在扶風法門寺刻秦王重修法門寺塔廟記之側

是為後唐同光元年是年四月己巳存勗稱制改元己巳當是二十五日此云四月二十九日是存勗己巳五日矣

爾朱達墓碣 號年缺程彥矩撰文正書無姓名在郟陽朱家河

府君名達字正道其先河南郡人祖澤官于馮翊因家焉起家自懷州軍事押衙授山南東道節度散兵馬使改東都留守押衙以檢校太子賓客兼監察御史終焉年三十有九卒于江陵府無競里葬于澄城縣武安鄉號年殘泐不可得其可見者如是朱家河本名大谷河世傳爾朱之後改為朱氏居于河濱因建達廟砌此碣于廟內近世陝人某作彼縣志即名此為廟碑誤矣

大悲心陀羅尼尊勝陀羅尼經幢 大朝丙午仲夏立正書在慈恩寺

西明寺尊勝陀羅尼經幢 號年泐正書在三原縣東北田村

重興寺石柱經 號年缺正書在同官

石鼓尊勝經 無號年及書人姓名在醴泉昭陵

鼓下作石山山上作天王鬼神以戴之斧鑿甚工

淨慈寺釋迦牟尼并賢劫象銘 號年缺分書在西安府

今世佛寺每造千佛閣者即賢劫象也水經注據釋氏西域記言放弓仗塔國王有千子勇健無比來伐一國先是一國王有小夫人生肉胎大夫人妒之即盛以木函弃之恒水國王游觀開函見千小兒端正殊好取歸養之後伐父國父大恐小夫人曰勿愁但于城西作高樓賊來置我樓上賊來小夫人令千子張口以兩手持乳乳作五百道俱隊于子口中賊知是母即放弓仗後于其處立塔者即其事矣象為裴行純造

三階大德禪師碑額 正書在咸寧薦福寺

此不知何碑之額今存寺中碑猶存半截却無一字可見

李益等題名 無號年正書並在華嶽廟

唐有兩李益一宰相揆族官至禮部尚書一為太子庶子此未知孰是廟內凡為唐人題名

而無號年可見者又有盧舒韓解劉承□李賞李成允崔恭蔣羅漢韋彪等共八石攷宰相世系表韓解官至太子中允崔恭至汾州刺史韋彪至唐州刺史餘皆不得其人蔣羅漢則內侍省官也廟中舊碣極多向為明人修五鳳樓用作令適柱礎予以乾隆四十三年奉勅重修乃始易以瓦石既于舊址加整亦使古物不墜于地後來者其實之也

梁

寄邊衣詩 乾化四年刻唐裴說撰釋彥修艸書在西安府學

說唐末登進士終禮部員外郎此詩一云說作一云裴羽仙作羽仙說妻也

折勅史嗣祚神道碑 號年換書人並缺在府谷西北李家洼

文云有子五人三曰從遠從遠即從阮以後唐莊宗鎮太原時領府州刺史文內又有當今

晉王感公有大忠云云則是碑梁時所建也 文云大魏之苗裔宇文之別緒又云爰因忠

烈為唐裔隴西氏于克行碑云折出河西折屈五代史從阮父嗣倫與此異

後唐

揚凝式題名 清泰乙未□月刻行書

王應麟云華岳題名自開元迄清泰所稱清泰蓋即此是也黃庭堅云見顏魯公書則知歐

虞褚薛未入右軍之室見楊少師書然後知徐沈有塵埃氣少師筆札重于一時得片紙寸書者寶逾共貝而此題名竟埋湮于殘題斷砌之間數百年莫有問之者于以見採錄之功為不小也

張希崇題名 清泰二年十月刻正書並在華嶽廟

晉

廣慈院東北兩莊地土牒 天福六年八月立正書在咸寧香城寺

牒為晉天福時給其刻石則在宋淳化三年六月

移文宣王廟記 開運三年正月立馮道撰文楊思進行書在同州府學

文清簡有法行書亦精整可傳

周

樂安公祭告題名 廣順癸丑六月刻口遜正書在華嶽廟

關中金石記卷弟四終

關中金石記卷弟五

鎮洋畢沅撰

宋

王彥超修文宣王廟記 建隆三年八月立劉從乂撰文口昭吉行書并篆額

宋史文苑傳有劉從義善為文章常續長安碑文為遺風集者當即其人

篆書千字文 乾德三年十二月立釋夢英書

夢英字皆作英惟此碑作瑛與他碑異 夢英以篆法自名而體多閒架筆趨便易不若少

温之安詳端雅也且多繆體字如宙字應從由而作廂往字應從圭而作滢閨字應從王

近上為而作閨三畫正均嚴字應從厂而作嚴匡字應從圭而作匡頓字應從屯而作頓

字應從爾而作爾出字應從也而作也克字應作古而作古列字應作𠂔而作𠂔殿字應作

殿而作殿丞字應作爾而作爾較字應作𠂔而作𠂔較字應作𠂔而作𠂔觴字應作觴而作

觴眺字應作眺而作眺盟字應從血而作盟或省或增或改變皆非正體又古無藏字只用

臧古無崑字只用昆古無潔字只用絜古無邈字只用貌古無懸字只用縣古無塗字只用

涂古無貽字實用詒古無妙字實用眇古無悅字實用說此亦並用俗字揆其故蓋因玉出

昆岡昆池碣石女慕貞絜紈扇員絜等字本重疊故也又迢迢古只用消搖藝古只用執此

竟作造遙與藝律呂調陽本為律名隋智永唐歐褚所書皆然今則作呂更徵謬陋矣英書已傳數百年然不能免後人之譏如此攝管者可不知所取法耶

三體陰符經 乾德四年四月立郭忠恕書

此刻唐懷惲禪師碑之陰三體者以篆為正而以古隸分注于下也蠢字本從瞢從絲而省為瞢最謬者則烈字之作熒耳其所用古文多無所本宋史稱忠恕有古文尚書并釋文行世今其所作汗簡中採錄甚多字體亦正俗參半乃博覽之家非求精之學也篆體既變少監舊法又加之筆畫謬戾何以示後

夢英千字文序 乾德五年九月立陶穀撰文皇甫儼正書

江淹擬休上人怨別詩 乾德五年立釋夢英十八體篆書注解分書贈詩正書並袁允中書贈詩共十二人馬去非宋白賈黃中陳搏趙逢李頌慮岳許道寧何承矩呂端僧承牙元寶與咸平元年刻者惟賈黃中呂端二詩相同此題端為太常丞當是太祖定國初所贈然則咸平刻云特進太子太保致仕者為追錄無疑也米芾書史曰夢英諸家篆皆非古失實一時又從而贈詩使人媿笑

摩利支天經 乾德六年十月立袁正己正書前有摩利支天像李奉珪繪書史會要正己汝

南人

陰符經 乾德六年十一月立袁正己正書前有李筌遇驪山老母圖象翟守素繪

張仲荀抄高僧傳序 無號年陶穀文釋夢英正書並在西安府學

修周武王廟碑 開寶六年十月立盧多遜撰文孫崇望行書

崇望書宋時謂之院體蓋用集聖教序筆意而加豐潤者趙囅謂出于吳通微恐未必然宋史禮志廣南平遣司農少卿李繼芳祭南海除去劉鋹所封偽號及宮名又命李昉盧多遜王祐扈蒙等分撰嶽瀆祠及歷代帝王碑遣翰林待詔孫崇望等分詣諸廟書于石即其事

修周康王廟碑 開寶六年十月立黃遜撰文孫崇望行書並在咸陽廟內

文有云我應天廣運聖文神武明道至德仁孝皇帝宋史本紀乾德元年十一月百官上尊號曰應天廣運仁聖文武至德皇帝開寶元年十一月上尊號曰應天廣運大聖神武明道至德仁孝皇帝與此云聖文者異

修唐太宗廟碑 開寶六年十月立李瑩撰文孫崇望正書在醴泉廟內

修龍興寺塔記 開寶八年四月立正書在同州

碑無撰書人姓名文內有帖也德行無取文學甚虛之言當是撰文者名而姓無攷
蒼頡廟碑并陰 開寶八年大呂月立韓從訓撰文韓文正行書在白水

碑字甚拙其陰列孔子弟子姓名書冉耕字百牛攷漢啟母廟石闕銘百川栢絲義作伯漢
碑陰又有出錢幾伯之文是古百栢三字通用也書公冶長字子之范甯曰公冶長名芝
字子長以芝為名非也古芝與之同字書漆雕開字子修樊遲字子緩又分樊須為二人則
非是

法門寺浴器靈異記 太平興國三年四月立正書無撰書人姓名在扶風
保寧等寺額牒 太平興國三年四月立正書在興平

牒云興平縣清梵寺宜賜保寧之寺為額西禪院宜賜淨相禪院為額誌公塔院宜賜多寶
院為額法花院宜賜惠安之院為額後有中書侍郎平章事盧者盧多遜也右僕射兼門下
侍郎平章事左僕射兼門下侍郎平章事者當是沈義倫薛居正兩人
使帖 太平興國三年六月立正書

中署右贊善大夫通判軍州事楊而不及名劉敞等漢書刊誤曰楊氏世有兩族出赤泉侯
者從木子雲當從手吳仁傑正之曰子雲先世食我食采于楊而得姓字亦應從木案魏志

楊修字從木而自稱為修家子雲知兩字古本通也後有武功郡王宋史宗室列傳云太祖
子德昭太平興國元年鎮永興封武功郡王

縣帖 太平興國三年六月立正書此與使帖並刻牒文下

太上老君常清淨經太上昇元消災護命經太上天尊說生天得道經 太平興國五年閏三
月立龐仁顯正書前有老君像白廷璨繪在西安府學

廣慈禪院新修瑞象記 雍熙二年三月立希夷先生陳搏撰文楊從乂正書并篆額在咸寧
香城寺

香城寺 周約謁祠記 雍熙二年八月刻正書在華嶽廟

新譯三藏聖教序 端拱元年立太宗御製文釋雲勝隸書在西安府學

香城寺牒 淳化二年四月立正書刻香城寺地土碑下方在咸寧

呂文仲題名 淳化四年三月刻正書

文仲時以左諫議大夫與陳堯叟為關西巡撫使見宋史本傳

王著題名 無號年正書刻唐定慧禪師碑陰在鄠縣

著以攻書事太宗為侍書傳以為與呂文仲同時人故附于此

之古今正變可觀矣而後人乃指吳械之書為古音之正取以証詩騷漢賦何其謬歟

修文宣王廟記 咸平三年八月立王漢撰文蕭資隸書并題額在臨潼縣學

保寧寺浴室院鐘款 咸平三年十二月建正書在興平保寧寺

款內稱府主者知京兆府事者也內品者內侍官也所謂把門內品後苑內品及內品矣鎮將及副鎮則鎮皆官耳

梁顥李易直安撫巴峽謁祠記 咸平三年刻正書

宋史顥本傳是年冬王均平命顥為峽路安撫使題稱右司諫知制誥梁顥傳不及為右司諫者略也通鑑長編命翰林學士王欽若知制誥梁顥分為西川及峽路安撫使國子博士李及甫秘書丞李易直副之所至錄問繫囚自死罪以下得弟降之上諭欽若等曰朕以觀省風俗尤難其人數日思之無易卿等各宜宣布德澤使遠方知朕勤卹之意

江仲甫謁祠記 咸平四年閏十二月刻何淑正書並在華嶽廟

臥龍寺鐘款 咸平六年十二月造正書在咸寧

勅賜西嶽廟乳香記 咸平六年九月立韓見素撰文□□正書董洎篆額在華嶽廟

後題名內有宣德郎守右司諫直史館知華州軍州事輕車都尉高紳江少虞皇朝事實類

苑曰紳江東人善篆文與李無惑同時齊名

重真寺買田莊記 咸平六年□月立撰書人缺在扶風

修造靈寶三籙壇記 景德二年冬十一月刻龐奎題正書

□仲卿祭告記 景德二載□月刻正書

虞部郎中淳于廣謁廟記 祥符建號式載季秋刻分書並在華嶽廟

御製文宣王贊 大中祥符元年十月立正書篆額

元聖文宣王贊並加封號詔 大中祥符元年十一月立真宗御製并正書

宋史禮志是年十一月幸曲阜備禮謁廟本紀加諡孔子為元聖文宣王遣官祭以太牢給

便近十戶奉坐廟

承天觀碑 大中祥符二年二月立李維撰文尹熙古行書并篆額在正寧

觀唐天寶元年建明皇夢羣仙使求之得石象二十七因置此也唐書地理志云縣本名羅

川以獲玉正人像改名正寧

修文宣王廟大門記 大中祥符二年六月立孫僅撰文冉宗閔正書張格篆額並在西安府

學

宋史禮志是年以國諱改元聖文宣王為至聖文宣王五月通封十哲為公七十二弟子為侯先儒為伯

晉國大長公主祈福記 大中祥符己酉十月立賈得升題並正書在華嶽廟

大長公主即延慶公主下嫁石保吉以淳化元年改封即以是年十二月薨逝悟真大師賈得升陳希夷弟子文內又有張德□應是張德昇見龐房報祀記

□□禪師偈 大中祥符三年正月立沙門靜己行書省中篆額在西安府學

此刻唐栖先塋記後額已失禪師泐其名

李璿謁廟記 大中祥符三年二月刻正書

韓國長公主祈福記 大中祥符三年三月立賈得升題並正書

宋史本傳楊國大長公主至道二年封宣慈長公主咸平五年進魯國下嫁柴宗慶歷徙韓魏徐福四國仁宗立進鄧國大長公主以真宗本紀攷之封韓國後應是衛國非魏國也本紀是年閏三月帝幸第視疾即指此事案太宗七女惟此歷封韓國為長公主若雍國大長公主亦改封韓非此人

韓國長公主禱謝記 大中祥符三年四月立賈得升題正書並在華嶽廟

重書唐旌儒碑 大中祥符三年五月立唐賈至撰文張綽重書并篆額在臨潼縣學

文云天寶中改坑儒鄉為旌儒鄉冊府元龜云天寶元年改麗山為會昌山仍于坑儒之處立祠以祀遭難諸儒

龐房謁祠記 大中祥符季秋刻正書

宋垂遠等謁祠記 大中祥符庚戌季秋立張綽隸書並在華嶽廟

文云閣門祇候宋垂遠奉命提點京西刑獄公事詔旨給假迎侍北堂與弟秘書省正字寧遠知邑棘丞師仲宰知京兆昭應縣張綽進士龐房同告謁嶽祠案宋史宋璿傳子明遠都官員外郎次子垂遠閣門祇候不及寧遠名龐房報祀記云師仲宰以大理寺丞知華陰縣事

普濟禪院記 大中祥符三年十一月立閻仲卿撰文沙門善雋習王右軍行書在汧陽龍泉

山

善雋自署為廣慈禪院文學沙門廣慈禪院者即府城之香城寺也為晉天福時改名古有集書無稱習書者習書應是依仿為之此碑筆畫雖近却甚拙陋如閻字作門內陷右軍時

必無此體尤爲無所據矣

何昌齡謁廟記 大中祥符四年二月刻正書在華嶽廟

重修元聖文宣王記 大中祥符四年皇帝祀汾陰之月立董儲撰文僧嗣端隸書在藍田

陳繼昌謁廟記 聖宋祀汾陰歲仲春月刻第十孫陳知新正書在華嶽廟

泰寧宮牒 大中祥符四年三月立正書在渭南今名后土廟

任中正謁祠記 大中祥符四年十一月刻正書

題云樞密院直學士知□州迴路由名嶽者時代張詠知益州也中正字慶之官終禮部尚書

盛亮摹勒御書記 皇帝祀汾陰明年三月立正書姓名泐並在華嶽廟

賜陳堯咨疏龍首渠勅 大中祥符七年九月立堯咨行書在西安布政司廨

堯咨自署龍圖閣直學士尚書工部郎中知永興軍府與史本傳合傳云長安地斥鹵無甘

泉堯咨疏龍首渠注城中民利之卽指其事堯咨字嘉謨堯叟之弟

張懷彬投龍記 天書九載孟春立孫可久題正書

懷彬官入內供奉可久官入內高班又有李懷疑官入內高品並中人也宋史真宗本紀大

中祥符元年春正月乙丑有黃帛曳左承天門南鴟尾上守門卒塗榮告有司以聞上名羣

臣拜迎于朝元殿啟封號稱天書

蔡汝祭告並王懷珪嶽廟設醮記 大中祥符九年六月刻張綽正書

薛田魏野謁嶽祠記 大中祥符□年正月立正書

宋史魏野傳魏野字仲先陝州陝人隱居州之東郊祀汾陰之歲與李漬並被薦不赴案此題云徵君魏野當是被薦之後薛田字希稷

□知常建醮記 大中祥符□年六月立正書並在華嶽廟

知常亦中人官入內高品

保寧寺浴室院建鐘樓碑 天禧二年六月立冉曾撰文并行書冉商家額在興平

文甚華瞻足傳行書亦整健商自署官爲三班借職監商稅者三班借職武臣之初階監商

稅隸太府寺都提舉所謂諸州易務雜買務雜買場者是也

許文德題名 天禧三年十月刻正書在華嶽廟

大宋敦興頌 無號年虛儀先生撰文唐英篆額在西安府學

此刻虞永興夫子廟堂碑後碑題皇帝嗣明離之三葉歲在未月建午日丁卯宋自太祖至

真宗有天下者二世真宗卽位之後歲在未是爲天禧三年也宋史文苑傳有馬應自稱先生于開寶初微元結中興頌體作教興頌以述太祖下荆湖之功碑序所稱文表起戎保權告難頌所稱洞庭漣漣巴陵遷遷皆荆湖間事此稱虛儀先生而不置姓名當卽其人

鄧保口送御書神述碑石記 天禧四年十月立正書

文有云巳後午前丙時豎之所稱丙時卽二十四路法也其法出之淮南子天文訓子午卯酉爲二繩丑寅辰巳未申戌亥爲四鈎東北爲報德之維西南爲背陽之維東南爲常羊之維西北爲號通之維所謂四維者乾巽坤艮四路也故下又有斗指子則冬至指癸則小寒指丑則大寒指報德之維則立春指寅則雨水指甲則驚蟄指卯則春分指乙則清明指辰則穀雨指常羊之維而立夏指巳則小滿指丙則芒種指午則夏至指丁則小暑指未則大暑指背羊之維而立秋指申則處暑指庚則白露指酉則秋分指辛則寒露指戌則霜降指號通之維而立冬指亥則小雪指壬則大雪等說道家傳黃帝宅經多有其法世蓋襲用之而不知其出於淮南矣

鄧保口豎立神述碑石記 天禧四年十月立正書

題云神述碑一斤玉篇有斤字云平也又有廳字云客厨此蓋以斤爲廳案聽事之所爲廳

古無斤廳二字是卽用聽字矣

劉錯謁祠記 天禧庚申歲刻正書

段微明建醮記 乾興元年二月刻正書

題云奉宣差入內內侍省內侍高品段微明往慶成軍太寧宮太寧廟開啟道場慶成軍卽河中府榮河縣以大中祥符中陞爲軍太寧宮卽后土祠禮志曰大中祥符四年改奉祇曰太寧宮

范雍謁祠記 乾興壬戌四月刻正書

題云陝西轉運使尚書兵部員外郎賜紫金魚袋以傳攷之當由京東轉運副使歷河北轉運使及陝西也史不及兵部員外郎是其缺略

上官冲謁祠記 乾興元年五月刻正書

范雍再謁祠記 天聖癸亥九月刻正書

題云今歲自三司度支副使遷此官復爲本路轉運使以傳合之蓋由陝西轉運使入爲三司戶部副使又徙度支以尚書工部郎中爲龍圖閣待制陝西都轉運使耳

宋漢臣祭禱記 乙丑歲乙酉月刻正書

文稱壬戌歲乙巳月又稱甲子歲丁丑月又稱乙丑歲戊寅月又稱當歲壬午月乙酉月壬戌當是乾興元年甲子為天聖二年乙丑則三年也攷文安公牡丹詩為漢臣所刻是漢臣其時人

劉近恭謁聖容記 天聖三年口月刻正書並在華嶽廟

浴室院鐘樓記碑陰 天聖四年五月僧思詮正書在興平

勸慎刑文并箴 天聖六年五月立晁迴撰文盧經正書在西安府學

迴判西京時年已八十餘矣其為殿中丞嘗失入死囚奪官二秩故晚年津津慎刑若此於此可見古人悔過之亟

棲禪寺修水磨記 天聖八年八月立沙門志陸撰文并行書在鄠縣艸堂寺

文云寺之東南隅曰高觀之谷長安志作高冠在林谷之東去縣三十里水磨之法置車輪於水中軸高丈餘設板使軸上出以置磴磴石兩層上層四周縞縣之使不復動水從高下卸激輪則下磴旋轉如風能濟千人食明徐光啟農政書有其遺製乃泰西龍尾等車法之祖也今秦地人猶用之

文安公牡丹詩 天聖九年五月立劉孟堅序行書篆額無姓名在咸寧香城寺

永興軍牒 景祐二年二月立僧惟悟書

此刻唐邠國公功德銘之陰時范雍以戶部侍郎知永興軍請以府城隙地立學舍并乞國子監九經書籍故給此牒牒以元年正月下至二年二月始書上石也上有門下侍郎兼吏部尚書平章事呂者呂夷簡也工部尚書平章事李者李迪也戶部侍郎參知政事王者王曙也刑部侍郎參知政事宋者宋綬也下皇叔行雍州鳳翔牧荆王者周恭肅王元儼也攷史本紀及諸傳並合

中書劄子 景祐二年十一月立正書並在西安府學

陳執中謁祠記 景祐四年十月刻正書在華嶽廟

宋史本傳執中字昭譽明道中安撫京東進天章閣待制使還知應天府徙江寧府再遷工部郎中改龍圖閣直學士知永興軍案此云陳執中自天章待制除龍圖閣直學士知永興軍府與史傳合

興元府修文宣王廟記 慶歷二年正月立竇充撰文并正書篆額姓名闕在褒城

興慶池榭宴詩并序 慶歷壬午歲上巳日立序張子定撰詩共十八人范雍張奎劉渙張子定張揆王揚庭李諷尹仲舒閣詢趙濟宋宏雷簡夫楊初平史瑜董士廉文彥若趙寅王冲

正書隸額在西安府學

四六序典雅清麗詩並卓卓可傳子定高平幕下士也可想見一時之盛

王堯口謁祠記 慶歷壬午仲冬刻正書在華嶽廟

題云被詔綏撫涇原又云經畫西事以史攷之卽王堯臣也堯臣以翰林學士知審官院陝西用兵爲體量安撫使韓琦徙秦州范仲淹徙耀州堯臣言二人不當置之散地又薦种世衡狄青有將帥才慶歷二年九月趙元昊自鎮戎軍原州入寇乘勝掠平涼關中震恐仁宗思其言復以琦仲淹爲招討使使堯臣再撫涇原其所論沿邊城砦設險阨要賊徑通屬及備禦輕重之策動關利害故史節載其文以仁宗本紀攷之是年十月甲寅有遣使安撫涇原路之文而不畧姓氏夫堯臣能識韓范於旣敗之後舉种狄於未用之先所見已爲卓然又經略西兵朝廷多從其計至以疏請諸事付之各鎮用取爲法是堯臣之出爲當時重有關係之人本紀反略之宋史之採撫失當於此可見

浴室院建鐘樓碑陰記 慶歷癸未五月刻正書在興平

普通塔記 慶歷五年二月立盧覲撰文沙門可度正書在扶風

法門寺重修九子母記 慶歷五年閏五月立張奭撰文魏戡正書在扶風法門寺

程琳謁祠記 丁亥六月立正書

題云推誠報德功臣宣徽北院使武昌軍節度鄂州管內觀察處置等使光祿大夫檢校太傅使持節都督鄂州諸軍事行鄂州刺史兼御史大夫充陝西路安撫使兼鄜延路經略使馬步軍都部署判延州軍事管內勸農使上柱國安定郡開國公食邑三千九百戶食實封七百戶程琳案宋史本傳云琳字天球永寧軍博野人累官太常博士權三司戶部判官大中祥符中修起居注提舉在京諸司庫務知制誥判吏部流內銓權三司使改樞密直學士知益州遷給事中權知開封府再遷工部侍郎龍圖閣直學士復爲御史中丞不拜以翰林侍讀學士兼龍圖閣直學士再知開封府改三司使遷吏部侍郎參知政事遷尚書左丞尋爲戶部侍郎知天雄軍又以左丞爲資政殿學士遷工部尚書加大學士河北安撫使改武昌軍節度使知永興軍陝西安撫使以宣徽北院使判延州仍爲陝西安撫使拜同中書門下平章事判大名府

施昌言修廟記 慶歷七年秋立隸書

題云天章閣待制知華州事施昌言宋史本傳昌言字正臣通州靜海人累官屯田員外郎知太平府入爲殿中侍御史開封府判官安撫淮南還以禮部員外郎兼侍御史遷三司度

涇川堂記

關中金石記五

支副使除天章閣待制河北轉運副使降知華州

田况謁祠記 慶歷丁亥仲冬立正書並在華嶽廟

云樞密直學士田况宋史本傳况字元均趙元昊反夏竦經略陝西辟為判官後遷陝西宣撫副使

禮法門寺真身塔詩 慶歷戊子暮春立張問作王宗元行書在秦王重修法門寺塔廟記之陰

葉清臣謁祠石幢 慶歷八年四月立正書在華嶽廟

題云翰林侍讀學士尚書戶部郎中知永興軍府事本路安撫使兵馬都部署吳興郡侯葉清臣宋史本傳清臣字道卿蘇州長洲人歷官太常丞直史館以左正言知制誥判國子監陝西用兵擢起居舍人龍圖閣直學士權三司使為呂夷簡所惡出知江寧府踰年入翰林為學士以父憂服滿除翰林侍讀學士知邠州改澶州進尚書戶部郎中知青州徙永興軍仁宗御天章閣召公卿出手詔問當世急務清臣聞之為條對復為翰林學士權三司使案此內有慶歷丁亥秋赴官明年四月蒙恩名還云云當是復為翰林學士時事
王元等題名 慶歷八年九月刻正書

慈恩寺塔枕石上多作佛像皆唐筆也凡宋元人題名並在空處明人則大書佛像之上攷歷代名畫記云塔內面東西間尹琳畫塔下南門及西壁千鉢文殊尉遲畫南北兩間及兩門吳畫唐寺多畫壁故記云爾其稱南門及南北兩間當即是枕石所刻筆畫精整有法猶可寶也

雷簡夫題名 慶歷年月缺隸書並在慈恩寺

程琳再謁祠記 皇祐己丑四月立正書在華嶽廟

內有云太常博士蔡挺即工部尚書蔡敏肅公也字子政史但載從王堯臣范仲淹兩次宣撫陝西不及程琳并不及為太常博士俱是缺略

重修李太尉祠堂記 皇祐元年六月立王哲撰文張大中正書廖山甫題額在富平覓子店太尉唐李光弼也其地有赤眉廟皆為縣令改為祠堂至今尚存

王宗元題名 皇祐己丑清暑之月刻宗元行書在秦王重修法門寺塔廟記之陰

重修扶風縣學記 皇祐元年九月立姚嗣宗撰文正書在扶風

李杞謁祠記 皇祐辛卯仲冬刻正書在華嶽廟

蘇軾有臘月遊孤山訪惠勤惠思二僧詩又有李杞寺丞見和前篇復用元韻答之詩疑即

其人

復惟識廨院記 皇祐三年立黃庶撰文□□元正書在西安府學

此刻隋皇甫君碑後唯識廨院者藍田故龍泉寺也有洪集者與姚氏共復之而為之碑碑書或正或行或艸或兼篆籀分隸奇怪迥偉莫名一器余所見隋開皇時曹永恪修陳思王廟碑亦如是後世無人敢效之矣

李叅母沆等題名 皇祐甲午上巳日刻行書在鄠縣艸堂寺

此卽至和元年是年四月改元叅字清臣知興元府時又有李清臣字邦直非此人

京兆府小學規 至和元年四月立裴矜正書在西安府學

遊藥水寺詩 至和三年立劉異撰正書在略陽

寺在縣南七里嘉陵江之藥水巖方輿勝覽稱去沔州城七里南有二石洞洞有泉能療疾者此也異詩自注云山上有石乳洞昔人采石乳入此洞中約行半日忽見天氣清朗奇花異木非凡境所有為白鹿所觸驚迷而返後再遊則有大石塞其門矣今洞又在藥水巖之上五里云洞口石尚存

封濟民侯牒 嘉祐二年二月立正書隸額無姓名後有金正大三年二月蔡□題名在郿縣

太白廟

案牒以至和二年七月給後叙四人給事中叅知政事程戡也戶部侍郎平章事富者富弼也兵部侍郎平章事劉沆也吏部尚書平章事文者文彥博也濟民侯太白湫神也是時李昭遣知鳳翔府事以祈雨感應請於朝因得以封之也昭遣稱山有祠宇不知建置之始唐貞元中詔京兆尹韓臯重修據柳宗元集有碑具載感應後唐清泰中復加繕葺國朝祥符二年專遣使修完春秋邑令致祭列在祀典臣兼聞慶歷七年河南府王屋縣析城山聖水泉特封為潤德侯其例未遠可舉而行牒奉勅宣特封濟民侯攷太白神唐天寶八載封為神應公十四載為靈應公而宗元碑不載宋眞宗已封通泉廟為靈派侯而昭遣亦不及宋志王屋縣熙寧五年屬孟州則是時猶屬河南也碑為縣令賈番立石書法仿顏平原疑卽所書

白水路記 嘉祐二年二月立雷簡夫撰文并正書篆額在略陽

文云至和元年冬利州路轉運使李虞卿以入蜀青泥舊路高峻請開白水路以便公私之行具上未報先預畫材費以待其可又請知興安軍劉拱總督工作命僉署興安判官李良祐權知長舉縣令商應案視險易因知河池縣令王令圖首建路議卽移文令圖通幹其事

明年七月詔可十二月畢工初路未成李先遷東川路新轉運使田諒至審其績狀以嘉祐二年三月奏上且曰虞卿以至和二年仲春興役仲夏移去其經營建樹之狀與令圖同願朝廷旌虞卿令圖之勞用勸來者朝廷依其請其略如此案白水路因江為名白水江水經注所稱濁水者是也青泥亦水名太平寰宇記有左溪水入嘉陵江者即是水經注漢水又東南于築頭郡南與濁水合水出濁城東流與丁令溪水會又東逕武街城南故下辨縣治也又東宏休水注之又東逕白石縣南又東南泥陽水注之又東南與仇鳩水合又東南與河池水合又東南兩當水注之即故道水又南注漢水

張恭禮建醮記 嘉祐四年三月立正書在華嶽廟

恭禮中人也官入內侍省內侍高品

呂大忠等題名 嘉祐庚子三月刻正書在白水蒼頡廟碑之上方

种諤題名 嘉祐庚子四月刻正書在華嶽廟

諤字子正种世衡之子題云大理寺丞知縣者蓋以棘丞出知華陰縣事也本傳不及之

張渥題名 嘉祐六年四月刻正書在秦王重修法門寺塔廟記之側

嘉祐殘字 嘉祐壬寅五月刻正書在慈恩寺

程遵路謁祠記 嘉祐七年三月刻隸書在華嶽廟

石林亭詩 嘉祐七年十二月立劉敞蘇軾倡和作李邵正書篆額在麟遊

石本唐苑中物原父購得之為此亭與東坡倡和王象之云亭在麟遊縣治東

韓愈五箴 嘉祐八年二月立李寂篆書在西安府學

寂於宋不甚著名筆格方整可觀惜其有譌體處書家所不避也

妙德禪院明覺殿記 嘉祐八年六月立雷簡夫撰文劉戡正書在耀州

章惇題名記 甲辰正月立行書在鄠縣艸堂寺

文云惇自長安率蘇君旦安君師孟至終南謁蘇君軾者宋史惇傳惇舉甲科調商洛令與蘇軾遊南山抵仙遊潭潭下臨絕壁萬仞橫木其上惇攝軾書壁軾懼不敢書惇平步過之乘索挽樹攝衣而下以漆墨濡筆大書石壁曰蘇軾章惇來既還神彩不動即其時事也今仙游寺題名已失所存者惟此耳

題太史公廟詩 治平元年閏五月刻李奎作正書在韓城

盧盛等題名 治平甲辰六月刻正書在慈恩寺

畱題玉華山詩 治平三年四月刻宋球張道宗作冀上之正書

宮在縣西三十五里唐書地理志貞觀二十年置玉華宮宮在縣北四里鳳皇谷永徽二年廢為寺舊云縣有玉華山宮以山名據此知山實以宮名也金於此置玉華鎮書史會要冀上之字冠卿西河人楷書師歐陽率更

玉華山詩 治平丙午五月立張响作冀上之正書並在宜君玉華宮

史炤謁祠記 治平三年十月刻正書在華嶽廟

唐張說溫泉箴 治平丁未孟冬立楊方平正書在臨潼

關中金石記卷第五終

關中金石記卷第六

鎮洋畢沅撰

宋

孫永范純仁等題名 熙寧元年三月刻正書在慈恩寺

王竦題名 熙寧戊申三月刻行書在麟遊萬年宮碑額之陰

閻詢謁祠記 戊申重陽日刻正書

宋史詢傳詢知商州神宗初轉右諫議大夫改邠同一二州提舉上清太平宮使此詢自署諫議大夫是從商州還朝道經於此畱題耳

楊遂題名 熙寧庚戌七月刻正書並在華嶽廟

題云宋馬軍都使容州觀察使新環慶副都總管楊遂宋史本傳遂作燧云開封人累遷榮州團練使京城左箱巡檢英宗即位以為鄧州防禦使步軍都虞候歷環慶涇原鄜延二路副都總管至馬軍副都指揮使由容州觀察使拜寧遠軍節度殿前副都指揮使卒諡莊敏地理志容州屬廣南路

陳繹題名 熙寧三年九月刻行書

王臨題名 熙寧庚戌中冬刻行書並在渭南唐王忠嗣碑之陰

陳繹謁祠記 熙寧三年十二月刻正書

題云熙寧二年九月守彰化十一月移本路轉運副使制置解鹽使明年十一月移京東轉運使案宋史本傳繹字和叔開封人神宗立為陝西轉運副使入直舍人院修起居注知制誥拜翰林學士以待講學士知鄧州史不及為京東轉運使者缺也

劉忱謁祠記 熙寧辛亥孟夏刻正書

忱即議遣河東疆界者見宋史神宗本紀

呂黃謁祠記 熙寧四年五月刻正書並在華嶽廟

題內有大忠大鈞大臨大觀名范育呂大鈞墓表云考黃比部郎中贈左諫議大夫六子五子相繼登科知名當世其季賢而早死君其弟三子也攷宋史呂大防傳云兄大忠弟大鈞故大鈞為弟三子文云黃自京師□□安當是自京師至延安時大防知延州黃至其任所也

范育等題名 熙寧四年六月刻正書在同州聖教序記之陰

育字損之范祥之子官終給事中戶部侍郎

張孝孫謁祠記 熙寧辛亥中元日刻正書

林顏題名 熙寧辛亥中冬刻正書

蔡延慶謁祠記 熙寧六年正月刻正書

云治平丁未夏領本路提點刑獄謁祠下後六年蒙恩除天章閣待制秦鳳等路都轉運使過祠下恭謁金天帝宋史本傳延慶齊從子字仲遠歷官福建路轉運副使提點京東陝西刑獄神宗初以集賢校理為開府推官加直史館知河中府同修起居注直舍人院判流內銓拜天章閣待制秦鳳等路都轉運使

劉航等謁祠記 熙寧癸丑仲秋刻正書

盧訥祈雪記 熙寧癸丑仲冬刻王讜正書並在華嶽廟

宋史神宗本紀熙寧六年十一月丙寅大雪案是歲八月壬申朔此云仲冬十九日祈雪當猶在丙寅之前也

吳中復題名 熙寧七年二月刻中復隸書在慈恩寺

陳紘謁祠記 熙寧七年二月刻正書在華嶽廟

趙抃皮公弼等題名 熙寧七年仲冬刻吳中復隸書在慈恩寺

王欽臣謁祠記 熙寧十年三月刻正書

欽臣王洙之子字仲至欽臣曾為陝西轉運副使此云權發遣羣牧判官公事當在為副使之前史不及之也

張叔卿謁祠記 熙寧十年三月刻正書並在華嶽廟

梵書庵字贊 熙寧丁巳八月立太宗御製贊沙門顯俊正書在咸寧臥龍寺

蔡確謁祠記 熙寧□□六月刻正書在華嶽廟

題云直集賢院溫陵蔡確以宋史本傳攷之確直集賢院正在其時故附於此

海公壽塔記 元豐改元九月立釋慧觀撰文王曠正書在咸寧

此刻香城寺地土牒碑後

俞次臯謁祠記 元豐元年十月刻次臯正書

題云出帥華池者知慶州也華池以熙寧四年改名合水此存舊稱

薛昌朝題名 元豐戊午中冬刻正書

孫迥謁祠記 元豐戊午□月刻迥正書並在華嶽廟

渾王廟記 元豐二年三月立馬唐民撰文郭仲益正書在宜川

廟在鳳翅山上在今縣之東南五里文云廟直丹州之東二里在兩崖間者唐舊治也舊誤

為閏王廟以閏渾聲近後左藏庫副使知丹州事高渙為之改正唐民撰文以紀其事

蔣之奇題名 元豐己未六月刻正書

題不署官職攷之奇于神宗初為殿中侍御史因誣劾歐陽修貶監道州酒稅改監宣州是時正在退貶之時故不及之耳

蔡延慶再謁祠記 元豐己未夏刻正書並在華嶽廟

云自龍圖閣直學士涇原路經略使赴名者本傳延慶以應辦熙河軍須功進龍圖閣直學士王韶入朝攝熙帥不及為涇原經略使者略也

封忠武王廟勅 元豐二年八月立前載中書門下牒後載加封勅側載中書劄子並郭仲益正書馬唐民題額在宜川

內有右諫議大夫叅知政事蔡者蔡確也云渾王城生有助勞歿而英顯伏望朝廷特沛殊恩別加徽稱卽勅封為忠武王攷城在唐時已謚忠武王此亦因其故封耳時高渙知丹州軍事以祈雨感應請于朝故有應期得雨潤深一赤云云赤與尺古字通碑後有崇寧元年九月王碩跋

天馬賦 元豐三年正月米芾行書在西安府學

此是明人以墨本鈎摹者後有魏應龍黃公望諸人跋

謁太史公冢祠記 元豐庚申季春刻王景修正書在韓城

王璞題名 元豐庚申初夏刻正書在麟遊唐九成宮碑之側

□□祠堂後記 元豐庚申立馬唐民撰文郭仲益正書在宜川

此碑相傳以為渾瑊廟後記案其文云□□在三堡原唐高宗永徽辛亥遷于丹陽川之口

昭宗景□刺史王公惜其德施於人而名晦不顯因訪舊得使君舊坐於西嶺構屋而祠之

則非渾瑊矣史傳莫可攷証姑志之以俟知者

孫真人祠記 元豐四年六月立王巘撰文後有金重刻祠記跋係大定九年七月米孝思撰

文並正書在耀州五臺山

文云華原本京兆屬邑後建為別郡曰耀其城之東有沮水水東二三里有山曰五臺為孫

真人舊隱之地案今沮水在州城之西是城亦非華原舊築矣五臺山本名風孔山長安志

云風孔山在華原縣東五里今山在城東猶二三里稽以道里以長安志為是碑云在水東

二三里者恐非也碑又云有昆明池龍胡僧利其寶貨取去求救於真人真人因得其方書

此事出西陽雜俎云胡僧利其腦非寶貨也續仙傳云千金方以救龍子得之與此說異今

千金方書前有真人自叙惟言集古方書知此說近誕用以博異聞焉可耳

集陶潛歸去來詞詩 元豐四年九月立蘇軾撰并行書在西安府學

劉陶謁祠記 元豐五年正月刻正書

趙諒謁祠記 元豐五年孟秋月刻正書並在華嶽廟

諒自署為文思副使者武階也有文思使又有副使東染院使應轉洛苑使有戰功得轉文

思使東染院副使應轉洛院副使有戰功得轉文思副使其叙遷之例如是

雙皂莢行 元豐五年七月立陳叔度作子正舉隸書并跋在臨潼溫泉

吳暈等題名 元豐五年季秋日刻張觀正書在麟遊唐九成宮碑之側

歐陽修昭仁寺跋尾 元豐五年十一月刻張浮正書在長武唐昭仁寺碑之陰

謝卿材題名 元豐癸亥三月刻正書在朝邑饒益寺

蘇軾天和寺詩 元豐癸亥六月軾行書陳雄跋正書在扶風

薛紹彭題名 元豐六年六月刻正書

王顥謁祠記 元豐六年九月刻正書並在華嶽廟

張琰等題名 元豐癸亥仲冬刻陳琳正書在麟遊唐九成宮碑之側

陳康民謁祠記 元豐七年八月刻正書

王子文建醮記 元豐乙丑戊寅月刻正書並在華嶽廟

張琬等題名 元祐元年閏三月刻正書在慈恩寺

薛侏祭奠記 元祐元年十一月刻正書在華嶽廟

范口題名 元祐二年四月刻正書在慈恩寺

上清宮詞 元祐二年六月刻蘇軾作并行書在蓋屋縣學

玉海有神降於蓋屋民張守真家守真為道士即所居勅北帝宮太宗嗣位真君降言有忠孝加福愛民治國之語詔于終南山下築宮凡二年宮成中有通明殿題曰上清太平宮祀神之夕上望拜宋史禮志太祖神御之殿鳳翔上清太平宮

薛紹彭題名 元祐口年口月刻正書在鄠縣唐定慧禪師碑之側

此應是元祐二年時與蘇軾等同遊鄠杜故題名於此

游師雄祭告記 元祐三年正月刻正書在華嶽廟

游玉華宮記 元祐三年四月立游師雄撰文並正書在宜君

杜純挈家謁祠記 元祐戊辰閏四月刻男開奉命書在華嶽廟

題云轉運使濮陽杜純本傳云元祐元年范純仁韓維王存孫承交薦之除河北轉運判官

歷徙陝西轉運使

游師雄仇伯玉等題名 元祐三年五月刻正書在同州聖教序記之陰

王漢卿題名 元祐三年八月刻正書在慈恩寺

呂義山等題名 元祐戊辰十二月刻行書在溫泉

李英公神道碑陰記 元祐四年二月刻游師雄撰文黎持正書

李衛公神道碑陰記 元祐四年二月刻游師雄撰文并正書

昭陵六馬圖并游師雄記 元祐四年端午日立刁玠正書蔡安時篆額並在醴泉

師雄記曰六馬像贊歐陽詢書高宗時勅殷仲容別題于石坐歐書今不復見而仲容之字

尚存如寫白蹄贊云平薛仁果時乘益知唐史誤以果為杲攷吳縝新唐書并繆亦有其說

蓋果杲字形相近致誤也

刻李義山題渾忠武王祠堂詩 元祐四年重陽日刻游師雄跋并正書後有五年仇伯玉張

舜民題名

祠為奉天令錢景逢建師雄跋云公有大恩於斯民宜乎百世血食然而廟貌闕如常與邑

宰錢君語及君因圃亭葺為祠堂既圖公之像并刻李商隱詩以附焉今像不存

渾忠武王祠堂記 元祐五年清明日立幸育撰文安宜之正書并篆額並在乾州

謁太史公祠記 元祐五年夏四月立邵繼題正書在韓城芝山

是不著書人姓名字體瘦勁與游師雄墓志略同應即邵書無疑邵字仲恭丹陽人嘗授筆法於蔡元長元長教以學沈傳師者文云元祐五年春不雨夏四月丁酉詔書委所在長史躬禱境內名山大川將以戊午有事于禹廟者宋紀是年二月辛丑罷修黃河癸卯禱雨嶽瀆罷浚京城濠丁未滅天下囚罪杖以下釋之四月甲辰呂大防等求退不允丁巳詔避殿減膳諸所書皆以早故也攷是年至五月始得雨紀于二月書禱雨岳瀆而是題四月猶有事禹廟則其往復遣官禱祭情事可知攷史是年正月丁卯朔二月有丁酉不言朔當是二日則辛丑為六日癸卯為八日丁未為十二日也四月丁酉應是三日甲辰為十日丁巳則二十三日也史于三月亦著丙申朔合大小餘之例亦無誤

京兆府新移石經記 元祐五年九月立黎持撰文安宜之正書篆額在西安府學

轉運使杜孝錫題名 元祐庚午十月刻行書在鄠縣唐定慧禪師碑之側

孝錫即杜純此以字行與前書名者異

九成宮六言詩 元祐五年十二月立游師雄作下有閣上功跋正書

刻唐凌烟閣功臣畫像并贊

只存王珪魏徵李勣侯君集四人上有像贊並正書亦元祐五年游師雄所刻並在麟遊

摹吳道子觀音二像 元祐辛未仲夏刻下有呂由聖贊并跋並正書在西安布政使司解

張保源游高驪潭記 元祐壬申刻正書

高驪潭即高觀谷水所匯者也驪觀亦字通

劉銅等十人宿紫閣題名 元祐壬申秋社後一日刻正書並在鄠縣唐定慧禪師碑之陰

重修郃陽縣學記 元祐癸酉正月立時彥撰文王寔正書并隸額在郃陽

時彥字邦美開封人官終吏部尚書史有傳

游師雄題名 元祐八年正月刻正書在華陰玉泉院

右在山蓀亭下字徑一尺五六寸景叔書莫大於此

坊州刺史盛南仲遊玉華宮記 元祐癸酉二月立王績正書在宜君

杜牧阿房宮賦 元祐八年六月安宜之正書後有游師雄記亦宜之書在西安府學

游安民祈晴記 元祐癸酉秋刻正書在華嶽廟

王詵題名 元祐癸酉刻行書在慈恩寺

游師雄章案等題名 元祐甲戌中和節後一日刻正書在同州聖教序記之陰

趙光輔觀音變相畫壁跋 紹聖元年四月立游師雄作并正書在耀州

宣和畫譜光輔官大理評事善畫蕃馬時人稱趙評事蕃馬圖繪寶鑑光輔耀州人太宗朝為畫院學士工畫佛道人物兼精蕃馬

王濟叔白耘叟題名 紹聖元年仲夏刻隸書在鄠縣唐定慧禪師碑之陰

昭陵圖并說 紹聖元年端午日立楊安繪游師雄撰文并正書在醴泉唐太宗廟

右圖太宗昭陵并附肅宗建陵在今縣北五十里陵寢記以為在縣東三十里者唐縣也并附陪葬諸臣一百六十五人姓名攷新舊唐書唐會要及文獻通攷所載互有不同唐書七十四人通攷百五十五人會要一百六十七人攷昭陵陪葬例子孫願從其祖父者聽如姜遐為行本之子行本在陪葬諸臣之例遐得從其父葬又陸先妃葬于麟德中特請陪葬此皆在常例之外者故諸家互有不同也惟是當時各家皆有穹碑夾以蒼松翠栢巨槐長楊下宮寢殿與表裏山河共成形勢一時君臣際會之隆號稱極盛自朱梁盜發而後再歷千年金虎石麟淪沒榛莽不但基址荒蕪即金石文字亦漸剝蝕無存余以乙未春季閱視涇

陽龍洞渠道出醴泉瞻拜元宮周覽封域因飭地方官重加修葺並為釐正疆界建立碑亭庶使樵牧牛羊知所禁辟而遺徽先烈得以垂諸永久云

張重威昭仁寺碑陰記 紹聖元年七月刻正書

曹調鼎昭仁寺碑陰記 紹聖元年八月刻正書並在長武

胡宗回謁祠記 紹聖元年季秋刻正書在華嶽廟

宋史本傳宗回字醇夫官陝西轉運使吏部郎中紹聖初以直龍圖閣知桂林此題云自陝西轉運使被命移帥桂林與傳皆合

朱光裔王普題名 紹聖二年三月刻正書在鄠縣唐定慧禪師碑之陰

李行之題名 紹聖二年四月刻行書在扶風唐宏農先賢積慶碑後

游玉華宮記 紹聖二禩五月立錢景允撰文隸書在宜君

李章游艸堂寺詩并子百堅跋 紹聖二年九月立百堅正書

薛嗣昌詩 紹聖二年季秋月立正書並在鄠縣艸堂寺

嗣昌紹彭之弟

關山月關山雪詩 紹聖丙子宋構作並正書在隴州大佛寺

朝請郎柴公玉華寺詩 紹聖四年九月立胡授正書在宜君

游師雄墓志 紹聖四年十月立張舜民撰文邵繼正書在西安府學

師雄橫渠弟子治平元年舉進士為儀州司曹參軍自治平迄元祐二十餘年皆在邊帥幕府始因范忠宣薦韓魏公委督築熙寧塞糧餉後歷蔡挺韓絳劉瑄趙高諸幕而在高幕最久元祐以後屢經遷轉十餘年始徙知陝州而公已歿矣神哲二宗知之未為不深也而卒不得大用此議者所以有用不盡才之恨歟宋史西夏傳載秉常嗣國後二十年中凡屬戰守之事得失具見合此志攷之大略出之師雄者居多余集陝省金石目錄見畱遺筆跡幾至廿種其才略風概瑰偉卓犖宋世少其儔匹採錄之餘令人企慕久之

敕賜重興戒香寺公據 紹聖四年十月立僧文才正書在邵陽百里社

游玉華宮記 紹聖年月缺錢景迪撰文並正書在宜君

瞿伯宗題名 元符己卯三月刻正書在鄂縣

陳知存謁祠記 元符己卯季春刻正書在華嶽廟

王正臣李援題名 元符己卯仲夏刻正書在鄂縣

白雲山主得利塔記 元符二年十月立趙宗輔撰文僧道雅正書并題額在高

陵

文云師初居鄂縣白雲山淨居禪院後居縣之隆昌寺淨居在白雲山下唐舊寺也隆昌寺在毘沙鎮金史地理志云縣有毘沙鎮者是也寺為宋太宗賜額宗輔鎔之子官至西京左藏庫副使

李援蘇昞等題名 元符三年二月刻隸書

修鳩摩羅什塔亭記 元符三年六月立甯祖武撰文隸書無姓名並在鄂縣

程懿叔遇雪詩 元符三年十月刻正書在臨潼温泉

李革等題名 建中靖國元年三月刻正書

路允蹈宿逍遙寺記 建中靖國改元四月正書刻定慧禪師碑之陰

孫竦孫埃等題名 建中靖國元年五月刻正書並在鄂縣

張景修等題名 崇寧元年二月刻正書在同州聖教序記之陰

梅澤過艸堂望終南山經樊川懷杜牧之行役述懷諸詩 崇寧改元三月刻崔珙正書在鄂

縣艸堂寺

淨相寺橙軒詩 崇寧壬午九月刻彭廸明作正書在興平

王碩題忠武王廟碑記 崇寧改元九月立正書在宜川元豐二年勅封忠武王記之上方

靜應廟記 崇寧二年三月立王允中撰文東長孺正書并題額在五臺山

廟於唐為靜明寺是時勅賜靜應廟額為孫真人祠

終南山雜咏 崇寧二年六月刻李駒作崔珙行書在鄠縣艸堂寺

靜應廟勅并封妙應真人告詞 崇寧二年八月立王恣正書并題額在五臺山

中有中書侍郎趙挺之又有尚書左僕射兼門下侍郎京蔡京也門下侍郎將許將也尚書

右丞居厚吳居厚也吏部尚書執中何執中也吏部侍郎洵仁鄧洵仁也

重修縣學記 崇寧二年立蘇時撰文謝□正書□敏篆額在褒城

鮮于侁游靈巖詩 號年缺隸書在略陽

案侁又有游靈巖詩序云崇寧三年秋行部與太守某等游此云云則此為崇寧三年作也

侁字子駿閬中人官終集賢修撰知陳州

乾陵無字碑題字 崇寧癸未季冬刻王正叔正書在乾州

唐遺棲禪寺詩 崇寧甲申冬至前二日刻正書在鄠縣

□擇仁謁祠記 崇寧四年五月刻分書在華嶽廟

景興宗題名 崇寧四年仲秋刻正書在鄠縣定慧禪師碑之陰

淨安寺鐘款 崇寧四年十月造正書在朝邑

寺故址在渭水濱元至正元年没于渭明改建于王林村款云同州朝邑縣魯苑鄉金史有

鎮名四而無魯苑之名亦可以補地志之缺

五臺山唱和詩 崇寧四年十二月立于吳王允中尚佐均王需張魴張介夫高鈞何賁等作

正書并題額在耀州

前有吳上允中啟云拜呈知府屯田攷宋制諸府州縣皆以京朝幕等官攝之故有以某官

知某府事知某州事知某縣事之稱或不帶京朝幕官等銜亦云某府知府某州知州某縣

知縣至明則竟改稱知府知州知縣近人作碑刻有用宋時舊例云知某府事等稱者亦始

於明世有意好古之徒通人所無有也

建安黃公詩 崇寧丙戌三月立東長孺正書有跋在咸陽縣署

黃公不詳其名

王仲孚題名 崇寧丙戌孟秋刻篆書在鄠縣定慧禪寺碑之陰

張舜民等題名 崇寧丙戌重九日刻正書在慈恩寺

長興萬壽寺文殊閣圖并記 大觀元年七月立爾朱權撰文楊時中正書在同州

大觀聖作之碑 大觀二年四月立徽宗行書蔡京題額李時雍摹寫在興平縣學

此刻隋賀若誼碑之陰京以大觀元年五月為尚書左僕射兼門下侍郎二年正月進太師碑題太師尚書左僕射與史傳合

御製學校八行八刑條 大觀二年十月奉御筆建行書

八行者善父母為孝善兄弟為弟善內親為睦善外親為婣信于朋友為任仁于州里為恤知君臣之義為忠辨義利之分為和也孝弟忠和為上睦婣為中任恤為下士有全備八行者貢入太學為太學上舍全備上四行或不全一行而兼中等二行為州縣上舍上等之選不全上二行而兼中二行為上舍中等之選不全上三行而兼中一行或兼下行為上舍下等之選反之者加以八刑有犯不忠不孝不弟不和終身不齒不得入學不睦十年不婣八年不任五年不恤三年有能改過自新不犯罪而有三行之實聽入學在監一年又不犯弟三等罪聽齒于諸生之列其例如此

修蓋嶽祠記 大觀己丑季春刻正書在華嶽廟

薛綱題名 己丑歲中元日刻正書

此刻定慧禪師碑之側云河東薛綱遊諸山獲觀先公題字則綱為紹彭之子此題稍已磨

泐前有後二十二年字樣元祐後二十二年當己丑應是大觀三年故置於此

孫鼇詩 大觀己丑九月刻正書並在鄆縣艸堂寺

梁慶祖謁祠記 大觀四年九月刻行書

李傅謁祠記 大觀四年十月刻正書並在華嶽廟

過臨潼三絕句 大觀四年十二月刻李挺作子熙民正書并跋在臨潼溫泉

乾陵無字碑題字 政和元年天祺節後一日刻范致明正書在乾州

徐處仁等題名 政和改元孟夏刻正書在慈恩寺

處仁字擇之時以資政殿學士出知永興軍與史傳合

提舉魯公雷題遠愛亭詩 辛卯八年刻魯百能作正書在扶風

辛卯當是政和元年

張智周等題名 政和改元孟冬刻正書在同州聖教序記之陰

張智周題名 政和元年十月刻正書在鄆縣艸堂寺

張智周題名 正書在慈恩寺

右無號年故附置於此

勅修河瀆靈源王廟碑 政和二年正月立陳振撰文王恣正書并篆額在韓城東王村
文稱河自大觀以來變濁爲清者三乾寧保平率以累日惟二年冬見於同州之韓城郃陽
其表百里其久彌月攷徽宗本紀自大觀至政和凡三書河清並在同州惟大觀三年兼有
陝州保平軍卽陝州也又于二年云以乾寧軍爲清州改乾寧爲清應卽以河清之故而史
不及之疑是略矣河自三代以來皆有崇祀故公羊傳以太山河海爲三望望者謂不能親
詣所在就其近郊祭之之義也其置祠實自秦始皇史記封禪書云河祠臨晉漢志云臨晉故
大荔秦獲之更名有河水祠今同州府朝邑縣是其地蓋昭王作河橋於此卽因而祭之耳
郊祀志高祖置祠祀官女巫令河巫祠河於臨晉又宣帝詔五嶽四瀆皆有常禮河於臨晉
使者持節侍祠歲五祠太平寰宇記西魏文帝大統十三年于漢祠更加營造周武帝天和
四年太宰宇文護于祠西建碑一所靈帝大象元年江淮濟各從本所祠惟河一祠依舊不
改每歲發使致璧加牲以祠焉文獻通考唐武德貞觀四瀆年別一祭祭西瀆大河于同州
歷代相傳並因而不改至明皇開元十五年始以有司言改祠于河中府在今山西之榮河
縣而同州之祠廢矣攷唐自明皇以後嶽瀆之制互有輕重然猶封河神爲靈源公眞宗封
禪進號爲顯聖靈源公仁宗康定封爲靈源王金章宗明昌爲顯聖靈源王元太祖至元爲

靈源宏濟王順帝至元爲靈源神佑宏濟王明則革去前號改稱西瀆大河之神亦並存河
中府之舊此唐以前宋以後祠祀異地之大較也攷唐王延昌撥廟碑云安祿山反其將崔
乾祐守蒲坂時郭子儀軍涇汭與之相持子儀夢神告曰永豐倉側將有急變姑以避之比
軍退賊騎雲集子儀賴以獲全後請于朝而修祠此猶是同州之舊其建于韓城者乃當時
別祠如宋時檀州河南亦得置河廟者是也文所云詔遣尚書郎張勣致祭旣抵其野訪故
祠得破屋一區傾圮殆甚還請修建詔可之此宋世修建之事念陝省爲全河之襟帶而祀
典闕如今雖不能復臨晉之故而韓城舊址不應委棄榛蕪過而弗問此守土之責也余將
請於

朝鼎新廟貌修復祀典以妥神庥而慶安瀾焉

席旦謁祠記 政和壬辰二月刻正書在華嶽廟

宋史本傳旦以顯謨閣直學士知成都府徙鄭州黜知滁州復知成都府徙永興軍後加述
古殿直學士命復知成都府未赴卒此題云再守成都史不詳時月則據碑可攷

李逸老自百塔遊翠微諸勝題名 政和壬辰上巳後一日刻正書在鄠縣定慧禪師碑之陰
謝口謁祠記 政和壬辰三月刻正書

宋達謁祠記 政和二年重五日刻正書並在華嶽廟

呂湘題名 政和二年六月刻正書在鄆縣定慧禪師碑之陰

楊可世謁祠記 政和四年二月刻正書

可世即與郭藥師高世宣龔燕者又有可鞞可昇可輔可弼可晟當並為可世之弟俱郃陽人書字人不著姓

張子定謁祠記 政和四年二月刻行書並在華嶽廟

司馬朴等題名 政和四年四月刻行書在慈恩寺

朴字文季范純仁之甥也後畱于金

遊驪山詩 政和四年七月刻孫漸作正書在臨潼溫泉

乾陵無字碑題字二 一政和甲午仲秋刻一十月刻並宋孝先正書在乾州

宋雲從謁祠記 政和甲午刻正書在華嶽廟

重建周西明寺圓測法師碑 政和五年四月立宋復撰文并正書在咸寧興教寺

王干謁祠記 政和乙未仲冬刻正書在華嶽廟

寶淵題名 政和乙未刻正書在鄆縣定慧禪師碑之陰

謝彥詩 政和丙申三月刻行書在臨潼溫泉

重修薦福寺塔記 政和六年五月立李堃撰文正書篆額無姓名在咸寧薦福寺

趙耘老題名 政和丙申七月刻行書在慈恩寺

光濟寺碑 政和丙申歲八月立張鑑撰文僧洪禧正書篆額無姓名在郃陽

折武恭公克行神道 號年缺毛友撰文字文虛中正書在府谷孤山堡南

文云武恭公既葬八年其子可求請立隧道之碑克行以大觀二年卒既葬八年當是政和六年也可求降金者故克行本傳不及其名

折氏世系

嗣祚五代時麟從阮本名從遠德展周永安軍御勳太寧軍節度使宋乾德度使

漢為永安武勝二年卒贈侍中
軍節度使周為
宣義保義靜難
三鎮贈中書令

德愿

御卿永安軍節惟正洛苑使知
度使贈太師燕府州事
國公

乾陵無字碑題字 政和戊戌孟夏刻暨唐喬正書在乾州

崇祐觀牒 政和八年九月立行書在朝邑東嶽廟

後題云通議大夫守左丞王押者王黼也起復少傅太宰押者鄭居中也居中以六年為少

保太宰七年八月以母憂去十一月起復八年進少傅少宰少保押者余深也深以七年十

一月為特進少宰八年七月為少保太師魯國公不押者蔡京也以本紀列傳攷之皆合

圓相觀音菩薩瑞像頌 政和八年孟冬立僧彥泯作頌麻應神作跋仇章正書在扶風法門

寺

石上作像頌跋並書其下像為無為子楊傑所傳

提舉顯謨湯公和胡仲文詩 正書在隴州大佛寺

此不著號年碑後有權沂源縣尉高慥主簿張正功立石字樣攷寶雲寺石碣後亦有尉高

慥名當是一時之作因附於此

乾陵無字碑題字 宣和改元仲春刻李士觀正書在乾州

暨尹卿等題名 宣和辛丑清明前二日刻行書在同州聖教序記之陰

登太清閣詩 宣和三年四月刻宋□作行書在高陵

向子千題名 宣和辛丑孟夏刻正書在臨潼溫泉

邵子文等題名 宣和辛丑夏五月刻王正叔行書在慈恩寺

子文名伯温康節之子伯温以大觀時監華州西嶽廟後除知興元府不赴擢提點成都路

刑獄石即其時所題也

暨唐喬清輝閣題記 宣和辛丑七月立行書在韓城北寺

梁鼇謁祠記 宣和辛丑九月刻正書

梁激謁祠記 宣和辛丑重九後二日刻行書並在華嶽廟

黎獻民等題名 宣和辛丑刻正書在慈恩寺

王雲等題名 宣和四年春刻行書在西安府學唐大智禪詩碑之陰

暨唐喬等題名 宣和壬寅上巳後三日刻行書在同州聖教序記之陰

范智聞詩 宣和四年八月刻行書在慈恩寺

乾陵無字碑詩 宣和五年三月刻宋京作正書

乾陵無字碑詩 宣和五年仲夏刻張子剛正書並在乾州

宋光泰題名 宣和五年十一月刻行書在慈恩寺

乾陵無字碑題字 宣和癸卯刻劉錫正書在乾州

賈炎饒益寺題名二 一政和三年五月一政和五年六月并行書炎子公傑于宣和六年四月刻在朝邑

先題云顯謨閣待制提舉南京鴻慶宮賈炎政和三年五月蒙恩罷延帥奉母歸居穎昌後題云炎自鄜延帥移守南陽侍親道饒益寺顯謨閣待制新知鄧州兼京南路安撫使賈炎題攷宋史炎昌朝之子歷官工部侍郎政和中以顯謨閣待制知應天府徙知延安求內郡以養母乃命為潁州未行復畱改河陽又改鄧州加直學士知永興入對畱為工部侍郎卒贈銀青光祿大夫前後奉母過饒益寺者始則由延帥之潁州再則由河陽改鄧州也傳文叙次不甚明白不如碑之詳著也又公傑題此云先考成正公畱題傳亦不及其諡其缺略如此南京即應天府唐之宋州也鴻慶宮太祖神御殿名

解益王佐邵伯温題名 宣和六年七月刻隸書在鄆縣定慧禪師碑之側

瀟溪真常游記 宣和甲辰夏刻正書在慈恩寺

碑不題姓名疑黃冠者流也

于真庵記 號年缺徽宗御製任諒集歐虞褚薛顏柳諸家書集李陽冰篆額在三原縣

學

此為道士于元隱所作也諒字子諒眉山入常以宣和中知京兆府此當即其時所為故附于此

新修太史公廟記 靖康改元四月立尹陽撰文焦丙正書在韓城芝山南嶺

顏魯公奉命帖及畫象跋 靖康元年七月立唐重撰并正書在同州府學

重字聖任自署為朝散郎秘閣修撰知同州軍州事攷重以右諫議大夫疏斬蔡京父子遷中書舍人言宰輔當先補外為宰相所惡落職知同州傳不載其為秘閣修撰當是略也是年金兵破晉絳重度不能守開門縱州人使出自以殘兵數百守城金兵疑其有備不渡河而返尋擢天章閣待制即其時事矣後為京兆府路經略制置使為金將婁室所攻城陷殉節攷欽宗本紀金破晉絳乃是年九十兩月事也婁室破永興軍乃高宗建炎二年正月事也重在同州繪公圖像刻置祠堂是其忠義之氣根于天性觀此圖者不特使真卿英靈千載不沫重之氣節亦於是乎可見矣

拱極觀記 靖康元年八月薛存撰文紹興九年中元日立雷道之跋權詵正書篆額在華嶽

廟

中有云枉應如響者即不應也枉與不通

王質劉雍題名 靖康丁未四月刻正書在鄆縣唐定慧禪師碑陰

此即高宗建炎元年是年四月欽宗北遷五月高宗即位改元

李若水奉命觀稼謁祠記 無號年正書

題云直史館李若水若水以靖康元年為太學博士改著作佐郎此應其時所刻也傳不著其直史館當是略耳

潘浹謁祠記 建炎改元刻正書並在華嶽廟

金龍寺龍骨塔銘 紹興甲子三月立僧修信撰文正書無姓氏游國佐題額在褒城

漢中府新修口記 乾道元年刻正書在褒城東三里烏龍江上

此是修棧中道路所立今俗名堰界石又有嘉定七年刻者亡

楊從義神道碑 乾道五年三月立袁勃撰文李昌謬正書王椿篆額在城固

從義字子和以靖康丙午歲應募起隸吳忠烈玠麾下云建炎二年八月被圍于同州者謂

金將婁室亦作婁取下邳九月破同州事也時公在圍中云四年九月我師不利於富平者

謂金太子宗輔為副元帥督師陝西九月敗張浚五路兵於富平也云紹興改元十月金四

太子必欲取和上原先遣兵攻神垵以警我師忠烈遣公擊之者謂是年十月玠保和上原
金將設立自鳳翔烏魯折合自階成出散關約日會和上原折合先期至陳北山索戰玠命
諸將堅陳待之更戰迭休金兵潰散設立方攻箭括關玠復遣將擊退之會婁室死兀朮復
會諸道兵十餘萬造浮梁跨渭自寶雞連結諸營與玠兵相拒玠復命諸將以勁弓強弩却
之先設伏兵於神垵以待金兵至大亂縱擊破之是也云三年二月四太子擁大軍由商于
侵饒風關再攻和上原玠遣公引擊者謂金撤離喝分兵攻關統制郭仲敗走金兵入興元
經略使劉子羽棄城走三泉玠退保仙人關金兵深入既由褒斜谷還興元玠子羽追擊之
是也饒風關在今石泉縣西五十里云四年二月金兵入殺金平自元帥以下盡室而來示
無返意者謂吳璘守和上原饋餉不繼玠謂其地去蜀遠命棄之于仙人關右殺金平初築
一壘移兵守之至是兀朮撤離喝及劉夔等三十萬騎入侵玠與璘及金人轉戰數晝夜不
息是也云九年金歸我河南侵疆者謂金以陝西地來歸遣使王倫受地是也云十年五月
金背盟撤離喝侵陝右公與諸軍會於涇州回山原七月金據鳳翔八月與金戰于蒲坂河
者謂是年金兵犯石壁及吳璘與金鶻眼郎君戰撤離喝入邠州胡世將遣公及王彥分道
摧敗之撤離喝退屯鳳翔九月楊政遣公夜襲金兵至十一月又襲之寶雞是也至是公隸

楊政軍二十一年七月與金戰於陳倉撤離喝再犯和尚原又戰却之者謂是年春正月公既敗金兵於渭南政克隴州與戰於寶雞擒金通檢李董是也宋史高宗紀作十月與此小異是時和議已成朝廷召政還以商秦之半畀金公亦移守鳳州復退保仙人關垂二十年無所事者皆公之力也云三十一年金主完顏亮遽背盟好者謂是年九月金兵攻黃牛堡為吳璘所敗也云三十二年閏二月公乘勢出攻金兵宵遁者謂璘遣公攻拔大散關分兵據和上原金人走寶雞是也蓋是時始以功真拜和州防禦使賜爵安康郡侯而弃三路之議起璘於是乎班師公於是乎可歸矣公以乾元五年二月卒有子八人女十人子及孫並為郎官宋史不立公傳其詳並見高宗本紀及璘玠政等傳因疎出之並見碑刻之為功於史者不小也

開石門碑陰記 紹熙甲寅四月立晏表撰文并隸書

碑叙漢鄱君及楊孟文開石門之事文醇雅可觀字亦深得漢人法意宋人隸書中出色者袁臨淄人時為南鄭縣令

郭公緒題名 嘉定庚午清明前一日刻正書

鮮于申之題名 嘉定三年三月刻隸書並在石門

文曰畛堰山河沂褒水登石門者卽山河堰也本蕭河所開曹參繼之以灌溉南鄭褒城兩縣田後誤蕭河為山河其地有曹參廟宋政和中勅修賜為山河惠遠侯廟

靈巖叙別記 嘉定戊寅六月刻李耆壽撰文並正書在略陽

其文云嘉定丁丑十二月二十有三日金兵入寇關表明年正月四川制置使竇謨閣學士臨川董公居誼進益昌督師利川路安撫節制軍馬直微猷閣古汴楊公九鼎進屯河池以三月十七日斬其元帥一統軍七俘獲甚衆後十日金以忿兵自天水犯西和董公進沔陽不戰而退尋犯大散關舊岷州皆以敗去由是關表按堵如故楊公還駐沔陽董公復駐益昌以六月十有四日叙別於靈巖寺幕下士眉山任處厚揚師復祥符李耆壽臨川過椿年李劉晏大正從行會稽虞剛簡眉山成申之賓城楊恢同谷李榮仲俱不及舉酒而別耆壽以承乏郡寄謹書刻之巖石云案宋史寧宗記嘉定十年四月金人分兵圍棗陽光化軍詔江淮制置使李珪京湖制置使趙方措置調遣仍聽便宜行事命四川制置使董居誼酌量緩急便宜行事十二月金鳳翔副都統軍完顏贊以步騎萬人犯四川迫湫池堡破天水軍攻白環堡迫黃牛堡統制劉雄弃大散關遁金人據之十一年二月金人焚大散關而去三月利州統制王逸等率忠義人復皂郊金完顏贊包長壽遁去沔州軍郭雄斬贊首包長壽

合長安鳳翔之衆復攻皂郊趨西和州沔州都統劉昌祖焚西和州遁金人破西和州復犯大散關卽其事也是時金源多難元運方興諸兵出沒無常故勝負亦無定讀是記具見當時疆場景狀且於以見金之不振焉

星羅寺鐘銘 嘉定甲申二月造兩截上截篆書有四神立像下截銘及題名正書在興安州城南純陽宮

哲宗御書忠清粹德之碑額 紹定三年三月立田克忭上石隸題額在略陽

額係元祐戊辰哲宗於崇慶殿篆書蓋司馬光神道碑首也詳見宋史本傳克忭摹刻於沔州公廨耳篆法精整宋時所少見者

光祿主簿蘇舜欽奉禮郎杜詵題名 號年缺正書

王韶詩 號年缺正書並在華嶽廟

韶字子純此作子淳與宋史異案米南宮蕭間堂記亦作純此外又有蔡挺題名只姓名二字雙鈎刻之又范宗傑題名又長子益恭次子益昌等題名亦未識何人之子又游靖兄弟題名又崔黼題名又麻温舒題名又王嘉欽題名又得閑居士祐晟題名又孫昌夏題名皆無年月可攷又有韓庶二字小篆書筆法挺勁似是宋人題昌黎事者又有澤山二字古篆

亦似舊人所書附誌於此

強至等題名 □□丁未十一月刻紀號缺行書

杜常等題名 號年泐隸書並在慈恩寺

常字正甫衛州人昭憲皇后之族孫官至龍圖閣直學士知河陽軍此外又有章諒題名李諷題名李遷題名並正書亦無號年附誌於此

范埴題名 丁丑仲夏刻王霽正書在鄆縣定慧禪師碑之陰

此外又有堅之正叔公亮集之題名正書無號年並不詳其人

乾陵無字碑題字 丁亥清明日刻范益正書在乾州

鄭彥文等題名 大定甲申六月刻正書在同州聖教序記之陰

靈泉觀牒 大定三年九月行書在同官

後有中奉大夫禮部尚書翰林學士承旨知制誥修國史王者王競也競字無競彰德人以

二年從太傅張浩朝京師進禮部尚書

戒師誠公塔銘 大定五年八月立僧師偉撰文正書僧有晦篆額在興平

中叙述塏冢放光一節襲用嚴挺之大智禪師塔銘文弟子神奇其師每有此等異說不足

重也

觀音院碑 大定丙戌九月立李□撰文李居仁正書王從簡題額在隴州

惠濟院牒 大定七年十月立正書在鄆縣槐北寺

碑題王競為通奉大夫與前題異者金制通奉從三品中其下為中奉也文稱本院自來別

無名額已納訖合著錢乙伯五十貫乞立惠濟院名額案金世賣僧道尼女冠度牒紫褐衣

師號寺觀名額之例乃世宗大定五年所罷此額給于四年蓋七年所刻石也

思政堂記 大定辛卯十二月立鄭彥文撰文并正書崔良弼篆額在乾州署內

文有云乾本漢池陽縣至唐改奉天後置為州梁乾化中升威勝軍後唐同光年復今名以

唐志合之改縣為州乃乾寧二年也太平寰宇記云李茂貞建後軍王出鎮為威勝軍文又

云距京兆不越數舍寰宇記東至長安一百八十里

靈泉觀主凝真大師成道碑 大定丙申四月立王鎬撰文李輔正書篆額在臨潼温

泉

碑三乘上刻成道圖中刻記下刻本觀山林水磨田土地基

重修太史公墓碣 大定己亥清明後二日立趙振撰文正書不著姓名在韓城

水經注陶渠水又東南逕司馬子長墓北墓前有廟廟前有碑永嘉四年漢陽太守殷濟瞻

印遺文大其功德遂建石室立碑樹桓太史公自序曰遷生龍門是其墳墟所在矣攷陶渠

即芝川水今墓在水南俗說云漢武帝于此得芝艸改名也

馬烜題名 大定十八年八月刻正書在西安府學刻唐大智禪師碑之陰

李成誥謁祠記 大定十九年刻正書在華嶽廟

許沂題名 大定庚子刻正書在慈恩寺

鑄九陽神鐘銘 大定二十一年四月造宋元豐中柴震撰文正書在臨潼靈泉觀

修城記 靳康侯撰文并正書在鄆縣

案碑不書紀元惟云皇帝即位十有六年又云越二十二年攷金惟世宗大定二十九年餘皆不及數則碑為大定時立文有彭城劉公以壽州酒使來鄆金制京都及真定置都麴使司他處置酒使司劉公蓋以監壽州酒務為其縣令者而不傳其名

棲雲老人題名 大定壬寅仲冬刻隸書在臨潼溫泉

建濟安侯廟碑 大定二十四年十月立張建撰文蔚□正書并篆額在華州

濟安侯華州城隍神也昭宗光化元年所封文云光化元年以華州為興德府封城隍神為濟安侯今攷唐志攷興德府在乾寧四年志誤也昭宗以乾寧五年八月改元光化始陞州為府不得在四年也

靈泉觀記 大定二十五年重陽日立楊峻撰文劉光正書劉利賓篆額在同官

右碑兩截上截即刻三年牒文下截刻此記文甚華贍字法亦似褚虞金人碑刻之最佳者仙蛻坐榻 大定二十七年八月立范若水撰文孫冑堂正書徐安上篆額有陰亦正書在華

陰雲臺觀

棲閑居士張中偉墓表 明昌改元立撰書人缺篆額在郿縣北大歷寺東南

中偉為中孚中彥之弟其二兄史並有傳碑云父諱達贈太師靖康末以守吉州死援太原

之難中孚以宋之鎮戎軍安撫使降金為鎮洮軍節度使知渭州兼涇原路經略安撫使後封原國公中彥以宋之涇原副將知德順軍降金代李彥琦為秦鳳經略使後封宗國公咸與碑說合金載割河南陝西畀宋中孚中彥入宋被畱臨安中彥又為宋之龍神衛四廂都指揮清遠軍承宣使提舉佑神觀靖海軍節度皇統初金復河南中孚中彥又北歸故文又有宗公解印恒山對君清話云云中孚中彥以宋忠臣之子仕於宋仕於金仕於齊地還宋載仕於宋地還金載仕於金恬然無所恥惟而中偉不事仕進消遙終身此宋之遺民達之孝子矣碑題翰林侍講學士奉政大夫知制誥兼同修國史護軍馮翊郡開國侯撰文資政大夫參知政事柱國安定郡開國公書而泐其名

崇教禪院鐘欵 明昌壬子二月造正書在咸寧薦福寺

崇教禪院本在武功于金為武亭縣是鐘于康熙中出自河畔時巡撫某公方修薦福寺因載歸焉鐘後有尚書禮部牒文

觀京兆府學古碑詩 明昌五年二月刻劉仲游撰并艸書在西安府學

驪山有感詩 承安屠維協洽書雲後七日刻移刺霖撰孫極之正書在臨潼溫泉

移刺即耶律金史有移刺履元好問集作耶律履是其証商挺增修華清宮記有太傅移刺

公疑卽其人後有跋自署晉陽舊部吏而無姓名

左口遠題名幢 承安庚申秋三刻行書在華嶽廟

重修州學之碑 泰和改元正月立正書篆額撰書人姓名並缺在綏德州

碑後有綏德州義合寨主簿郇口知臨洮府康樂寨事劉完全史地里志云綏德州有義合寨置弟二將臨洮府有康樂縣康樂當是先爲寨後升爲縣也又有知軍州事天水縣子同知軍州事廣平郡侯兩銜文中稱秦君守正以通儒來守高君口口以名進士爲軍州判官當卽兩人姓名

宋雄飛詩 泰和改元三月刻行書在郟縣觀村老君庵

孫錡題名 泰和四禩冬十月刻正書在同州聖教序記之陰

此碑云稍河南聖教序在州龍興寺宋政和中吉觀國任通判日移置公署蓋是碑初移于通判署至明正統間乃移于金塔寺也

虞用康史公奕等題名 泰和五年春四日刻正書在慈恩寺

歸潛志云史公奕字宏父大名人工書自號歲寒堂主人

泰寧宮鑄鐘記 泰和六年上元日造正書無撰文人姓名在渭南

田曠謁祠記 泰和七年四月刻正書在華嶽廟

權綱等題名 泰和丁卯重九日刻正書在同州聖教序記之陰

遊艸堂寺諸詩 大安元年二月刻行艸書前爲雪昂老人後爲東原田曠作在郟縣艸堂寺

趙門白氏題名 大安二年四月刻正書在興平 關忠義廟

法門寺真身寶塔詩 大安二年中元日刻僧師偉作朱景祐正書在扶風法門寺

大安二年鐘欵 大安二年口月造正書在郟縣東嶽廟
鐘不知所從來舊在縣治形家言不利于長官以數十牛昇置于廟欵云重一萬八千斤題內有以明威將軍攝軍資兼軍器庫使定遠大將軍攝縣簿尉者此以武階四五品攝八九品官者也有以徵仕郎行縣令者此以文階八品攝七品官者也金制中縣置簿尉下縣不置尉郟有簿尉是在金爲中縣矣

孔朝散詩 貞祐二年七夕日刻行書在郟縣觀村老君庵

碑題積石太守孔朝散當是以朝散大夫出知河州者也碑不著其名楊煥射虎記又有孔臨洮或亦卽其人

楊振碑 貞祐四年正月立元好問撰文張□正書王元禮篆額在乾州

唐書宰相世系表載鄴國公侑子行基行基子榮榮子温温子幼言自幼言以下不及之碑云幼言生顯顯生皐皐生免免生珍珍生光贊光贊生懷順懷順官金紫仕至西臺御史襲封至五代漢國始除此可以補唐史之缺又云西臺公有子十二人長曰公候次公神公雷公賢公洪公素公石公祚公良公通公演公伏號十二楊村公候子舜靖舜靖子信信子禹禹子言言子宗宗子懋懋子超道公為超道之次子攷唐以奉天之地四百頃賜楊氏故子孫遂為縣人好問作楊免碑文云譜系之詳見君自叙然則此即本免所叙述矣免即振子元禮華陰人見免碑

長安令□公二等題名 貞祐五年春上丁刻行書在西安府學刻唐大智禪師碑之陰

乾陵無字碑題字 興定五年四月刻張秀華行書在乾州

甯曲重修食水記 興定五年冬下元日立高褒撰文張待舉正書康節篆額

甯曲食水碑陰記 年月全上正書上有圖並在鄆縣

甯曲水即金渠之上流其源自赤谷來者自甯曲以上為居民食水以下則灌田為金渠蓋因其地多砂不能鑿井故引山水以資用迄今猶然碑稱為齊相甯戚所開無所依據不足

信也

印公開堂疏 元光二年二月立行書在鄆縣艸堂寺

文後云內族昭武大將軍宣權統軍使兼知府事完顏者完顏阿打也

射虎記 元光二年十月立楊煥撰文謝良□正書張待舉篆額在鄆縣東門外

乾陵無字碑題字 正大改元夏刻鄭□邠正書在乾州

唐太宗贊姚秦三藏羅什法師詩 正大乙酉仲冬刻釋義金正書在鄆縣艸堂寺

改建題名之碑 正大乙酉十二月立孔叔利撰文吳聽正書盧元篆額

府學教養之碑 正大二年十二月立劉渭撰文楊煥正書張邦彥篆額在西安府學

遊艸堂寺詩 正大三年立秋日刻趙開閣作并行書後有方亨跋在鄆縣艸堂寺

風流子詞 正大三年刻僕散汝弼作正書在臨潼湯池

僕散希魯跋云宋元至今刻石甚多殆難勝紀而當以此為第一其詞幽麗悽惋字畫勁峭有如拱壁因砌而珍之

唐太宗慈德寺詩刻 正大丁亥刻李文本跋並正書在武功

仙游觀永陽園詩并序 甲子正月立蘭世一正書并篆額在麟遊

雲房二大字 移刺松齡艸書在臨潼縣城東門內

松齡霖之子自紀云雲房鍾離子別號此蓋擬鐘離書法為之者

饒益寺藏春塢記 阜昌癸丑九月立趙抃撰文正書在朝邑

抃自署為新市監金史地里志朝邑縣有新市鎮是也寺在鎮之西梁天監中建唐貞觀二年起浮圖以明嘉靖地震圯文稱自唐宋以來名人賢士經由往返莫不於此題名主僧勒之于石案今題名惟宋政和中賈炎謝卿材二石尚存唐人名跡皆無之矣自此以下五種並劉豫時刻故附置金後

勅祭渾忠武王文并尚書禮部牒 阜昌六年八月立正書

勅祭渾忠武王記 阜昌七年正月立王蔚撰文王寵正書孟醇篆額並在宜川

碑為偽知丹州軍事安撫使劉議立議以渾忠武王諡犯徽祖廟諱抗章請避徽祖者豫之祖也李心傳繫年要錄稱紹興二年四月庚寅豫遷都汴奉祖考于宋太廟尊其祖忠曰毅文皇帝廟號徽祖宋史以為四月丙寅非庚寅者誤也是月壬戌朔庚寅月之廿九日也史又云豫名迪功郎王寵不至此記為寵所書不至之說恐未必是孟醇趙宗室王蔚字叔文史有傳

禹蹟圖 阜昌七年四月立正書

圖劉豫時刻攷豫以宋紹興元年為金所立則是年當丁巳亦金天會之十五年也每折地方百里所載山川多與古合唐宋以來地圖之存惟此而已攷宋毛晃禹貢指南稱先儒所刻禹蹟圖黑水在雍州西北而西南流至雲南之西南乃有黑水口東南流而入南海中間地里濶遠今此圖黑水與毛說合是為宋以前相傳之舊也唐書稱賈耽繪海內華夷圖廣三丈縱三丈三尺以寸為百里中國本之禹貢外夷本班固漢書古郡國題以墨今州郡題以朱豈此圖之權輿與圖象之學自古重之山海經前五篇乃益經也其後十二篇為周秦以來釋圖之言故往往雜以後代郡縣今案其文有云在其東或在其北云捕魚水中云兩手各操一蛇云右手指青邱北之屬皆據形言之耳山海經本有圖故陶潛以之入詩張駿郭璞以之作讀始知班固執文志入之形家有以也不知者乃以為域外之言堪輿之學非聖經矣又史記言蕭何收秦圖書大宛傳言昆侖天子案古圖書三王世家有御史奏輿地圖漢書言李陵圖所過山川地形元帝示後宮人單于圖明帝賜王景禹貢圖又班固案秦地圖虞喜志林薛瓚注漢書皆案漢輿地圖晉書言裴秀自製禹貢地域圖十八篇李吉甫元和郡縣圖志言起京兆府盡隴右凡四十七鎮每鎮皆圖在篇首今俱不存則此圖之傳

良足寶矣地理之學古今互異試條其得失附以鄙証為讀禹貢者有所採也

案圖嶓冢山在秦州東南深合自漢以來相傳之說攷水經禹貢山水澤地所在言嶓冢在隴西氏道班固地理志言在隴西西縣漢氏道及西縣治皆在今秦州自魏收地形志以嶓冢山為在華陽郡嶓冢縣括地志元和郡縣志並承其誤山乃移今之寧羌州矣然唐人猶兩存其說據魏收以駁班固自胡渭禹貢錐指始

案圖西漢水出秦州南至涪州入江東漢水出興元府東至漢陽入江亦合于班固地理志之說其圖西漢水不通于東漢則不合于古何則余嘗謂禹貢言嶓冢導漾是言水之在今甘肅秦州者也東流為漢是言水之在今陝西漢中府者也又東為滄浪之水則言水之在今湖北省者也西漢至寧羌州西北有水通于東漢班固所云東漢水首受氏道水郭璞爾雅音義謂之潛水水經注謂之通谷水括地志謂之復水云出利州緜谷縣龍門山今俗以為燕子河也其水于圖當自興元府南承東漢水流至利州北合于西漢而殊未之及今四川廣元縣是唐宋利州治寧羌州是其東北境龍門山在州北百五十里即李吉甫所云利州東北有龍門山者也樂史又云龍門山下有燕子谷或水之所以名矣郭璞既稱舊云即禹貢沱潛缺之非也

案圖黑水是三危之黑水黑水實有二余攷華陽黑水惟梁州孔安國言東據華山之南西距黑水張守節史記正義案括地志黑水源出梁州城固縣西北太山以此釋梁州黑水較長鄜道元案諸葛亮牋稱朝發南鄭暮宿黑水即此諸家解書以二黑水為一非也今水在漢中府城固縣西北五里案圖漆沮之洛至同州南入于河古說皆入渭是洛自宋金時改流入河也近韓邦靖著朝邑縣志云洛水明成化改流入河不察之至矣

案圖無漆沮蓋洛即漆沮孔安國書傳水經見史記注晉灼所引今本無之闕駟皆言是也李季卿三墳記

石刻亦云漆沮泛溢馮翊昏墊是唐人猶存其說矣漢人言漆縣西有漆水入渭在今麟遊

縣合雍入渭者為詩自土沮漆之漆是古但有兩漆水耳水經注洛水下又有漆水又遁甲

開山圖長安西有漆渠俱非禹貢之漆然自樂史宋敏求以來所在多漆水矣

華夷圖 阜昌七年十一月立正書並在西安府學

關中金石記卷第八
元
皇太子修艸堂寺令旨 癸卯年五月乙未年十一月丁未年四月又十月立並正書篆額在
鄠縣
右碑分四格上二格為皇太子令旨教修艸堂寺者弟三格則為修寺不蘭奚并匠人等覲
當衣食弟四格則恐缺少修寺不蘭奚人等補數皆令旨也皇太子名潤端太宗之弟二子
是時未立號年所稱癸卯蓋當宋理宗之淳祐三年丁未則七年也其弟二格稱乙未當為
乙巳之誤是淳祐五年就令旨上下來歷觀之自見不然則乙未為端平二年前淳祐癸卯
更八年與修寺事何涉此則刊字時之誤也
孫真人祝文 丙午歲二月立皇太子潤端撰正書在五臺山
劉處士墓碣 己酉孟夏立楊英撰文張徽隸書李微題額在西安府學
處士字希文名章又名九隴又名渭又名於菟字則不易也金以天興三年甲午之歲亡而
元自世祖始以中統紀號是年歲在己酉當是定宗未即位之前馬真太后臨朝稱制之日
也

鎮洋畢沅撰

關中金石記卷第八

元

皇太子修艸堂寺令旨 癸卯年五月乙未年十一月丁未年四月又十月立並正書篆額在

鄠縣

右碑分四格上二格為皇太子令旨教修艸堂寺者弟三格則為修寺不蘭奚并匠人等覲
當衣食弟四格則恐缺少修寺不蘭奚人等補數皆令旨也皇太子名潤端太宗之弟二子
是時未立號年所稱癸卯蓋當宋理宗之淳祐三年丁未則七年也其弟二格稱乙未當為
乙巳之誤是淳祐五年就令旨上下來歷觀之自見不然則乙未為端平二年前淳祐癸卯
更八年與修寺事何涉此則刊字時之誤也

孫真人祝文 丙午歲二月立皇太子潤端撰正書在五臺山

劉處士墓碣 己酉孟夏立楊英撰文張徽隸書李微題額在西安府學

處士字希文名章又名九隴又名渭又名於菟字則不易也金以天興三年甲午之歲亡而
元自世祖始以中統紀號是年歲在己酉當是定宗未即位之前馬真太后臨朝稱制之日
也

重陽宮聖旨碑 虎兒年七月立上蒙古字下正書釋之在盤屋

孫真人福壽論 丙辰九月立楊聰正書

題孫韓二真人詩 丙辰歲重九日刻楊聰作并行書

唐太宗賜孫真人頌 丙辰重九日立後有邛邦用跋並楊聰正書

與李素舟張志和書 無號年楊聰行書並在五臺山

唐通微道訣碑 唐乾元二年六月明皇製文元戊午歲人日本觀道士楊思聰重立行書在

三原大化觀

戊午憲宗八年

長春真人述 大朝癸未重九日刻正書在咸寧牛頭寺

輟耕錄邱處機號長春子登州棲霞人金大定丁亥謁重陽真人于寧海請為弟子戊申召

見闕下隨還終南山金主召不起宋使來召亦不起太祖遣近侍劉仲祿持手詔致聘至行

在所命掌天下道教至燕居太極宮仲祿元史處機傳作仲福祖庭真仙傳亦作仲祿

陀羅尼經幢 釋海覺唐梵二體書在咸寧開元寺

幢內梵書與同文韻統所載番相阿努所製西番字母相同為元代所建無疑

建文宣王廟記 中統二年五月立王處厚撰文馮慶正書并篆額在高陵縣學

楊奐碑 中統五年建巳月立元好問撰文姚燧正書并篆額在乾川

碑文往往與史合惟作萬言策未及上歸教授鄉里後安撫使辟經歷官京兆行尚書省以
便宜署君隴州經歷皆辭不赴應參乾恒二州軍事庚寅春試授館張公信甫之門等事史
不及之耳又史言著還山集六十卷天興近鑑三卷碑云還山集一百二十卷紀正大以來
朝政號近鑑三十卷亦異燧奐之弟三女壻

修宣聖廟記 至元三年四月立張鼎撰文正書在高陵

鼎自稱卜人為不知者加點水于旁作汴志書因之不可不知其誤文有云舍宇無丹楹刻
楠之美無山節藻稅之麗此本鄭康成禮記注不用朱子藏龜之室之解者也字亦精整可
愛

馮時賁詩 至元戊寅春三月刻正書在郿縣觀村老君庵

贍學田記 至元六年正月立賈仁撰文雷孜正書在西安府學

勅賜開福寺額記 至元六年十月立沙門志清撰文正書無姓名在同官

誠明真人道行碑 至元九年九月立王盤撰文賈庭臣正書在藍屋樓觀

重修唐清涼國師妙覺塔記 至元九年九月立沙門印撰文或正書
國師即澄觀字大休俗姓夏侯氏會稽人初居本州寶林寺後居五臺閣錫于華嚴寺十年
死賜諡清涼國師塔曰妙覺

本朝雍正十二年十月十五日奉

旨清涼觀著封妙正眞乘禪師仍著該地方官致祭一次清涼山志載師示寂後有梵僧至闕
表稱于慈嶺見二使者凌空而過以呪止而問之答曰北印度文殊堂神也東取華嚴菩薩
大牙歸國供養有旨啟塔果失一牙唯三十九存焉遂闍維舍利光明瑩徹舌如紅蓮色仍
賜諡清涼國師攷師以唐開成三年三月死先未死時文宗已號爲僧統清涼國師矣故志
云仍賜諡師以天寶二年出家大歷三年代宗令同大辯正三藏譯華嚴經爲潤文大德後
辭入五臺著經疏貞元十二年特召入京與蜀賓般若三藏譯烏茶國所進華嚴後分梵夾
成賜號教授和尚後加僧統國師爲華嚴六祖

題唐清涼國師塔額 至元九年重陽日立正書並在咸寧華嚴寺

天眞觀鐵方響 至元十一年四月造正書在郿縣署

欵云郿州天慶宮下院天眞觀者攷宋史大中祥符七年鳳翔府天慶觀甘露降宮名仿于

宋時也方響世亦謂之雲版雲仙禱記以爲磬之遺制但磬以石雲版以金爲之耳

建極宮蒙古字聖旨 至元十二年二月立上蒙古字下正書在韓城龍門

王鶚建極宮記曰禹門舊有神祠因兵而毀今道者姜善信河東趙城人師蓮峰斬自屬陝
右兵亂士大夫避地者皆依之一日語及禹門神祀因兵而毀公卽有潛復之志卽抵其所
因其舊制而蓋之上卽信徵聘陞辭勅賜宮曰建極殿曰明德閣曰臨思命大司農姚樞大
書其額以示歸榮據之則建極宮亦禹廟也世祖本紀至元元年七月龍門禹廟成在今縣
東北之六十里

重陽仙跡記 至元丙子中秋日立劉祖謙撰文姚燧正書并題額在整屋重陽宮

祖謙之文以金哀宗天興元年作至是始刻于石耳唐順之左編重陽姓王名壽咸陽
人

重修宣聖廟記 至元十三年九月立徐琰撰文正書篆額無姓名

府學公據 至元十三年十二月立正書隸額

皇子安西王盛德之碑 至元十四年正月立孟文昌撰文駱天驤正書篆額並在西安府學
寶慶寺記 至元十五年八月立商挺撰文并正書在平涼府空同山

碑云至元九年十一月分封皇子安西王案元史世祖本紀至元九年十月丙戌封皇子忙哥刺為安西王與此微異商挺傳至元九年忙阿刺為安西王以挺為王相

玉清萬壽宮碑 至元十五年上半年春立姚燧撰文王元輔正書篆額在汧陽

天真觀四至題字 至元十六年正月立正書在郿縣

題云京兆郿縣東關天慶宮下院天真觀以前十一年方響攻之即郿州也前云州此云縣是改州為縣當在十一年之後十六年之前矣史云至元元年省郿州為郿縣恐非又史稱十六年改京兆為安西路總管府此猶稱京兆則在未改之前可知

棲雲王真人開澇水記 至元十六年中元日立薛友諒撰文孫德或正書在整屋樓觀

何太古題名 至元十七年仲夏刻飛白書在慈恩寺

崇靈廟記 至元十七年十月立王博文撰文僕散祖英正書駱天驤篆額在渭南尹村

崇靈廟者土人祠周孝侯處設也碑只載處與氏人齊萬年戰歿事謂秦人思而祠之措詞得正明人因之乃謂孝侯即渭南人且指到獸山為孝侯殺白額虎地附會縣東之赤水橋為即長橋穿鑿可笑碑云崇靈金大定間賜額

蔡孝子順碑陰記 至元十七年十月立鄒任志撰文正書在渭南鄉賢祠

吳山寺地土執照 至元二十年四月僧永輝立正書在乾州

馬宗師道行碑 至元癸未歲重五日立王利用撰文孫德或正書李頴篆額在整屋重陽宮

靈應宮鐘款 至元二十一年二月造正書在朝邑

陳亞天慶宮詩 至元甲申春二月刻正書在郿縣觀村

重修說經臺碑 至元二十一年立李道謙撰文李志宗正書在整屋樓觀

道謙字和甫汴梁人初事洞真人至元十四年安西王開府陝西著提點五路道教兼領

重陽萬壽宮事元貞元年賜號天樂真人

李道謙詩 至元乙酉春三月刻正書

沁園春詞 至元乙酉夏刻李如堅撰正書

冉德明詩 至元乙酉孟冬刻正書並在郿縣觀村

王重陽仙跡記 至元己丑七月立劉祖謙撰文劉汾正書并題額在咸陽

李真人門下記 至元二十七年三月立正書在郿縣觀村

古文道德經 至元辛卯立高翹書古文未有記篆文李道謙跋隸書在整屋說經臺

經為翹所書云出古文韻海宋史藝文志無此書字體奇詭失實非古人之遺也唐太史令

傳奕校定道德經古本字字有據如號而不嘜見玉篇今本譌作嘜如春登臺見易州所刻
唐明皇注本今作如登春臺儼乎其若客與下句釋字為韻而王弼本作若容此類甚多唯
傳本不誤惜翻不依此作篆而僅依俗本專輒造字未免為識者所笑耳翻以憲宗乙卯歲
書至元時刻石

薛文曜重修宣聖廟記 至元三十年三月立劉忠撰文齊天祥正書并題額在澄城

陳大中墓塔銘 至元三十年仲夏立郭汝弼撰文并正書在韓城

大中字子正韓城縣人初仕韓城尹至元二年改楨州判官四年移乾州七年為澄城尹加

敦武校尉復調韓城二十九年卒葬縣之東南陳莊

重修文廟記 元貞建元十月立韓擇撰文并正書在臨潼

擇字從善元史傳附蕭勳後

鍾都尉墓碑 大德四年立正書在同官神水鄉

碑僅存上截無撰書人姓名

甘澍之記 大德九年重九日立顏守淪正書并篆額在華嶽廟

西鎮祀香碑 大德十一年七月立梁□□撰文正書姓名泐蒲明德篆額在隴州

文有云皇帝以大德十一年五月二十二日誕膺寶位合之元史則武帝以是月二十一日
即位于上都也小異

加聖號詔 大德十一年七月立正書一在西安府學一在韓城縣學

元史武宗紀大德十一年武宗即位七月加封至聖文宣王為大成至聖文宣王

張洵重修縣學講堂記 皇慶元年季秋立岳松撰文劉堯澤正書篆額在澄城

加封至聖文宣王碑 皇慶二年正月立趙世延撰文并正書

世延以至大四年為陝西行臺侍御史是年陞浙江行省參知政事尋召拜侍御史

加聖號詔跋 皇慶二年五月立趙世延撰文正書篆額並在西安府學

華嚴世界海圖 皇慶癸丑七月立釋圓覺正書在咸寧開元寺

修太白廟記 延祐元年四月立李昶撰文禮愷正書部從禮篆額在郿縣

世祖時有東平須城李昶與此是兩人

修太白廟助緣功德主名 年月全上正書刻前碑陰

題名中里社內有柿林社者即廢柿林縣也元志舊於郿州添置柿林縣至元元年省一統

志柿林廢縣在郿縣東四十里

藏御服碑 延祐二年三月立趙世延撰文趙孟頫正書李□□篆額在盤屋重陽宮

玉泉觀記 延祐乙卯四月立潘汝劼撰文并正書題額在澄城玉泉

觀為和陽子棲真之所其徒純靜大師王永謙所造也汝劼時為陝西諸道行臺御史

清涼院碑 延祐三年禧月立長老根撰文蒲忠孝正書蒲明德篆額在隴州

郝巨卿墓碣 延祐四年十月五岳崧撰文曾孫惟賢正書段□□篆額在韓城柳村

文云天興壬辰大中書丞相耶律公為董軍國事適汴張晏以待四方之士者即耶律楚材

也天興壬辰當元太宗之三年是年八月太宗幸雲中始立中書省改侍從官名以楚材為

中書令是歲元兵克鳳翔還攻洛陽河中諸城盡下之此其事也岳崧字景山邵陽人延祐

中三聘不起解禽鳥語常讀書于臥龍岡與蕭軒友善

祀西嶽文 延祐四年臘月立正書篆額無姓名在華嶽廟

祀西鎮碑 延祐四年十二月立莫勝撰文賈幹魯思台正書并題額在隴州

文云延祐丁酉秋秦山摧裂小民震駭者成宗本紀是年七月成紀縣山崩土石潰徙壞田

稼廬舍壓死居民十月遣御史大夫伯忽參知政事王桂祭陝西嶽鎮名山賑卹秦州被災

之民即其事也又稱伯忽為開府儀同三司太傅御史大夫王桂為中奉大夫中書省參知

政事與史略同

贈安定郡伯蒙天祐新阡表 延祐五年九月立蕭軒撰文并隸書篆額姓名缺在大荔

碑題云知船橋兵馬都總管萬戶府與魯千戶贈朝列大夫同知晉寧路總管府事騎都尉

安定郡伯蒙君諱天祐字祐之蓋蒙君官至總管府萬戶以子懷□貴得贈官如之也子封

安定郡伯職亦不卑而史傳莫可攷特以惟斗文傳之耳碑甚磨泐不可讀

唐開元寺興致 延祐六年正月立正書篆額在咸寧開元寺

碑序開元二十八年明皇與勝光法師論佛功德令天下州府各置開元寺故上方繪明皇

及法師像攷鄠縣重雲寺有吳思温唐太宗與元奘對譚畫壁即此等事也碑具載上石勒

字人名不及書及篆額者當時人之艸率可見

光國寺聖旨勅 延祐六年八月立上蒙古字下正書釋之在郃陽

勅稱馬兒年四月應是延祐五年

橫渠祠堂記 延祐七年正月立文禮愷撰文楊粹正書并隸額在郿縣

文有云先生之書有覆瓿之議又云天相斯文無往不復是當時尤有未信其學者攷西銘

初成楊時致書伊川曰西銘言體不及用恐其流至于兼愛伊川答云橫渠立言誠有過者

乃在正蒙西銘為書推理以存義與孟子性善養氣之論同功豈墨氏之比朱子跋太極西銘二書曰始余作太極西銘二解未常敢出以示人近見儒者多議兩書之失或未通其文義而妄肆詆訶余竊悼焉由是言之宋時之議橫渠者不少得程朱表章久而論定程朱之為功于橫渠大矣

加封師真人勅 延祐七年重陽日立陳德定正書并篆額在五臺山

右共四勅並以至大三年二月下弟一勅加贈東華帝君為東華紫府輔元立極大帝君弟二勅加贈鍾離真君為正陽開悟傳道垂教帝君呂真君為純陽演正警化孚佑帝君劉真君為海蟾明悟宏道純佑帝君王真君為重陽全真開化輔極帝君弟三勅加贈邱處機為長春全德神化明應真君弟四勅加贈馬鈺為丹陽抱一無為普化真君譚處端為長真真神元靜蘊德真君劉處元為長生輔化宗元明德真君王處一為玉陽體元廣慈普度真君郝大通為廣寧通元妙極太古真君孫不二為清淨淵真元虛順化元君勅並付元門演道大宗師掌教凝和持正明素真人苗道一收執案元史邱處機傳處機與馬鈺譚處端劉處元王處一郝大通孫不二同師重陽王真人金宋之季俱遣使召不赴歲己卯太祖自乃蠻命近臣札八兒劉仲福持詔求之處機與弟子十八人同被見此加贈處機勅內有云逮芝

綸之叠降躡雲鳥以來從率英賢凡十八人言宗社非一二事者與之合馬鈺寧海人本名從義字宜甫譚處端本名玉並重陽改名全真學者稱鍾呂劉為三祖又以重陽為祖師然重陽之教皆長春張大之者也劉字元英名哲自號海蟾子五代時人處機弟子十八人今可攷者共四人勅贈清和妙道廣化真人尹志平勅贈真常上德宣教真人李志常勅贈元通宏教披雲真人宋德芳賜號元門宏教白雲真人蔡志遠並見祖庭仙真內傳

重修香城院記 至治二年五月立李木魯冲撰文正書在咸寧香城寺

泰寧宮包砌坤柔殿基記 至治三年八月立同鶚撰文并正書篆額在渭南

祀西鎮吳嶽廟祝文 一泰定四年五月一泰定五年四月立並馮道安正書在隴州廟內

碑後題云馮道安立石而碑實鎔鐵為之余集陝西諸金石得鐘款十有一件鐵碑則一而已又為陰識字體精整尤可愛也

王氏世德序 泰定四年七月立歐陽元功撰文夔夔正書并篆額在朝邑

此碑明時所刻夔夔即康里子山也

默庵記 泰定四年立趙良弼撰文并集唐顏真卿正書在咸寧楊萬坡

元有兩趙良弼皆非此人韓國文正公字輔之卒於世祖至元二十三年又有一人字君卿

東平人為嘉興路史遷杭州亦能書出鍾嗣成錄鬼簿

西臺御史謙齊朶又忽都魯別題名記 至順二年九月立正書在興平縣治前

孫德或道行碑 元統三年九月立鄧文原撰文趙孟頫正書在盤屋重陽宮

文原字善之一字匪石綿州人以天歷元年卒當是子昂追書其文也

祀妙應真人記 至元二年上元日立周德洽撰文後刻完者台皇后祭文並正書在五臺山

完者台皇后即順帝第二皇后奇氏

夔夔與王由義書 至正元年四月刻艸書在朝邑

御香記 至正二年上元日立高獻撰文李拱正書王道清篆額在五臺山

孔子廟制詞 至正三年九月立正書篆額在郿縣

內加封啟聖王制為至順二年九月加封大成至聖文宣王制為大德十一年七月加封大

成至聖文宣王夫人制為至順二年六月并刻於至正三年也以元官為并官與漢韓勅碑

宋大中祥符封鄆國夫人詔宋鄧名世姓氏書辯証王伯厚姓氏急就章諸書合

贍學地畝及題名 年月全上正書刻前碑陰

重修宣聖廟記 至正四年四月立任惟孝撰文白好義正書篆額在宜川

馬鬼詩 至正六年六月立張洵正書在興平貴妃墓上

奉元路重修廟學記 至正六年十月立虞集撰文王守誠正書蘇天爵篆額在西安府學

守誠字君寔著經世大典成拜陝西行臺監察御史字法近虞世南合以虞文蘇額可稱三

絕

奉元二瑞之記 至正九年七月立何恭撰文傅夢臣正書并篆額在西安府

碑上層為二瑞圖下刻記二瑞者嘉禾岐麥也圖刻甚工惜文與字俱不佳恐不足以傳遠

耳

艸堂寺詩 至正壬辰四月刻釋溥光作并行書在鄠縣

雪庵詩石凡二又一石為艸堂值雪詩行書前書衛尉副使與屯公畱題名不可辯書史會

要溥光字元暉號雪庵俗姓李氏特封昭文館大學士賜號元悟大師

重修后土廟記 至正十一年七月立余闕撰文李成正書秦不花篆額有陰在渭南南門外

雷祥廟碑 至正十二年十一月立潘懇撰文并正書篆額在白水

祥善醫能陶所造磁器甚工時人謂之雷公器歿為彭衙土神常顯靈異蝗不為害寇盜不

至境內里人祠之文稱天朝加封致祀銘又有擬周班爵明王之封等語而不明著其號又

不載詳為何代人是所缺略

重立泰寧宮記 至正十三年八月立王璞撰文并正書篆額在渭南南門外

碑上方刻宋大中祥符牒右刻金正隆四年記此刻於左其陰刻當時縣尹丞尉簿史姓名是碑蓋磨去唐渭南縣令李君清德頌而重刻者內陰陰有文云渭南令李君云聖歷二年致趙明誠金石錄作元年疑誤

王德成題名 至正十三年九月刻行書在慈恩寺

修忠惠王廟碑并陰 至正甲午仲夏立黃理仙撰文正書篆額姓名缺碑陰亦正書篆額在興安州牛山

忠惠王者唐刺史崔堯封也或曰堯封名偉中和三年黃巢亂有太白山人獻計于偉曰一發牛山巢滅掘之得黃要獸置劍其上斬之巢敗偉由是得道至宋封為忠惠王至正十一年總兵官月魯帖木兒擊破紅巾賊劉福通重新此廟理仙時為興安學正命為文以紀之碑甚豐偉

修禹廟碑 至正十四年仲夏立李克敏撰文裴時靜行書百嘉納篆額在韓城

郭鈞遺愛碑 至正十五年正月立常視遠撰文李琇正書養安處篆額在郃縣

義門王氏先塋碑 至正十五年戊子月立歐陽元撰文危素正書趙期頤篆額在蒲城

書史會要期頤字子奇汴梁人官至陝西行臺治書工于篆六研齋筆記期頤篆迹渾樸高

古以禹碑周鼓為宗無一筆似陽冰

瓊公道行碑 至正二十二年四月立釋□洪撰文采羅台正書在咸寧開元寺

采羅台唐元氏積官昭信校尉芍陂屯田千戶所建魯花赤元史有傳

官家石洞碑 至正二十二年十一月立正書在三水東北洞內

文有云居士蕭元義任御史見居斯窟顯清縣尹睢恭娘子張氏達魯花赤秀堅帖木兒夫人周氏趙氏亦居此處時至正十九年六月初六日後二十二年壬寅十一月黃鐘吉日立石

東嶽廟碑 至正二十三年九月立孔克任撰文并正書篆額在長武

文並正書唯前題孔克任名及後號年二行篆書

周公廟潤德泉記 至正二十五年三月立孔克任撰文并正書篆額在岐山

碑李思齊所建文及書體並雅令但以崔珙碑誤指為宋則甚可笑其叙思齊官為銀青光祿大夫郊國公陝西等處行中書省平章政事兼知四川等處行樞密院事皇太子詹事攷

元史本紀則是年正月封思齊為許國公至五月始加銀青光祿大夫邠國公及樞密詹事等官也碑立于三月已有是稱疑史誤

渾忠武王感應碑 至正二十五年三月立魏志遠撰文王克明正書崔安平篆額在宜川文有云至正二十二年冬十月總兵官太保中書右丞相李羅帖木耳特奉聖旨為守禦延安分命中奉大夫河南江北等處行中書省參知政事朱希哲守禦宜川攷元史叛臣傳是年八月李羅帖木耳據延安欲東渡以奪寧晉十月乃南侵擴廓帖木耳所守之地是時李羅跋扈與擴廓李思齊等相持彼此踐襲故文又有亂兵侵我疆場殺我良民云云再三公表李羅以至正二十年為太保此著其稱于二十二年下者當是追書文體卑靡不足道篆額亦甚戾

重修宣聖廟記並陰 至正二十六年三月立董立撰文張冲隸書在西安府學

雍大記董立字植夫以明經中經元隱居教授徵拜翰林修撰輔導儲副遷司業以績著累擢陝西行臺侍御史卒謚文定

移落星石題字 至正二十八年刻米克明記正書在興平縣治

右刻在唐太和中陳元錫題名之後石即晉昇平元年所隕者也詳見元錫記及晉書本在

縣東北田間克明昇之縣署因有此題

也先帖木兒殘碑 號年缺正書在華嶽廟

也先帖木兒脫脫之弟曾為御史大夫陝西行臺監察御史此碑當即其時所立

道德經 正書無號年及書人姓名在盤屋說經臺

石墨鐫華云此碑似出杜道堅李志宗輩而不著姓氏

蔡孝子順墓碑 田遠撰文正書在渭南縣東十里孝子村

天冠山詩 無號年趙子昂作并行書在西安府學

此是明刻未有文符詔徵明跋

則因以興灌溉之利通山谷之遠修明疆界釐正祀典既非若道元之注託之空言又非若歐陽諸書僅資博識則所得實多焉公既嘗以案部至咸陽讀周文公廟諸石刻爲守墓之裔請於

朝增置五經博士近又欲考定臨晉河伯之祠邵陽子夏之墓皆公經世之務之獲於稽古者也讀是記者可以觀其槩焉後學洪亮吉跋尾

雍涼之域實曰神臯吉金樂石之所萃也爾乃竹書紀異昆侖命樹王母之眉韓非著書華嶽勒天神之字休與藐哉其詳軼矣若其列侯尸祀銘業乎奇器漢將揚武紀威乎絕域西京崇秩望之儀蜀魏盛開鑿之蹟固亦有焉是以岐陽石鼓厥貢於上京裴岑紀功揚光于昭代暨乎唐葉作都渭陽宮室陵寢此焉是集移山壽績壓岫標奇巖爨負文而疑神螭虬挾篆而欵走亦越宋元彌工題唱鐫名百仞之翠沈字九回之淵莫不比重昆瓊方珍華玉自是厥後廢興忽然頽坻晝落則偉額潛埋野燎宵飛則貞跌渙碎承平以來塵居愈阜削員珉而代甃臥方闕以治絲或乃因文昌之小辭劇皇象之逸製者古之士蓋其閔矣隱顯之候豈其恒歟今陝西巡撫畢公江左之望蔚矣儒風漢庭之才褒然舉首逮乎爲政其學益敦開府乎咸林攝節乎涼肅外傳有云夕而序業周公之美讀書百篇公其體之斯爲大矣時則鄭白之沃互有泛

塞公廝渠所及則有隨便子谷造象得于長安唐爾朱遶墓碣得于邵陽朱孝誠碑得于三原臨洮之垣亘以河朔公案部所次則有唐姜行本勒石得于塞外梁折刺史嗣祚碑得于府谷寶室寺鐘銘得于鄜州漢鄱君開道石刻魏李苞題名得于褒城公又奏修嶽祀而華陰廟題名及唐華山銘始出焉公釋奠學校而開成石經及儒學碑林復立焉自餘創見多後哲之未窺前賢之未錄公受之以藏是云敦素獲之有道乃惟賢勞其知者曰可以觀政矣重光之歲月移且相武橐有緘嘉禾告瑞公始從容晨暮校理舊文考厥異同編諸章冊且夫歐趙之書徒訂其條目洪都之著弟詳其年代公証古之學奄有征南博聞之才通知荀勗此之造述力越前修談經則馬鄭之微辨字則楊杜之正論史則知幾之邃察地則道元之神秀及九章淵通內典承天譜系之學神珙字母之傳固已奪安石之碎金驚君苗以焚硯君子多乎于公末也公既理其打本藏諸名山刊其嘉言詒之來學謬承校錄略悉源流若公惠政之列國勲之章方與往刻共不朽焉非所及也後學孫星衍撰

Blank manuscript page with vertical lines.

